

RANTAYETAKERI OTYAANTAPERORIITE

Ikashaakagaitziri Tasorenkantsi

¹ Teófilo, pairani owakera netantanakawori notyaantzimiro nosankenare, ari nokenkithatakotakemiro maawoini rantayetakeri Jesús, nokenkithatakotakemiro ejatzi okaatzi retanakari riyotaantziri,

² irojatzi imonkaatantapaakari reethonkitai inkiteki. Tekera reethonkitaita, riyoyaakeri Rotyaantaperotaarewo, ikantakaakari Tasorenkantsi, riyotakaakeri oitarika rantayeteri.

³ Ikanta ikamawetaka, iñagaitawairi koñaawoini, ari riyotaiyini riyotaanewo añaigai. Okaatzi 40 kiteesheri roñaagapanaantri riyotaanewo, riyotapanaantziri jimpe ikanta ipinkathariwentantzti Pawa.

⁴ Eeniro itsipayetari Rotyaantaperore, ikantztakari irojatzi risaikayetawake Jerusalénki, ikantakeri: “Ari poyaawentawakya imonkaaty ari okaatzi ikashaakaakemiri Ashitanari, nokenkithatakotzitakemiri.

⁵ Tema imapero Juan romitsitsiyaatantakawo ñaa, iro kantacha eero osamanitzimaita piñaayetantyaariri Tasorenkantsi risaikashiretanteemi oshiyawaitakawome romitsitsiyaatantaty-eemiri.”

Reethonkitantaari Jesús

⁶ Ikanta jirikapaini tsipatakariri Jesús, rosampitakeri, ikantziri: “Pinkatharí, ¿lrootaintsima pookaawiritaantairi nosheninka Israel-iite?”

⁷ Ari rakanakeri Jesús, ikantziri: “Te okowa-jaanta piyotero eerokapaini tsikapaite, apatziro riyotzi Ashitanari tsikapaiterika, iriitajaantake oshekitzimotzi ishintsinka rantantyaawori.

⁸ Iro kantacha arika ripokake Tasorenkantsi risaikashiretantaapakemi eerokapaini, iriitake aawyaashiretakaimine, iro ompoñaantyaari piyaayetanake pinkenkithatakotaina naaka Jerusalén-ki, maawoini janta Judea-ki eejatzi Samaria-ki, irojatzi intaina jimpe iweyaapaa kipatsi.”

⁹ Ithonka ikenkithawaitakero jiroka, raminaminthaitziri riyotaanewo, eethonkitairo Jesús, irojatzi ipeyantapaakari menkoriki, te iñagaitanairi.

¹⁰ Raminaminthaitziri jimpe ikanta Jesús reethonkitai inkiteki, apite atziri katziyimotapaakari kitamaaniki iithaare,

¹¹ ikantapaakeri: “Galilea-satzi, ¿litaka paminiri inkiteki? Piñaakeri jimpe ikanta Jesús riyaatai, ari inkantaiyaari eejatzi paata arika ripiye.”

Raminake itsipa poyaatyuarine Judas

¹² Ikanta ripiyaiyaani riyotaanewo janta Jerusalén-ki ipoñagaawo otzishiki iitaitziri Olivo, te osamaniperote, ishinetaantsita ranashiyeetya kiteesheriki rimakoryaantaitari.

¹³ Ikanta rareetaiyaani nampsitsiki, ataitaiyapaini jenokinta pankotsi tsika rimaapiintaiyini.

Jirika ikaataiyini: Pedro, Jacobo, Juan, Andrés, Felipe, Tomás, Bartolomé, Mateo, Jacobo itomi Alfeo, Simón iitaitziri “Jokaakotantaneri”, ipoñaapaaka Judas irinentzi Jacobo.

¹⁴ Maawoini jirikapaini ari ikantaiyapiintatyaani ipiyotaiyani ramanaiyani itsipayetakari irinentzi Jesús, itsipatawo María inaanate, eejatzi otsipapaini tsinane.

¹⁵ Ikanta ipiyotaiyani kemisantzinkaripaini, ikaataiyini 120 atziri. Ari ikenkithawitanake Pedro, ikantanake: *

¹⁶ “Iyekiite, monkaataka okaatzi rosanke-natakaakeriri Tasorenkantsi pairani Davidni, ikenkithatakotakeri Judas jewatapaintsiri raakaantziri Jesús.

¹⁷ Jirika Judas iri atsipatapiintawetari antawaireki.

¹⁸ Iro kantacha raakeri koriki ripinataitakeriri iyaariperonka, ramanantantakawo kipatsi. Ari iparyaakeri janta Judas, rowatziitotanaka, rithonka ritankawaitapaake, jokaporenthakeerekiwaitapaaka isheeto.

¹⁹ Ikanta ikemaiyakeni Jerusalén-satzi, iitakero kipatsi ‘Iraantsipatha’, iitziro riñaanekei iriroripaini ‘Acéldama.’

²⁰ Tema osankenarentsiki Salmo-ki, ikantaitake:

Kaankithaaante onkantya ipanko,
Tekaatsi saikantaiyaawone.

Ikantaitake eejatzi:

Intzime itsipa poyaataiyaarine rantawaireki.

* ^{1:15} Ikantaitziri jika kemisantzinkaripaini, irijatzi iitaitziri “iyekiite”.

21 Eenitatsi jaka atziripaini tsipatapiintakairi eeniro itsipawetai Awinkatharite Jesús,

22 atsipatzitakari owakeraini romitsitsiyaataka Jesús irojatzi reethonkitantaari inkiteki. Ontzimatye aminai antsipataiyaari ñiitakariri eejatzi Jesús rañagai.”

23 Irojatzi rookotaitantanakariri José, iitaitziri Barsabás, iitaitziri eejatzi Justo, ipoñaapaaka Matías.

24 Ari ramanakowentanakari, ikantzi: “Pinkatharí, eeroka yotashiretziriri maawoini, jirika apite nookotakeri, poñaayenari jimpe itzimi pinintakeri eeroka,

25 iriitake nontsipataiyaari notyaantaperoritai nantawaitaimi, ripoyaataiyaari Judas-ni opeyakaashitakari iyaariperonka irirori. Tema Judas, jatake irirori tsika inintakagaitakeri.

26 Irojatzi roshiyakaantanakawori jirikapaini iñaaryaataita, iñaatziro iriitake Matías. Iriitakera Matías kaatanairiri jirikapaini 11 Otyaantaperoriite.

2

Ripokantakari Tasorenkantsi

1 Okanta imonkaatapaa roimoshirenkantaitawori kiteesheri “Owiitaantsi”. Ipiyotaiyaani maawoini riyotaanewo Jesús. *

2 Ari omapokapaakari antawoite kamenita-paintsiri oshiyawetapaakawo antawo tampyaa, okenapaake jenoki inkiteki, ookantapaakawo pankotsi risaikaiyakenira.

* **2:1** Kantakotachari jaka “Owiitaantsi”, irojatzi ikantaitzitari “Pentecostés”.

³ Iñaaawakitzi paampashithakeerekitapaintsiri, opeyantapaakari apaanipaini ikaatzi piyotainchari.

⁴ Maawoini risaikashiretantapaakari Tasorenkantsi. Ari retanakawo riñaawaiyetanakero otsipasato ñaantsi, iriitakera Tasorenkantsi ñaawaitakaanakeriri.

⁵ Okanta janta Jerusalén-ki, ari risaikayetziri Judá-ite poñaayetachari intaina otsipaki nampsitsi. Iriiyetake pinkathatasorentsitaneripaini.

⁶ Ikanta ikemaitakero kamenitapaintsiri, ripokaiyapaakeni osheki atziri, te riyotawakero oita awisatsiri, tema ikemathatakeri apaanipaini ñaantsi okaatzi riñaawaiyeetziri, irootake riñaane.

⁷ Iyokitzii ikantayetanaka, ikantawakagaiyani: “¿Tema Galilea-satzi rinatzí ñaawaiyetakerori otsipasato ñaantsi?

⁸ ¿Tsika okantaka akemantariri riñaawaitziro añaanepaini aaka?

⁹ Tema atsipayetakari jako Parto-satzi, Medo-satzi, Elam-satzi, Mesopotamia-satzi, Judea-satzi, Capadocia-satzi, Ponto-satzi, Asia-satzi,

¹⁰ Frigia-satzi, Panfilia-satzi, Egipto-satzi, eejatzi Africa-satzi jekaatapai Cirene. Tema atsipatakari eejatzi poñaayetachari Roma, Judá-ite eejatzi kaari Judá-itetatsi pairani.

¹¹ Eejatzi Creta-satzi, ipoñaapaaka Arabia-satzi. Ari atsipatakari maawoini irirori akemayetakeri riñaawaitantayetakawo añaanepaini, ikenkithatakotziri Pawa ritasonkawentantzi.”

¹² Iyokitzii ikantanaka atziripaini, te riyotzi oita iñiiri. Ikantawakagaiyani: “¿Oitaka jiroka?”

13 Iro kantacha tzimatsi atziri thainkantaneri, ikantayetzi irirori: “¡Ishinkitaiyatyaani jirikapaini!”

Retantanakawori ikenkithatanake Pedro

14 Ikanta ikatziyanaka Pedro irirori, itsipatakari Otyaantaperoriite ikaatzi 11, ikenkithawaitanake shintsiini, ikantzi: “¡Asheninká! ¡Jerusalén-satzipaini! Pinkemisantawakena piyantyaari.

15 Piñaawetaka eerokapaini ishinkitatya jirikapaini. Te, tema owakera reenokiityaapaake ooryaa. [†]

16 Imonkaatatyā okaatzi rosankenatakeri pairani Kamantantaneri Joel-ni, ikantake:

17 Ikantzi Pawa:

Tzimatsi awisatsine weyaantapaakyawone kitteesheri.

Ari notyaantakeniri atziripaini Notasorenka os-hiyawaitakawo risakoperoitatyeenirime.

Ari inkenkithatakoyetanaina itomipaini eejatzi rishintopaini.

Ari iñaaawyawaitakya mainaripaini,
Eejatzi antarikitaintsiri rimishiwaiyetai.

18 Ari nonkantakeri ewankaripaini ronampirey-eetari, eejatzi ewankawopaini.

Notyaantainiri Notasorenka paata, ari inkenkithatacantayetai.

19 Ari iñagaitake inkiteki kaari iñapiintaitzi.

Iñagaitero kipatsiki iraantsi, paampari, antawo oy-achaarinka.

20 Iñagaiteri ritsiwakimate ooryaatsiri,
Iñagaiteri eejatzi kashiri riratzimotante,

[†] **2:15** Kantakotachari jaka “reenokiityaapaake ooryaa”, irootake ikantitziri pairani “ooryaa 3”. Okaatzi rametari Judá-ite irirori, te ishinkineta owakera okiteeshetamanai.

Irootaatsi iyomaataiya kiteesheri ripokantaiyaari
Pinkathari.

Tema antawo rowaneenkawo onkantaiya.

²¹ Inkaate aakotairine iwairo Pinkathari,
rawentaayetaari, iriyyetake awisakoshire-
taatsine.

²² ¡Shiramparipaini! ¡Israel-iite! Pinkemaiyeni
nonkante. Piñagaiyakerini eeroka, jirikaganki Jesús
Nazaret-satzi, iriitake rotyaatkemiri Pawa. Ri-
tasonkawentayetakemi, roñaagayetakemiro kaari
piñaaweta pairani.

²³ Iro kantacha, ramaitapaakemiri jirika,
powamaakaantakeri eerokapaini ikentakotakeri
kaariperoshireripaini, ari imonkaatakarai
onkaate awishimoterine, tema irootake
ikenkithashiriitakari Pawa.

²⁴ Ikanta rowiriintairi Pawa ikamawetakaga, te
rishinetairi inkemaatsiwaitaiya. Tema te okit-
sirinkiri kaamanetaantsi.

²⁵ Tema iri rosankenatakotakeri pairani David-
ni, ikantake:

Noñaapiintziri Nowinkatharite itsipatana.

Tema risaiki nakoperoki, tekaatsi kitsirinkerine.

²⁶ Irootake nokimoshiretantari,
Kameniwaante nokanta nothaamentawentari.
Iriitake noyaakoperotairi, nawentagaiyaarini.

²⁷ Tema eero pookanawentanawo noshire
sarinkaweniki arika nonkamawetakya.

Eero pishinetziro ipathaye nowatha,
pitasorentsite ninatzi.

²⁸ Piyotaakenawo jimpe nonkantya nañaashiretai.
Osheki poimoshirenkaina arika nontsipataimi.

²⁹ Iyekiite, ayotaiyini aaka te iri acharine David-
ni kenkithatakotachane jaka, kamake pairani

irirori, ikitaitakeri, irojatzi risaiki iroñaaka jimpe ikitataka.

³⁰ Tema Kamantantaneri rinake irirori, riyotzitaka pairani tzimatsi ikashaakaakeriri Pawa, ari impinkatharitakagairi apaani incharinentyaari. ‡

³¹ Tema oshiyawaitakawo iñaakityeerome David-ni, ikenkithatakotakero rañagai Cristo, ikenkithatakotakeri eero risaiki sarinkaweniki, eero ipathai eejatzi iwathaki.

³² Iriitake añaakagairiri Pawa jirika Jesús. Imperotaty maawoini noñagaiyawairini naaka.

³³ Ari reethonkitai, risaikimotapairi rakoperoriki Pawa ipinkathariwentantapai. Ari imonkaatari okaatzi ikashaakayitakairi pairani Ashitairi, tema rotyaantakairi Tasorenkantsi oshiyawaitakawo risakoperoitaatyainirime. Irootajaantakera piñaayetakeri iroñaaka.

³⁴ Tema kaari David-ni eethonkitaatsine inkiteki iriitake kenkithatakoreri pairani jiroka, ikantake:

Ikenkithawaitake Pinkathari, ikantawairi Nowinkatharite:

Pisaikapai nakoperoki ampinkathariwentante.

³⁵ Irojatzi paata nowasanketantaiyaariri kisanneentakemiri,

Ari pimakoryaayitzitantaiyaari.

³⁶ ¡Asheninká! iro kameethatatsi ayotaiyeroni jiroka maawoini aakapaini icharineyetaira Israel-ni. Jirika Jesús pikentakotakaantakeri eerokapaini, iri ipinkatharitakaakeri Pawa, irijatziita Cristo.”

‡ 2:30 Tzimatsi osankenarentsi aakotziriri iwairo Cristo risaikimotairi Pawa tsika ipinkathariwentantzi irirori.

37 Ikanta ikemaiyawakeni ikaatzi piyotainchari, antawoite ithaawashiryaanake, rosampitanakeri Pedro, eejatzi itsipapaini Otyaantaperoriite, ikantaitanakeri: “Iyekiite, ñjimpe nonkantaiyaaka naaka?”

38 Ari rakanakeri Pedro: “Pipiyashireyetai, pomitsitsiyaawentaiyaari Jesucristo, paakoyetanairi iwairo. Iro riyatantaityaari impeyakotakagaimiro Pawa pikaariperowetaka, ari risaikashiretantaimi Tasorenkantsi.

39 Irootake ikashaakagaitakemiri eejatzi eeroka, irojatzi ikashaakayitaitakariri pitomipaini, eejatzi ikaatzi nampiyetawori intaina. Tema maawoini ikaimashireyeetairi iriitake ikashaakayitaitakari eejatzi irirori.”

40 Osheki okaatzi ikenkithatakotakeri Pedro, ishntsithatantakari eejatzi, ikantayetakeri: “¡Powawsaakoshiretya! ¡Pintainaryaapithateri atziripaini kenashiwaiyetainchari!”

41 Irojatzi ikemisantantanakari osheki atziri, omitsitsiyaayetanaka, ikaatzi 3,000 atziri kemisantanaintsiri.

42 Kisokero rowanakero okaatzi riyotaayetakiriri Otyaantaperoriite, kameetha raapatziyawakaanaka. Ari itzipetowapiintaiyironi pan, ikamaitanakawo eejatzi ramanaiyani. §

§ **2:42** Kantakotachari jaka “itzipetowiro pan”, iro rantayetanairi kemisantzinkaripaini arika inkenkithashiryaakoteri Jesucristo ikamimotantake. Ari ikantziro rakiyootawakagaiyan, itzipetowiro pan, rowaiyani, riraiyini eejatzi imere. Tema roshiyakotatyari Jesús tsika ikantanairo riweyaantanaawo rowakaanaari riyotaanepaini. Irootake ikenkithatakotapiintaitakeri, ikantaitzi “Pintzipetowero pan.”

Rañaantare etayetanakawori ikemisantzinkaritzi

⁴³ Riyokitziiwentanakero iñaaakerowa ritasonkawentantayetake Otyaataperoriite, rantayetakero kaari iñagaitapiintzi.

⁴⁴ Osheki raapatziyawakaanaka ikaatzi kemisantanaatsiri, rantetaawakaanawo okaatzi oshekitzimoyetziriri.

⁴⁵ Ipmantayetziro oshekitzimoyetziriri. Rayi koriki ipayetziri itsipapaini kemisantanaatsiri ashironkaayetachari.

⁴⁶ Ari ikantaitanaatya kiteesheriki raapatziyawakaana ipiyotaiyani tasorentsipankoki. Te ripakaanakero ikaimawakaiyani ipankoki rowaiyaani, ari itzipetowirori pan. Kimoshire ikanta itsipatawakaiyani, itsinampashireyetanai.

⁴⁷ Ithaamentapiintanakari Pawa. Iro inimoyetakeriri atziripaini iñaayetakero jimpe ikantayetanaa. Ari okantaitanaatya kiteesheriki roshekyiiri Awinkatharite kemisantzinkaripaini inkaate awisakoshireyetaatsine.

3

Retsiyatakagaitziri kisopookiri

¹ Okanta otsipa kiteesheri, tsireniityaanake ramapiintitantari. Ari ritonkaanakeri Pedro itsipatanakari Juan, ryaatero tasorentsipankoki. *

² Ari ritonkyotakotantaka ramaitziri kisopookitatsiri. Rashi rowiro owakera itzimapaake. Maawoini kiteesheri ramaitapiintziri omooki

* **3:1** Kantakotachari jaka “tsireniityaanake”, irootake ikantaitziri pairani “ooryaa 9”.

tasorentsipanko iitaitziro “Owaneenkaanto”. Ari risaikapiintziri impashiyetantyaariri koriki ikowakoyetziriri kyaayetatsiri.

³ Ikanta jirika iñaawakeri Pedro itsipatakari Juan, iro inkyaatapaakyaarime tasorentsipankoki, ikowakotawakeri impashitanakyaari koriki.

⁴ Ari ipampoyaanakeri. Ikantziri: “¡Paminena!”

⁵ Ikemisantatzi kisopookiri, roshiyakaatzi im-patyereerijimpe oitya.

⁶ Iri kantacha Pedro, ikantanakeri: “Tekaatsi noorikite, te itzimi eejatzi ooro, iro kantacha eenitatsi nantzimotemiri. ¡Pinkatziye! ¡Panashitai! Naakotatziimirri iwairo Jesucristo Nazaret-satzi, iriitake antemirone.”

⁷ Rakathatakeri, ipiriintakeri. Omapokashitanaka ishintsitanai iitziki eejatzi ishoonketziki.

⁸ Ari rimitaanake ikatziyanaka, anashitanaka. Itsipatanakari jirikapaini ikyapaake tasorentsipankoki, anashiwitanaawo, mitaamitaawaitanai, ithaamentanaari Pawa.

⁹ Ithonka iñagaitakeri ranashitanaa, ikemaitakeri eejatzi ithaamentawaita.

¹⁰ Riyokitziwentaitanakero iñagaitakerowa awisaintsiri, te rikompiyeetawakari jirika, iriitake kowakotantapiintatsiri impashiyetyaari janta omooki tasorentsipanko, iitaitziri “Owaneenkaanto”.

Ikenkithatakaantzi Pedro ikyapiintaitzira tasorentsipankoki

¹¹ Ikanta kisopookiwetachari, te rookanakeri Pedro itsipatakari Juan. Iyokitziwenta

rowanakeri atziripaini, intsipaiteperoini ipiy-
owentapaakari awisashetakera tasorentsipanko
iitaitziro “Rashi Salomón”.

¹² Ikanta iñaawakeri Pedro, ikantawakeri:
“¡Shiramparipaini! ¡Judá-ite! ¿Itaka piyokitzi-
wentantanari? Eero pikenkithashiryaaishiwaita
naaka ashitawo noshintsinka, naaka tasorentsi
nimatantariri nanashitakagaari jirika.

¹³ Iwawane Abraham-ni, Isaac-ni, Jacob-
ni, iwawanetanakari eejatzi acharineete,
iriitake matakerori jiroka, ari onkantya im-
pinkathaitantyaariri Itomi Jesús, paakaantakeri
eerokapaini janta jewaripainiki. Ikowawetaka
Pilato romishitowakaantairime, te pikowimaita
eerokapaini.

¹⁴ Iriitakeme pomishitowakaantaim
Tasorentsitsatsiri, matzirori itampatzikashiretzi,
pomishitowakaantashitaari tsitokantaneri.

¹⁵ Iro opoñaantari powamaantakariri
añaashiretakaantaneri. Iri kantacha Pawa
rowañagairi. Noñagaiyawairini naakapaini rañagai.

¹⁶ Okaatzi etsiyatakotakagairiri kisopookiri
piñaapiintziri eerokapaini, iro matakaakeriri
rawentaashirenka ikemakenaga naakotakeri
iwairo Jesús. Irootake piñaantakariri iroñaaka
retsiyatakotai kameethaperoini.

¹⁷ Iyekiite, niyotzi naaka, te piyoperotero
okaatzi pantayetakeri, ari roshiyakemi eejatzi
peewarerepaini.

¹⁸ Ari ikenakairori Pawa rimonkaatziro
okaatzi ikenkithatakaayetakeriri maawoini
Kamantantaneriite, ikantake: ‘Aritake
inkemaatsitakagaitakyaari Cristo paata.’

¹⁹ Irootake pipiyashitantaiyaariri eerokapaini Pawa, pipakaayetairo piyaariperonka, oshiyawaitaiyaawome roshetakotaatyeyerome irirori pikaariperowetakaga. Ari piñagairo intsipashiretaimi Awinkatharite, retsinaryaashiretakagaimi.

²⁰ Aritake rotyaantairi Pawa eejatzi Jesucristo, tema ikashaakayitakemiro pairani aritake ripiye.

²¹ Onkantawetakya risaike Jesucristo inkiteki irojatzi inkowapaitetantakyaari Pawa rowakeratakagairo maawoini okantawetaga pairani. Iro ikenkithatakaayetakeriri Tasorentsishireri Kamantantaneriite.

²² Iro ikenkithatakotakeri pairani Moisés-ni, ikantake:

Ari rotyaantake paata Pawa itsipa Kamantantaneri, ari roshiyapaakena naaka rotyaan-takenaga.

Asheninka rinaty. Maawoini inkamantayeta-paakairi, ontzimatye ankemisantero.

²³ Maawoini kaari kemisanterine jirika Kaman-tantaneri, ari rithonkayeetakeri,

Eero iñagairi isheninkapaini.

²⁴ Ari roshiyakari eejatzi Samuel-ni, ikenkithatakotakero okaatzi añaayetakeri iroñaaka, irojatzi ikenkithatakoyetakeri eejatzi maawoini itsipapaini Kamantantaneriite.

²⁵ Eerokayetake ñeerone okaatzi ikowakaantakeri Pawa ikenkithatakoyetakeri Kamantantaneriite. Eerokayetake ñeerone eejatzi okaatzi raapatziyawakaantari pairani Pawa itsipatakari acharineete. Tema Pawa ikantakeri Abraham-ni:

Iri picharine tasonkawentairine maawoini sheninkatawakagaachari tsikarikapaini janta kipatsiki.

²⁶ Ikanta rowañagairi Pawa itomi, retakari rotyaantakemiri eerokapaini, ompoñaantyaari ritasonkawentemi. Iroowa pipakaantaiyaawori maawoini eerokapaini piyariperonka.”

4

Pedro eejatzi Juan ragaitanakeri jewanripainiki

¹ Ikanta Pedro itsipatakari Juan ikenkithatakayetziri atziripaini, areetaiyapaakani Imperatasorentsitaarewo, itsipatapaakari reeware kempoyiirori tasorentsipanko, eejatzi Sadoc-iiite.

² Ijisaiyatyaani, tema Pedro eejatzi Juan riyotaatziri atziripaini, ikantayetziri: “Imaperataya rañaayetai kamawetainchari, iriitake Jesús oñaagantapaintzirori.”

³ Rotaiyaitapaakeri, romonkyaaakaantakeri iroatzi oñaatamanai, tema tsireniityaake.

⁴ Iro kantacha osheki kemayetawakerori kenkitharentsi, ikemisantayetanake. Jirika ikaatzi tzimanaintsiri kemisantzinkaripaini, ikaataiyini 5,000 shiramparipaini.

⁵ Okanta okiteeshetamanai, ipiyotaiyakani Jerusalén-ki maawoini reewarite Judá-ite, Itzinkamipaini, eejatzi Yotzinkariite.

⁶ Ari risaikakeri eejatzi Anás Imperatasorentsiperotaarewo, Caifás, Juan, Alejandro, ipoñaapaaka isheninkapaini Imperatasorentsiperoriite.

⁷ Ikaimakaantakeri ramaiteri Pedro eejatzi Juan. Rosatekaitawakeri niyanki ipiyotaiyakanira, rosampitakeri: “¿Itaka shintsitakaimiri pimatantakawori jiroka? ¿Itaka paakotakeri iwairo?”

⁸ Irojatzi rakantanakari Pedro, ikantakaaperotakari Tasorenkantsi, ikantanake: “Pinkathari-paini, Itzinkamipaini.

⁹ ¿Iriima pikantakotanari netsiyatakotakagairira mantsiyari? ¿Pikowatzima piyotaiyeni jimpe ikanta retsiyatakotantaari?

¹⁰ Ari nonkamantaiyakemironi, onkantya riyotantyaari maawoini Israel-iite. Jirika shirampari atsipataiyakarini jaka, iri Jesucristo etsiyatakotakaakeriri, iitzitaitari Nazaret-satzi. Iriitake naakotakeri iwairo, irijatzi pikentakotakaantakeri eerokapaini. Iro kantzimaitacha rowañagairi Pawa.

¹¹ Jirika Jesús iri oshiyakawori mapi pimanintakeri eerokapaini, poshiyakowitzakari wetsikirori pankotsi. Iro kantacha ipiriintaitairo pankotsinampiki roshiyawo iroorikame tzinkamitsi.*

¹² Tekaatsi itsipa oshiyaarine Jesús rowawisaakotantzi. Tekaatsi aakotai iwairo jaka isaawiki kipatsi, apatziro ikantakaawo Jesús.”

¹³ Iyokitzii rowaitanakeri Pedro, eejatzi Juan, ikantaiyanakeni piyowentakariri: “Pamineri jirika, te riyotaaperoweetari, iro kantzimaitacha pinkathawaante rowaitziri. ¿Iriima yotaakeriri Jesús itsipatakarai pairani?”

* **4:11** Paminero Mt. 21.42; Ef. 2.20; 1 P. 2.6-8.

¹⁴ Irojatzi itsipatakari Pedro eejatzi Juan jirika atziri retsiyatakotakagairi. Te otzimi oita inkantakoteriri.

¹⁵ Romishitowakaantairi ipiyotaiyanira, ari risaikaiyanakeni irirori riñaanatawakagaiyani.

¹⁶ Ikantzi: “¿Tsikama ankanterika jirikapaini atziri? Maawoini Jerusalén-satzi riyotaiyakeni ritasonkawentantake. Eero amatairo amanakoteri.

¹⁷ Jame asariimatashtiyaari, iro ompoñaantyaari eero ryaatakaantawo inkenkithatakoteri Jesucristo, raakotapiintairi iwairo.”

¹⁸ Irojatzi ikaimantaariri eejatzi. Ikantaiyakerini: “Atapaake pikenkithatakakeri Jesús, eero papiitairo piyotaantayetai paakoyetairi iwairo.”

¹⁹ Iro kantacha rakanakeri Pedro eejatzi Juan, ikantanakeri: “¿Kameethatatsima nipiyyathatyaa Pawa, nonkemisantantemiri eerokapaini? Janjaatya pinkantena.

²⁰ Eero okanta nipakagairo nonkenkithatakoyetero okaatzira noñaawakeri, nokemajaantakeri eejatzi.”

²¹ Ikanta rasariimawaiwetakari jewaripaini, ripakagairi. Tema maawoini atziripaini ithaamentawentanakari Pawa iñaayetakero awisayetaintsiri, te otzimi oita rowasanke-tantyaariri.

²² Jirika atziri retsiyatakotakaayeetairi, tzimatsi rosarentsite awisaneentakero okaatz 40.

*Ramanaiyani kemisantzinkaripaini
rawentaashireperotantyaari eero ithaawantaiyani*

²³ Ikanta Pedro eejatzi Juan, ripakagaitairi, jatake ipiyotaiyani ikaataiyinira, ikamantakeri

okaatzi ikantakeriri reeware Imperatasorentsitaarewo eejatzi Itzinkampaini.

²⁴ Ikanta ikemaiyakeni, maawoini ramanaiyanakarini Pawa, ikantzi: “Pinkathariperorí, eerokatake wetsikakerori inkite, kipatsi, inkaare, eejatzi ikaatzi tzimantayetawori.

²⁵ Eerokatake kenkithatakaakeri pairani ponampire David-ni, ikantake:

¿Litaka riñaawaiwentaiyirini atziripaini?

¿Litaka ikenkithashiryaaawaitantakari?

²⁶ Piyotaiyakani pinkathariwentantatsiri jika kipatsiki,

Ipiyoyetaka jearipaini,

Inkoshekantyaariri Pinkathari, eejatzi riyoyaanewo Cristo.

²⁷ Rimatzimaitakawo Herodes eejatzi Poncio Pilato ipiyotaiyakani nampitsikika, eejatzi Israel-iite ipiyotaiyakani itsipatakari itsipasatzi atziripaini, ikoshekakari Jesús, pitasorentsite Pitomi, piyoyaanewo.

²⁸ Ari okantaka, rimatakero jirikapaini okaatzi pikenkithashiryaaakari tsika onkantya.

²⁹ Iroñaaka, Pinkatharí, paminero eeroka rasari-imatakena, pishinetainawo ponampireyetaina, eero nothaawawaitanta nonkamantantairo piñaane.

³⁰ Iro pishintsinka petsiyatakotaantyaariri mantsiyayetatsiri. Iro pitasonkawentakaantante-nari naakoteri iwairo Tasorentsi Pitomi Jesús.”

³¹ Ikanta ikaatakero ramanaiyani, ontziñaanaka janta tsika ipiyotaiyakani. Ikantakaakiperotanakari Tasorenkantsi ikenkithatakotanakero riñaane Pawa, tekaatsi inthaawakaanakya.

Okaatzi oshekitzimoyetziriri maawoini rashitaiyawoni

³² Shenitanake kemisantanaatsiri. Apaani okantanaa ikenkithashiretanaari. Te ishampitsitawakaiyaawoni oitarika, ipayetawakaawo okaatzi koityiimoyetariri.

³³ Jirikapaini Otyaantaperoriite eekero riyaatatzi ikenkithatakotziro tsika okanta rañaantaari Pinkathari Jesús. Antawoite ineshironkayetakeri Pawa maawoini.

³⁴ Te itzimawaitzi apaani koityaawaitatsine, itzimirika tzimatsiri iipatsite, ipanko, ipimantayetziro. Raakeri koriki,

³⁵ impakeri Otyaantaperoriite, iriitake antetaariri maawoini raantayetari apaanipaini oita ikowiri.

³⁶ Iro rimatakeri apaani Leví-ite iitaitziri José, Chipre-satzi rinatzi, irijatzi iitakeri Otyaantaperoriite, Bernabé. (Oshiyakaawentachari jiroka wairontsi Bernabé: “Otomi oimoshirenkaantsi”.)

³⁷ Jirika atziri tzimatsi iipatsite, ipimantakero. Raanakeri owinawo iipatsite, ipapaakeri Otyaan-taperoriite.

5

Ananías eejatzi Safira

¹ Iro kantacha eenitatsi itsipa atziri iita Ananías, itsipatakawo iina oita Safira, ipimantakero iipatsite.

² Jirika atziri raapatziyakawo iina, rimanagaantake owinawo iipatsite. Ramakeri tzimagaantapaintsiri, ipapaakeri Otyaantaperoriite.

³ Ikantawakeri Pedro: “Ananías, ¿iitaka pishinetantakariri Satanás inthaiyakayemi, iro pikowantanakari pamatawiteri Tasorenkantsi, pimangaantake owinawo piipatsite?”

⁴ “¿Kaarima eeroka ashiwetawo kipatsi? ¿Kaarima eeroka ashiwetari owinawo? ¿Litaka pikenkithashiryaantakawori pantero jiroka? Tera iri atziripaini pamatawite, Pawaga.”

⁵ Ikanta ikemawake Ananías, tyaanake, kamanake. Antawoite ithaawaiyanakeni ikaatzi kemayetaintsiri.

⁶ Ikanta mainaripaini, iponatapaakeri, raanakeri, ikitatakeri.

⁷ Tekera osamaniteeta, ari okyaapaake iina Ananías, te iyote iroori oita awisaintsiri. *

⁸ Rosampitawakero Pedro, ikantziro: “Pinkantena, ¿Arima ikaatzi owinawo?” Akanake iroori: “Jee, arimachee ikaatzi.”

⁹ Ikantziro Pedro: “¿Litaka paapatziyawakaantakari pikowi piñaantyaari Itasorenka Pinkathari? Piyaiyakani aanakeriri piime ikitatziri, iroñaaka rayitanakemi eeroka.”

¹⁰ Apathakero ityaanake Safira ikatziyakaga Pedro, kamanake. Ikanta ikyagaiyapaini mainaripaini, iñaapaatziiro kamake. Raanakero, itsipatagairo oime ikitatakaga irirori.

¹¹ Ikanta iñagaitakero awisaintsiri, antawoite ithaawaiyanakeni kemisantzinkaripaini, ari ikantzitanakari ejatzi kemakoyetakerori okaatzi awisaintsiri.

* ^{5:7} Kantakotachari jaka “tekera osamaniteeta”, iro ikantaitzitari ejatzi “3 horas”.

Osheki ritasonkawentantayeetake

¹² Eekero ryaatakaanakitziiro Otyaantaperoriite ipiyotapiintaiyanakani janta awisashetatakerera tasorentsipanko iitaitziro “Rashi Salomón”. Eekero ritasonkawentanakitzi osheki atziripaini.

¹³ Iwinkanewo rowayetanakeri itsipapaini, te ikowayetanai intsipatanaiyaari. Iro kantzimaitacha eenitatsi osheki thaamentaperowentanakariri.

¹⁴ Eekero ripokanakitzi osheki shirampari eejatzi tsinanepaini, shenitanake ikaatzi kemisan-tanairiri Pinkathari.

¹⁵ Ramakoyetapaakeri atziri imantsiyarite romaryaakoyetapaakeri ishitashiki tsika inkene-paake Pedro. Ikantayetzi: “Inkenapaakerika Pedro jaka, arika ritsimankantanakyaari eepichokini raampare, aritake retsiyatakotai.”

¹⁶ Ari ikantaiyapaakani atziripaini poñaayetainchari nampitsiki saikanampitzirori Jerusalén, ramayetake osheki mantsiyaripaini eejatzi osheki raagayetziri peyari, retsiyatakota-kaayetawakeri maawoini.

Ikisaneentaitanakeri Pedro eejatzi Juan

¹⁷ Ikanta Imperatasorentsiperori, itsipatakari ikaatzi aapatziyakariri, jirikapaini Sadoc-iiite, ik-isaneentaiyanakani.

¹⁸ Raakaantakeri Otyaantaperoriite, romonkyakaantakeri.

¹⁹ Okanta otsireniwetanaka, pokake imaninkarite Pinkathari, rashitaryaakotairi, romishitowayetairi, ikantawairi:

²⁰ “Piyaate tasorentsipankoki, pinkenkithatako-tainiri atziripaini tsika okantakota owakerari añaamentotsi.”

²¹ Okanta okiteeshetamanai, areetaiyapaakani tasorentsipankoki, retapaakawo ikenkithatakaantapaake. Te riyotaatsikaitzi Imperatasorentsiperori, piyotaiyachani itsipayetakari raapatziyanewo, eejatzi maawoini Itzinkampaini Israel-iite. Irojatzi rotyaantantakari ramaiteri Otyaantaperoriite romonkyakaantaweeetakari.

²² Ikanta riyaatashiweetanakari romonkyakaantane, te iñaapairi. Piyapaaka,

²³ ikantapaakeri: “Te añaagairi. Irojatzi okanta noñaawetapaakawo ashita kameethaini, irojatzi ikatziyayeweta kempoyiiriri. Ikanta nashitaryaakowetapaakari, te noñaapairi.”

²⁴ Ikanta ikemawake Imperatasorentsiperori, eejatzi reeware kempoyiirori tasorentsipanko, eejatzi reeware Imperatasorentsitaarewo, rosampitawakagaiyanakani oitarika awisatsine.

²⁵ Areetapaaka kamantapaakeriri: “Jirikapaini pomonkyakaantawetakari, risaikaiyini tasorentsipankoki ikenkithatakaayetziri atziripaini.”

²⁶ Irojatzi riyaatantanakari reeware kempoyaantanelipaini, raanake osheki ratzirite, ramairi eejatzi. Iro kantacha te rakotashiwaitziri. Tema ithaawakaatyaaari atziripaini rishemyaantyaari mapi.

²⁷ Ikanta rareetakaapaakari, rowawisaapaakeri tsika ipiyotaiyakani jewaripaini. Ikanta Imperatasorentsiperori rosampitawakeri,

²⁸ ikantziri: “¿Tema pikemi nokantzi chapinki: ‘Atapaake pikenkithatakotakeri Jesúš?’ Eekero piyotaatziri maawoini Jerusalén-satzi. Pikantako-takena eejatzi naaka, pikantzi: ‘Iri owamaakaantakeri Jesúš.’ ”

²⁹ Ari rakanake Pedro eejatzi itsipapaini Otyaantaperoriite, ikantanake: “Iriira Pawa nonkemisantaperote, eero nokemisantawaitashitari atziripaini.

³⁰ Tema imapero powamaakaantakeri eeroka Jesúš, pilkentakotakaantakeri. Iro kantacha rowañagairi Pawa, ikemisantakeri pairani acharineni.

³¹ Rowenonkairi Pawa, roisaikairi rakoperoki, itsipataari ipinkathariwentantzi. Iri owawisaakotaine eejatzi. Ikowake apiyashireyetai maawoini aakapaini Israel-iite, ompoñaantyaari impeyakotantairori akaariperoshirewetakaga.

³² Naaka ñakero okaatzi rantayetakeri Jesúš, ontzimatye nonkenkithatakotero. Irijatzi Tasorenkantsi matakainawone, tema iriitake rotyaantakenari Pawa risaikashiretantaina naakapaini nokemisantairira.”

³³ Ikanta ikemaiyakeni, antawoite ikisanaka, ikowanake ritsitokerime.

³⁴ Iro kantacha ari ikatziyanaka apaani, jitachari Gamaliel. Fariseo rinatzi irirori, irijatzi yotaantzirori Inintakaantaitanewo. Pinkatha rowiri maawoini atziri. Ikantanake: “Asheninká, jametya omishitowawakeri eepichokiini jirikapaini.”

³⁵ Irojatzi ikantantanakari: “¡Shiramparipaini! ¡Israel-iite! Ontzimatye pinkenkithashiryawakya

kameetha tsikarika pinkanteri jirika atziripaini.

³⁶ Pinkenkitashiryakoteri jitachari Teudas, ishamewaitake irirori. Ipiyotake pairani 400 atziri. Iri kantzimaitacha ritsitokaitakeri Teudas, rithonka ripookayetanake maawoini tsipayewetakariri, ari ipeyari.

³⁷ Ari okantzitakari pairani rosankenatakotan-tari maawoini atziri, itzimaweta itsipa jitachari Judas, Galilea-satzi rinatzi. Ipiyotake atziri. Iro kantacha rowamagaitakeri irirori. Irojatzi ripookantanakari maawoini tsipayewetakariri, ari ipeyari.

³⁸ Pinkeme nonkantemi naaka: Eero pikoshekari jirika, pinkempoy-aaminthatashityaari. Iriirika antashiwaitawo inintakaanekiini, apanirowa impeyashitaiya, roshiyakotaari apitetaintsiri nokenkithatakotakeri.

³⁹ Iri kantzimaitacha, iriirika Pawa matakaayetziriri okaatzi rantayetziri, eerowa pimatzziri eerokapaini poitsinampairi. Paamaawentya pikoshekakari Pawa.”

⁴⁰ Inimotanakeri maawoini kemaintsiri. Ikaimairi eejatzi Otyaataperoriite, ri-pasataktakeri, ikantakeri: “Ataama pikenkithatakotziri Jesús.” Ripakagairi.

⁴¹ Irojatzi rishitowaiyantanaarini Otyaataperoriite ipiyowentaitakari. Thaamenta ikantaiyanakan, ikantaiyini: “Piñaakero, roshiyakagaitakai iriiperome anatye, rowasankewentaitakairi Jesús, aakotairira iwairo.”

⁴² Ari ikantapiintanakitya riyotaantzi

maawoini kiteesheriki, ikenkithatakaantzi tasorentsipankoki, ikantzi: “Cristo rinatzi jirikaganki Jesús.” Ari ikantayetakero eejatzi janta pankotsipainiki.

6

Raminaitake 7 amitakotantaneri

¹ Ikanta isheniperotanake riyotaanewo, ikenkithawaiyetanake Grecia-weri, ikantzi: “Paminerri rantapiintakeri Heber-thato, ipapiintayetziro owanawontsi kinankawo, ramaakiyetzimaitawo kaari isheninkayeta iriroripaini.”

² Ikanta Otyaantaperoriite kaatatsiri 12, ipiyotakeri maawoini riyotaanewo, ikantakeri: “Te onkameethate nipakairo nonkenkithatakotanairi Pawa, nompantapiintemiri poyaari.

³ Iyekiite ontzimatye pamine akaataiyinira, inkaate 7 atziri, iriitake aminakaantapiinterone jiroka. Piyyoyee kameethashiretzimotakemiri, eenitatsi riyorenka, risaikashireperotantari Tasorenkantsi.

⁴ Iro ompoñaantyaari nonkamaitantyaawori naakapaini namanayetya, nonkenkithatakante, niyotaantayete eejatzi.”

⁵ Ikanta maawoini piyotainchari, ini-motanakeri okaatzi ikantakeriri. Ari riyoya-gaitakeri Esteban, awentaariri kameethaini Pawa, risaikashireperotantari Tasorenkantsi. Riyoyagaitakeri eejatzi Felipe, Prócoro, Nicanor, Timón, Parmenas, ipoñaapaaka Nicolás Antioquíasatzi, oshiyakotaariri Judá-ite, tema kaari isheninka Judá-ite pairani.

⁶ Irojatzi ragaitantanakariri jirika 7 risaikira Otyaantaperoriite, ari ramanakotawakari, ritasonkawentayetakeri rotzimikapatziiyetantakari rako.

⁷ Eekero iyaatakotanakitzi riñaane Pawa. Eekero isheniperotanakitzi riyotaanewo Jerusalén-ki. Rimatzitanakawo ikemisan-tayetanake osheki Imperatasorentsitaarewo.

Raakaantaitakariri Esteban

⁸ Ikanta Esteban osheki ritasonkawentantake atziripainiki, tema Pawa neshironkatakeri, ipakeri ishindsighta.

⁹ Iro kantzimaitacha, eenitatsi Judáite ikaatzi piyotapiintachari jitayetachari “Rimperaweeetari”. Iri poñaayetainchari Cirene-ki, Alejandría-ki, Cilicia-ki eejatzi Asia-ki. Riñaanaminthatanakeri Esteban.

¹⁰ Iro kantzimaitacha te roitsinampairi, tema imaperotatya Esteban riyotanetakaakeri Tasorenkantsi.

¹¹ Iro ikamantantakariri rimananekiini isheninka, ikantziri: “Pinthaiyakotyaari Esteban. Pinkante: ‘Nokemakeri Esteban rithainkimawaitziri Moisés-ni, eejatzi ikantzitari Pawa.’”

¹² Iro owatsimaanakeriri atziripaini ikisaneentanakeri Esteban, rimatzitanakari Itzinkamipaini, eejatzi Yotzinkariite. Raakaantaitakeri, raayeetanakeri ipiyotaiyanira jewaripaini.

¹³ Ari ramaitapaakeri thaiyakotakariri Esteban, ikantapaake: “Jirika atziri osheki rithainkakero tasorentsipanko, rithainkakero Inintakaantaitanewo eejatzi.

¹⁴ Nokemakeri ikantake: ‘Ari intzimpookakero tasorentsipango Jesús, iitaitziri Nazaret-satzi. Rowashiñaayetairo eejatzi ameyetari aakapaini riyotaayetairi pairani Moisés-ni.’”

¹⁵ Ikanta jewaripaini piyotainchari, ikempoy-aanakeri Esteban, iñaatzíri ipooki roshiyankari maninkari.

7

Roipiyankeniru ñaantsi Esteban irojatzi ritsitokantaitakariri

¹ Ikanta Imperatasorentsiperori rosampitakeri Esteban, ikantziri: “¿Imaperoma ikantakoitzimiri?”

² Ari rakanake irirori, ikantzi: “¡Iyekiite! ¡Ashitaanitachari! Pinkeme nonkantemi. Pairani risaikantawetakari acharine Abraham-ni janta Mesopotamia-ki, roñaagakari owaneenkatachari Pawa, tekera riyaatanakeeta inampityaawo Harán-ki.

³ Ikantakeri: ‘Pookanairo pinampi, pookanairi pisheninkapaini, piyaate otsipaki kipatsi noñaagakemiri naaka.’

⁴ Ikanta Abraham-ni, rookanairo inampi jitachari Caldea. Irojatzi ripokantaari inampitaawo Harán-ki. Ikanta ikamai ipaapate, irojatzi rotyaantantakariri Pawa jaka, tsika anampitawo iroñaaka aakapaini.

⁵ Iro kantzimaitacha, te rashitakaaperotari, tekaachaajaini rashitakayaariri eepichokiini. Ikashaakaakeri imperi paata, arika inkamake. Iri ashitaiyaawone inkaate charinetaiyyarine. Irootake ikantakeriri okantawetaka Abraham-ni te itzimi rowaiyaneni.

6 Iro kantacha ikantakeri eejatzi: ‘Iñeero pincharineyetyaari inampityaawo iipatsiteki itsipa atziri. Onkaate 400 osarentsi inkemaatsiwaitya rimperawaitaityaari janta.

7 Ari nowasanketairi naaka inkaate imperawaitakyaarine. Iriima pincharineyetyaari namairi maawoini jaka nampitsiki, ari rantawaitainari naaka.’

8 Irojatzi ikantantakariri Pawa eejatzi pairani Abraham-ni: ‘Ontzimatye pitomeshaanitya, tema tzimatsi aapatziyawakayaari.’ Rimatakeri pairani Abraham-ni. Rimatakeri eejatzi itomi irirori, rimaakotapaakera 8 kiteesheri, ritomeshaanitakeri. Rimatakero Isaac itzimake pairani Jacob-ni. Rimatakeri eejatzi Jacob-ni 12 itomipaini, acharineyetenakari aakapaini.

9 Ikanta jirikapaini, acharineyetaari aakapaini, ikisaneentakeri irirentzi José, ipimantakeri. Irojatzi rareetantakari inampiki Egipto-satzi. Iri kantacha, ari itsipatapiintakari Pawa,

10 rowawisaakotairi okaatzi ikemaatsiwaiwetaka. Ipakeri yorenkantsi, irootake raakameethatantakariri iwinkatharite Egipto-satzi jitachari Faraón. Irojatzi ipinkathariwentantakariri irirori maawoini Egipto-satzi, eejatzi maawoini isheninkapaini Faraón.

11 Irojatzi areetantakari antawo tashetsi janta. Osheki ikoityaaneeentaiyakeni Egipto-satzi. Ari okantakari eejatzi inampiki Canaán-satzi. Te iñiilo pairani acharineni oitarika rowayetaiyaari.

12 Ari ikemakeri Jacob eenitatsi owanawontsi janta Egipto-ki. Rotyaantakeri itomipaini ra-

manantakite. *

¹³ Ikanta rapiitakero riyataiayini, ari riyotaka-gaari José irirentzipaini. Irojatzi riyotantakariri Faraón isheninkapaini José.

¹⁴ Ikanta José, ikaimakaantairi ipaapate Jacob, eejatzi maawoini isheninka, aamaaka ikaatzi 75 atziri jataintsiri Egipto-ki.

¹⁵ Irojatzi rareetantakari Jacob Egipto-ki. Ari ikamairi irirori janta. Ari ikantakari eejatzi ikaatzi acharineyetanakari.

¹⁶ Irojatzi raatonkiyeetantanaariri, ikitaitapairi Siquem-ki ramanantakeri pairani Abraham-ni, rashì naaweta itomipaini Hamor.

¹⁷ Okanta imonkaatzimataka okaatzi ikantakeriri pairani Pawa acharine Abraham-ni. Tzimanake osheki reentsite asheninkapaini janta Egipto-ki,

¹⁸ irojatzi itzimantakari itsipa pinkathari janta Egipto-ki, kaari yotakotziriri José.

¹⁹ Ikanta jirika pinkathari, osheki ramataw-itakeri asheninka, rowashironkaawaitakeri. Ishintseentakeri rookayeteri reenchaanikite, inkamantyaari, eero ishenitanta.

²⁰ Aripaite itzimakeri Moisés irirori. Iriitake jirika eentsi kameethatzimotakeriri Pawa. Ikaatzi mawa kashiri rimanawetakari ipankoki ashitariri.

²¹ Okanta imonkaapaitetapaaka rookanawentantyaariri inkameme, oñaakeri rishinto Faraón, aakeri, opiraanikitakari, oshiyakaanakeri iriime owaiyane iroori.

* ^{7:12} Kantakotachari jika “owanawontsi”, irootake ikantaitziri “trigo”.

22 Ari ikantakari Moisés-ni riyotantakawori okaatzi riyorenkatari Egipto-satzi. Iriiperori atziri rinake, iroopero okantayetaka rantayetakeri.

23 Ikanta otzimake 40 rosarentsite Moisés-ni, ikowake rareetyaari isheninkapaini, Israel-iite.

24 Ikanta iñaapaakeri Egipto-satzi rowasanketziri isheninka. Ikisawentapaakari Moisés isheninka, ritsitokakeri Egipto-satzi.

25 Roshiyakaatzi Moisés-ni ari inkenkithashiryagaiyakaani isheninkapaini, iriitake rotyaantakeri Pawa rookaawiritaantairi. Iri kantzimaitacha jirikapaini te riyotaiyirini.

26 Okanta okiteeshetamanai, iñaatzi rantawakaiyani isheninka. Ikowawetaka Moisés rookakairime, ikantawetapaakari: ‘Eero powashironkaawakaiyani pantawakaa, pisheninka powawakaiyani.’

27 Ikanta jirika antziriri isheninka, rotatsinkawakeri Moisés. Ikantziri: ‘¿Itaka kantakemiri eeroka nowinkatharite? ¿Pikowatzima eeroka piyakowentena?’

28 ¿Pikowatzima pitsitokena naaka pikemetaakerira chapinki Egipto-satzi?’

29 Ikanta ikemawake Moisés ikantakeriri isheninka, shiyanaka. Jatake iipatsiteki Madián-satzi. Ari risaikakeri janta nampitsinentsiki, irojatzi itzimantakari apite itomi.

30 Okanta awisake okaatzi 40 osarentsi. Janta ochempiki, okaakitapai otzishi jitachari Sinaí, ari roñaagakari imaninkarite Pawa, ipaampatakairo kitcheemaishi.

³¹ Riyokitziiwentanakero Moisés iñaakerowa. Ikowaminthaitzi raminero okaakiini, ari ikemakeri Pinkathari riñaanatziri, ikantziri:

³² ‘Pawa ninatzi naaka, naakatake ipinkathatziri picharine, Abraham, Isaac, eejatzi Jacob.’ Ari ithawanakeri Moisés, okawaitanaka, te ikowi raminanairo.

³³ Irojatzi ikantantanakariri eejatzi: ‘Pizapato-reeya, tema pikatziyantatyawo iroñaaka kipatsi notasorentsipathatakaakeri.

³⁴ Noñaakeri janta Egipto-ki niyoyaakeri pisheninkapaini, osheki rashironkaawaitaka. Nokemakeri ratekawaitaiyini. Irootake nipokantakari nookaawiritaantairi. Eerokaga notyaante Egipto-ki pantero.’

³⁵ Tema pairani imanintaweeetakari Moisés-ni, ikantaitakeri: ‘¿Litaka nintakaakemirori eeroka nowinkatharite?’ Tema iriitajaantake rotyaantakeri Pawa impinkathariwentairi isheninkapaini, iri jokaawiritaantairine eejatzi. Iriitakera matakaakeriri imaninkarite Pawa iñaakeri pairani ipaampatakairo kitcheemaishi.

³⁶ Irijatzi Moisés-ni omishitowairiri pairani asheninkapaini Egipto-ki, osheki ritasonkawentantake janta. Ari ikantakero eejatzi janta inkaareki iitatziri ‘Kityonkaari’, eejatzi ikantakero risaikawaitantakari ochempiki okaatzi 40 osarentsi.

³⁷ Irijatzi Moisés-ni kantakeriri pairani asheninkapaini: ‘Ari rotyaantake paata Pawa itsipa Kamantantaneri, ari roshiyakotapaake-nawo naaka rotyaantakena. Asheninka rinatyey.’

³⁸ Irijatzi Moisés-ni piyotakeriri pairani

asheninkapaini janta ochempiki, ikenkithawaitakaakeri maninkari janta otzishiki Sinaí, itsipayetakari asheninkapaini. Iriitake aajaantakerori owañaantatsiri ñaantsi, irojatzi rowawisaantakairori aakapaini.

³⁹ Iro kantacha te ikowi acharineni inkemisanteri Moisés-ni, osheki ripiyathatakari. Ikowaiyakeni ripiyaime inampiki Egipto-satzi.

⁴⁰ Ikantakeri Aarón-ni: ‘Iriiwetaka Moisés jokaawiritaantaanari Egipto-ki. Iro kantacha te ayote oita awishimotakeriri kaari ripokanta ryaatzi chapinki otzishiki Sinaí. Piwetsikena nowawanetaiyyaari.’

⁴¹ Ari riwetsikaitakeniri oshiyawetariri ewonkeri waaka. Ikowaiyakeni roshiyakairi Pawa. Rowamaakeniri ipirapaini roimoshirenkantyaariri iwawane. Iriiwetaiyyakani wetsikakeriri.

⁴² Irootake, rintainaryAAPITHATANTANAKARIRI Pawa jirikapaini, rishinetanakeri impinkathayetairi oorentayetachari inkiteki, tema iriitake rosankenatakotzitakari Kamantantaneriïte, ikantake:

¡Israel-iite! ¿Naakama pipinkathatantaka pipirapaini pitaapiintzirira?

Tema iro pantapiintakeri okaatzi 40 osarentsi janta ochempiki.

⁴³ Iri Moloc pipinkathatapiintashitakari, pikenakenatakapiaintakero ipankoshetaitarí.

Ari pikantapiintakeri iwawanetashiitari oshiyariri impokiro iitaitziri Renfán, Pipinkathatashiwaitakari piwetsikayetanewo eerokapaini.

Irootake nishinetantemiri ragaitemi intaina panaanakero Babilonia.

⁴⁴ Risaikawaitantakari pairani acharineeteni ochempiki, otzimimotziri tasorentsithaante. Ari rowakoyetzirori rosankenare Moisés-ni. Jiroka tasorentsithaante, irootakera riwetsikakaantakeri kameethaini Moisés-ni okaatzira roñaagakeriri Pawa.

⁴⁵ Iroowa ikenakenatakapaintakeri pairani acharineeteni, irojatzi rareetantakari kipatsiki rashitakaitariri. Iro ramayetairi reewatantakariri Josué, roitsinampaantakariri ashiwetawori iipatsite, ikantakaari Pawa. Ari ikantaitatziro roisokerotakawo tasorentsithaante, irojatzi itzimantakari pairani pinkathari David-ni.

⁴⁶ Ikanta pinkathari David, osheki raakameethatakeri Pawa, ikantake irirori: ‘Tema eeroka Pawa ipinkathatake pairani Jacob-ni, pishinetena naaka niwetsikemi pankotsi pisaikantyaari.’

⁴⁷ Iri kantacha Salomón, iriira wetsikaperotakerori tasorentispango.

⁴⁸ Iri kantzimaitacha Pawa Jenokisatzi, te inampitantawo pankotsi riwetsikanewoki atziri. Iro ikenkithatakotakeri Kamantantaneri, ikantake:

⁴⁹ Jiroka ikantake Pawa:

Iro inkite nisaikantari nopinkathariwentantzi.

Iroowa kipatsi nimakoryaayitzitantari.

¿Tsika onkaateka pankotsi riwetsikaitenari?

Eero niyomaatawo nimakoryaantyaawo.

⁵⁰ ¿Tema naaka wetsikayetakerori maawoini tzi-mayetatsiri?

⁵¹ Eeke riñaaawaitanakitzi Esteban, ikantzi: ‘Iro kantacha eerokapaini, ari pikantapiintatya pik-isoshiretzi, te pikemisantanetzi, poshiyakari itsipasatzti atziri kaari asheninkata. Pashi powapiintziro pipiyathatakari Tasorenkantsi poshiyako-taari picharineni.’

⁵² ¿Eenitatsima Kamantantaneri kaari inkemaatsitakaya pairani picharineni? Rowamaayetzira ikaatzi kenkithataintsiri, ikantake: ‘Awotsikitake matzirori itampatzikashiretzi.’ Tema pokake iroñaaka matzirori, iriira pipithokashitaiyakarini eerokapaini, pitsitokakeri.

⁵³ Tema eerokatake yowetawori Inintakaantaitanewo riyotaawetakairi maninkari, iro kantacha osheki pipiyathatata.”

⁵⁴ Ikanta ikemaiyawakeni piyotainchari, antawo ikisanakeri Esteban, ratsikaikitashitanakari.

⁵⁵ Iriima Esteban risaikaperotantanakari Tasorenkantsi, raminanake inkiteki, iñaakero rowaneenkawo Pawa, iñaakeri eejatzi Jesús ikatziya rakoperoki Pawa.

⁵⁶ Ikaimanake, ikantanake: “¡Pamine! Noñaakero inkite ashitaryaanaka, noñaakeri Itomi Atziri ikatziyaka rakoperoki Pawa.”

⁵⁷ Ari rotzimikayempitantanakari jirikapaini. Ikaimaiyanakeni shintsiini, rishiyashitapaakari Esteban. Rotaiyapaakeri.

⁵⁸ Irojatzi ragaitantanakariri okaathapitzira nampitsi. Ari retapaakari rishemyaantari mapi, raatonkoryaanaka, rookanakeniri iithaare mainari jitachari Saulo, ikantakeri: “Potaiyawakenawo noithaare, nishemyaawakeriita.”

59 Ikanta rishemyagaitzirira Esteban, ramananakari irirori Pawa, ikantziri: “Nowinkatharite Jesús, jatashiretaana noñaapaimi.”

60 Ari rotziwerowanakari, riñaawaitanake shintsiini, ikantanake: “Nowinkatharite, eero poipiyiniri jiroka kaariperotaantsi.” Ikaatakerowa riñaawaitzi, peyanaka.

8

Royaakyaaminthatziri Saulo kemisantzinkari-paini

1 Ikanta Saulo ipampoyaakowentakeri Esteban ritsitokaitziri, ikantanake irirori: “Ariwé, kamake Esteban.” Aripaite etanakawo royaakyaaminthaitziri kemisantzinkaripaini Jerusalén-ki. Irootake rishiyayetantanakari maawoini Judea-ki, ikenayetanake eejatzi nampitsiki Samaria. Irojatzimaita risaikanake Otyaantaperoriite.

2 Ikanta pinkathatasorentsitaneripaini ikitatakeri Esteban, antawoite riraakowaitakari.

3 Iriima Saulo ikowawetaka irirori rithonkerime kemisantanaatsiri. Riyaatashitapiintakeri ipankoki, inoshikayetziri atziri, tsinanepaini, maawoini. Romonkyakaantayetakeri.

Ikenkithaitziro Kameethari Ņaantsi nampitsiki Samaria

4 Ikanta maawoini shiyayetanainchari, jatayetanake otsipaki nampitsi. Ikenkithatakoyetakero Kameethari Ņaantsi.

5 Ikanta Felipe, iriitake itsipa shiyanainchari eejatzi, areetaka nampitsiki Samaria. Ikenkithatakotapaakeri Cristo.

6 Ari ipiyotaiyanakaní maawoini atziripaini, rowayempitatakawo ikenkithatziri Felipe, tema iñaayetakero ritasonkawentantapaake.

7 Retsiyatakotakaayetai osheki atziri raagawetari peyari. Antawo ikaimayetzi peyari rishiyayetaga. Eejatzi ikantakeri, osheki atziri kisopookiwetachari, kaari kameethawetachane iitzi, retsiyatatakotakaayetairi maawoini.

8 Irootake ikimoshiretantakari maawoini nampitawori janta nampitsiki.

9 Iro kantacha tzimatsi janta jitachari Simón. Sheripiyari rinaweta pairani. Ramatawitake osheki atziri nampitachari Samaria-ki. Osheki ishamewaitake.

10 Ipinkathawetari atziripaini, jewaripaini, maawoini, ikantayetzi: “Jame ankemisanteri, jirika Simón rimatakero iñaawyaatari Pawa.”

11 Ikemisantaitziri Simón maawoini ikantayetziri. Osheki osarentsi riyokitziiwentaitakeri eeni isheripiyariwetaga.

12 Iri kantacha rareetapaaka Felipe, ikenkithatakotapaakero Kameethari ũnaantsi kenkithatakotziriri Jesucristo, kenkithatakotziri eejatzi Pawa tsika inkantaiya impinkathariwentantai. Romitsissiyaayetanaka shiramparipaini, eejatzi tsinane-paini.

13 Rimatzitanakawo eejatzi Simón irirori, ikemisantawetanaa, omitsitsiyaawetaka eejatzi. Kisokero rowanakeri Felipe itsipatari, iñaakeri ritasonkawentantayetzi. Iyokitzii

ikantawentanakari.

¹⁴ Ikanta Otyaantaperoriite saikatsiri Jerusalén-ki, ikemakotakeri Samaria-satzi ikemisantayetairo riñaane Pawa. Irootake rotyaantantakariri Pedro eejatzi Juan.

¹⁵ Ikanta rareetaiyakani Samaria-ki, ramanako-tapaakari kemisantzinkaripaini, ompoñaantyaari risaikashiretantlyaariri Tasorenkantsi.

¹⁶ Tema apatziro romitsitsiyaayeetakeri raakotakeri iwairo Awinkatharite Jesús. Tekeramaita risaikashiretantlyaarita iriroripaini Tasorenkantsi.

¹⁷ Ikanta Pedro eejatzi Juan, rotzimikapatziitoyetantakari rako apaanipaini. Risaikashireyetantanakari Tasorenkantsi.

¹⁸ Ikanta iñaakeri Simón rantakeri Otyaantaperoriite, ikaatzi rotzimikapatziitotantakari rako atziri, risaikashiretantaari Tasorenkantsi, ripinawetanakari irirori Otyaantaperoriite,

¹⁹ ikantanakeri: “Jirika koriki, pimpena eejatzi naaka pishintsinka, noshiyakotantemirori eeroka, ompoñaantyaari nisaikashiretakaantyaariri Tasorenkantsi nosheninka, notzimikapatziitotantyaari nako.”

²⁰ Ari rakanakeri Pedro, ikantziri: “¡Ari pinkaatzimaitaiyaari piyorikite pimpeyashitaiya! ¿Poshiyakaatzi ari pamanantantakyaawo piyorikite ipashitantziri Pawa?

²¹ Eero pimataatsikaitziro poshiyakotenawo naaka, tema iñaakemi Pawa te pitampatzikashiretzi.

²² Pipakagairo piyariperonka, pinkowakotairi Pawa, añaamatsite ari impeyakotaimiro

pikenkithashiryaawetakari.

²³ Niyotakemi naaka, osheki pikisashirewaitaka. Ari pikantapiintatya pikaariperoshirewaitzi.”

²⁴ Irojatzi rakantanakari Simón, ikantanake: “Pamanakotaina eeroka Pinkathariki, ompoñaantyaari eero awishimotantana okaatzi pikantakenari.”

²⁵ Ikanta Pedro eejatzi Juan, ikaatakerokerenkithatakotakeri Pawa. Irojatzi ikenayetantanakari otsipaki nampitsi okaatzi saikatsiri janta Samaria-ki, ikenkithatakero janta Kameethari Ñaantsi. Ari ripiyaiyaani Jerusalén-ki.

Felipe eejatzi Etiopía-satzi

²⁶ Ikanta imaninkarite Pawa, riñaanatakeri Felipe, ikantziri: “Piyaate nampitsiki jitachari Gaza, iro pimpampithatanake awotsi poñaachari Jerusalén-ki irojatzi janta.” Tema jiroka awotsi irootake awisatsiri ochempiki.

²⁷ Jatake Felipe. Okanta niyanki awotsi, ritonkyotakari Etiopía-satzi. Iriiperori rinatzi. Iriitake kempoyiiriri koriki janta Etiopíaki opinkathariwentantzira tsinane jitachari Candace. Ipoñagaawo irirori Jerusalén-ki iñaapinkathatzirira Pawa. *

²⁸ Iro ryaatairo irirori inampiki, risaikantakawo ranashitakomento, riñaanatziro rosankenare Kamantantaneri Isaías-ni.

* ^{8:27} Kantakotachari jaka “Iriiperori rinatzi”, Nowikyaanikiri rinatzi. Tema iro rametaiyarini pairani ikaatzi saikapankoyetziriri pinkathari, inowikyaanikiyeetziri, onkene eero rowaiyakaantanta ipankoki pinkathari.

²⁹ Riñaanashiretanakeri Tasorenkantsi Felipe, ikantziri: “Piyaatashiteri shiyakotainchari.”

³⁰ Ikanta ryaatashitanakeri Felipe, ikematziiri Etiopía-satzi riñaanatziro rosankenare Isaías-ni. Ari ikantziri: “¿Pikemathatakeri piñaanatziri?”

³¹ Ari ikantzi Etiopía-satzi: “¿Tsika onkene nonkemathatero, tekaatsi yotainawone? Pipoke eeroka, pintsipatena.”

³² Jiroka okantzi Osankenarentsi riñaanatziri: Roshiyakagaitakeri ragaitziri oweja ritsitokaiteri. Roshiyakari oweja te ikaimawaitzi rameetaitziri, Ari ikantakari ejaztzi irirori, maire ikantaka.

³³ Tsinampashireri ikantakagaitakari, te otam-patzikatzi okaatzi ikantakoweetakariri.

Ari rowamagaitakeri, temaita itzimi rowaiyane irirori.

³⁴ Ikanta jirika iriiperori Etiopía-satzi, rosampitanakeri Felipe: “Pinkantena. ¿Litaka ikenkithatakotziri Kamantantaneri? ¿Irijatzima kenkithatakotacha? ¿Itsipama ikenkithatakotziri?”

³⁵ Ari retanakawo Felipe ikenkithatakanakeniri rosankenareki Isaías-ni, ikenkithatakotanakeniri Kameethari Ñaantsi kenkithatakotziriri Jesús.

³⁶ Okanta osamaniityaake, ikenaitapaakero ñaa, ikantzi Etiopía-satzi: “Jiroka ñaa. ¿Eeroma okanta nomitsitsiyaatya naaka?”

³⁷ Rakanakeri Felipe, ikantziri: “Pikemisantaper-otanairika, ari onkantake.” Ikantzi Etiopía-satzi: “Nokemisantzi, iriitake Jesucristo Itomi Pawa.”

³⁸ Ari rowaatzinkakotapaake rishiyakomento Etiopía-satzi. Ayiitanake apitepaina, jatanake ñaaki. Ari romitsitsiyaatakarari.

39 Ikanta ritonkaanai ñaaki, raanairi Felipe Tasorenkantsi. Jirika iriiperori Etiopía-satzi, te iñaanairi jimpe ikenanake. Iro kantacha jirika atziri kimoshire ikanta ryaatai irirori.

40 Iriima Felipe iñaashitaawo irirori risaikapai Azoto-ki. Irojatzi rawisantanakari otsipaki nampitsi ikamantantayetziro Kameethari Ñaantsi, irojatzi rareetantaari Cesarea-ki.

9

Pashinishiretai Saulo (Hch. 22.6-16; 26.12-18)

1 Ikanta irirori Saulo, te ripakairo rasariimayetari rowamayeri riyotaanewo Pinkathari. Irootake ryaatashitantakariri Imperatasorentsiperori Judá-ite,

2 ikantakeri: “Posankenateniri Imperatasorentsitaarewo saikatsiri nampitsiki Damasco, pinkanteri: ‘Pishineteri Saulo raayeteri aapatziyanaariri iitaitziri “Awotsiweri”. Inkyaayete ipiyotaitapiintaga, roosoyeteri atziri eejatzi tsinanepaini, ramakeri jaka Jerusalén-ki.’”

3 Iro rareetzimataka nampitsiki Damasco, ari romapokakeri morekanaintsiri inkiteki, roorentapaakeri ikatziyakaga Saulo.

4 Tyaanake Saulo. Ikematzi ñaantsi inkiteki, ikantaitziri: “¡Saulo! ¡Saulo! ¿Oitaka poyaakyaaminthatantanari?”

5 Rakanake Saulo, ikantzi: “¿Piitaka eeroka Pinkathari?” Ari ikantaitanakeri: “Naakatake Jesús poyaakyaaminthatakeri. Eerokatakera

owasankewaitacha apaniroini, oshiyawaitakawo
pipaikayitzitatyeeyaawome thoyempithowari.”

⁶ Ikanta Saulo, okawaitanaka ithaawanake,
ikantanake: “Pinkathari, iita pikowiri nantairi
naaka.” Ari ikantanakeri Awinkatharite: “Pim-
puriintanai, piyaate nampitsiki. Ari inkaman-
taitemiro oita panteri.”

⁷ Osheki ithaawanake ikaatzi oyaatakeriri
Saulo, tema ikemawakero eejatzi irirori ñaantsi,
te iñiimaitari kenkithawaitatsiri.

⁸ Irojatzi ikatziyantawetanaari Saulo.
Ikowaweta rokiryaaanaime, te onkantya
raminanai. Irootake rakathatantanaariri
itsipayetakari, raanakeri nampitsiki Damasco.

⁹ Ari risaikeri janta okaatzi mawa kiteesheri, te
okanta raminawaitai, te rowaiya, te rirai eejatzi
imere.

¹⁰ Okanta janta Damasco-ki, ari risaiki
yotaarewo iita Ananías. Iriitake riñaanatakeri
Awinkatharite rimishireki, ikantziri: “¡Ananías!”
Ari rakanakeri irirori: “¿Litaka, Pinkathari? Jaka
nisaiki.”

¹¹ Ikantziri: “Piyaate awotsiki iitaitziri ‘Tampatzikari’. Ari isaiki ipanko jitachari Judas,
ari posampikowenteri atziri jitachari Saulo, iri
poñaachari nampitsiki Tarso. Ari risaikiri irirori
ramanawaita.

¹² Nomishimpyaakeri irirori. Iñaakemi
pikyaashitapaakeri, potzimikapatziitontakari
pako, irojatzi raminawaitantanaari.”

¹³ Ikanta ikemawake Ananías, ikantanake:
“Pinkathari, osheki nokemi ikenkithatakooitziri
jirika atziri, koweenka okanta rantayetakeri

Jerusalén-ki rowasankeyetziri pikiteshire-takaanewo.”

¹⁴ “Iro ripokantari iroñiaaka jaka, tema rotyaan-tatziiri Imperatasorentsiperori raayeteri aakotz-imiri piwairo rawentaanaimi.”

¹⁵ Ikantzi Pinkathari: “Piyaate. Tema jirika atziri iriitake niyoyaakeri naaka inkenkithatako-taina maawoiniki nampitsi. Inkenkithatakairi Israel-iite isheninkatari irirori, eejatzi itsipasatz-atziri kaari isheninkata, eejatzi iwinkatharite.

¹⁶ Ari noñaagakeri eejatzi jimpe onkaate inke-maatsiwentaina naaka.”

¹⁷ Irojatzi riyaatantanakari Ananías pankotsiki risaikakera Saulo. Kyaapaake, rotzimikapatzi-itotantapaakari rako. Ikantziri: “Iyekí, rotyaan-takena Awinkatharite Jesús, oñaagakemiri awot-siki pikenapaakera. Iro rotyaatantanari om-poñaantyaari pokiryaantaiyaari, risaikashiretan-taimiri eejatzi Tasorenkantsi.”

¹⁸ Ari oparyaanake rokiki oshiyawetariri shimapentaki, aminanai kameethaini. Irojatzi ikatziyantanakari, jatanake romitsitsiyaataiteri.

¹⁹ Ari rowawaitanaa, irojatzi ishintsitantaari kameethaini. Eepichokiinira risaikimowaita-paintziri kemisantzinkaripaini nampitawori Damasco-ki.

Ikenkithatzi Saulo Damasco-ki

²⁰ Ari retanakawo Saulo ikenkithatakan-tanake rapatotapiintayeta Judá-ite, ikantzi: “Iriitake Itomi Pawa jitachari Jesús.”

²¹ Riyokitziiwentanakeri ikaatzi kemiriri, ikantawaka: “¿Tema iriitake jirika kisaneentziriri Jerusalén-ki ikaatzi aakotziriri iwairo

Jesús? ¿Tema irijatzi pokaintsiri jaka rayeri kemisantzinkari Imperatasorentsiperorikinta?”

²² Iri kantacha Saulo eekero ishintsitatzi ikenkithatakaantzi tekaatsi inthaawantya. Te riyotzi oita inkanteri Judá-ite nampitawori Damasco-ki, ikemiri Saulo ikantzi: “Jirikaganki Jesús Cristo rinatzi.”

Saulo rishiyapithatari Judá-ite

²³ Okanta awisanake osheki kiteesheri, ikantawakaaka Judá-ite: “Jame atsitokeri Saulo.”

²⁴ Tema kiteesheriki eejatzi tsireniriki royaawentakeri rishitowapiintaitzira nampitsiki, ritsitokeri. Iri kantacha Saulo riyotake ikowatzi rowamagaiteri.

²⁵ Ikanta kemisantzinkaripaini, rotetakeri antawoki kantziri, roinkitaakotakeri tsireniriki jakakeroki rotantotaitzirowa nampitsi. Ari okanta rishiyantakari Saulo.

Areetaawo Saulo Jerusalén-ki

²⁶ Ikanta rareetaawo Saulo Jerusalén-ki, ikowawetaka intsipatapaiyaarime riyotaanewo Pinkathari. Iro kantacha osheki ithaawantakari, roshiyakaatzi te ikemisantaperotai irirori.

²⁷ Iro kantacha tzimatsi kemisantzinkari jitachari Bernabé, raapatziyanakari Saulo, jatake roñaagantairi ipiyotaga Otyaantaperoriite. Ikantapaakeri: “Jirika Saulo iñagairi Awinkatharite awotsiki jatachari Damasco-ki, ari ikenkithawaitakaakeriri. Ari retanakowo Saulo nampitsiki Damasco raakotanairi iwairo Jesús ikenkithatakotanairi. Tekaatsi inthaawantanakya.”

28 Ari ikantaka Saulo risaikantapaari Jerusalén-ki, itsipayetapaari jirikapaini Otyaantaperoriite.

29 Raakotakeri iwairo Pinkathari Jesús ikenkithatakotziri, tekaatsi inthaawantya. Ikenkithatakayaetziri Judá-ite Grecia-weri. Iro kantacha ikowake jirikapaini ritsitokeri.

30 Ikanta Riyotaiyakeni kemisantzinkaripaini, raanakeri Saulo janta Cesarea-ki. Irojatzi rotyaantantaariri Tarso-ki.

31 Ikanta kemisantzinkaripaini, nampiyetawori Judea-ki, Galilea-ki eejatzi Samaria-ki, kameetha ikanta risaikawaaitaiyini, eekero rantakishireperotanakitzi, pinkatha rowapiintanakeri Pinkathari, ikempoyaawentziri Tasorenkantsi. Eekero riyaatatodzi isheniperotanake.

Retsiyatakagaitairi Eneas

32 Ikanta rareetantayetaka Pedro nampitsipainiki, irojatzi rareetantaka Lida-ki inampiyetawowa ikiteshiretakagaitairi.

33 Ari iñaapaake jitachari Eneas, kisopookiri rinatzi, tzimakotake 8 osarentsi romaryaawaitaka.

34 Riñaanatapaakeri, ikantziri: “¡Eneas, retsiyatatakagaimi Jesucristo. Pinkatziye, paanairo pomaryamento!” Ari ikatziyanakari Eneas.

35 Ikaatzi nampitawori Lida-ki eejatzi Sarón-ki, iñaayetakeri ikatziyawaitanaa Eneas, iroowa ikemisantantanakariri Awinkatharite.

Añaantaari Dorcas

36 Okanta nampitsiki Jope, tzimatsi tsinane yotagaarewo oita Tabita, riñaaneki Grecia-thato iitaitziro “Dorcas”. Jiroka tsinane opashitantapiinta, oneshironkatantapiintzi.

³⁷ Okanta apaani kiteesheri, omantsiyatake Dorcas, kamake. Raayeetakero, ikaawoshitaitakero, romaryagaitapaintziro jenoki opankoki.

³⁸ Okanta janta Jope-ki te intainaperote nampitsi Lida, rareetakaga Pedro. Ikanta ikemaiyakeni yotaarewopaini ari risaikiri Pedro janta, rotyaantake apite atziri inkantakiteri: “Pipokeeta intsipaite Jope-ki.”

³⁹ Jatanake Pedro. Ikanta rareetapaaka janta, ragaitanakeri jenoki romaryagaitakerowa. Opiyowentapaakari maawoini kinankawo, iragaiyapaakani, oñaagayetapaakeri kithaarentsi ishirikanewo Dorcas.

⁴⁰ Ikanta Pedro romishitowakero maawoini, ari rotziwerowanaka, ramananaka. Irojatzi ripithokashitantanaawori kaminkawo, ikantziro: “¡Tabita, pimpiriintai!” Ari okiryaanake, oñaatziiiri Pedro, piriintanaka saikanai iroori.

⁴¹ Rakathawakotanakero, ikatziyakero. Ikaimayetairo kinankawo eejatzi ikaatzi ikiteshiretakagaitanewo, iñaayeetairo añagai.

⁴² Ikanta ikemakoyeetakero nampitsiki Jope, osheki kemisantanakeriri Pinkathari.

⁴³ Osheki kiteesheri risaikawaitanake Pedro nampitsikika, iri risaikimotake jitachari Simón “Mashicheempeki”.

10

Pedro eejatzi Cornelio

¹ Tzimatsi Cesarea-ki atziri jitachari Cornelio, iriitake reewarite owayeripaini Roma-satzi iitaitziri “Italia-satzi”.

² Jirika atziri pinkathatasorentsiwaitaneri rinatzi, ari ikaataiyini maawoini isheninkapaini ipinkathatziri Pawa. Ipapiintziri ashironkainkari osheki iyorikite okantawetaka te isheninkatari. Ramanapiintari Pawa irirori.

³ Okanta apaani kiteesheri, thataawo ooryaa, ishaawiityaake, ari romapokakeri imaninkarite Pawa ikyashitapaakeri risaikakera irirori, iñaawakeri koñaawoini, ikantapaakeri: “¡Cornelio!” *

⁴ Iyokitzii ikantanaka Cornelio, ithaawankakinini rosampitanakeri, ikantziri: “¿Pinkatharí, iitaka pikowakotanari?” Ikantanakeri maninkari: “Icemakemiro Pawa pamananewo, iñaakemi pineshironkatantapiintzi.

⁵ Potyaante ponampire nampsiki Jope ramantyaariri Simón, iitaitziri eejatzi Pedro.

⁶ Ari rimayimotziri itsipa Simón, ‘Mashicheempeki’ saikacheraatzirori inkaare. Iri kamanteme oita pantairi.”

⁷ Ikanta rishitowanai maninkari, ikaimake Cornelio apite ronampire. Ikaimake eejatzi owayeri, rawentaanewo rowiri, pinkathatasorentsiwaitaneri rinayetzi irirori.

⁸ Ikamantakeri okaatzi ikantaitakeriri. Rotyaantakeri Jope-ki.

⁹ Okanta okiteeshetamanai, tampatzikatapaake ooryaa, areetzimataiyakani Jope-ki rotyaan-taitakerira. Ari rateetanake irirori Pedro ramaña otaapiipankaki pankotsi.

¹⁰ Ikemaminthatakero ritashe, ikowake roya, iro kantacha owakera ronkotsitaitzi royaari, ari

* ^{10:3} Kantakotachari jaká “thataawo ooryaa”, iri ikantaitziri pairani “ooryaa 9”.

iñaaawyaatakari.

¹¹ Iñaakero ashitaryaanaka inkite, rowayi-
itaitziro oshiyawetawori antawo manthakintsi-
manki, ithatotaitakero opatzikaakipainiki.

¹² Okanta manthakintsimankiki eenitatsi
osheki itsipasatzipaini tsimeri, tzimatsi
anashiyetachari kipatsiki, eejatzi shiwankiyetat-
siri.

¹³ Irojatzi ikemantakari riñaanataitanakeri, ikan-
taitziri: “Pedro, pinkatziye, powamayeri jirika-
paini, poyaari.”

¹⁴ Rakanake Pedro: “Eero Pinkatharí. Te
nowapiintari naaka jirika ipinkaitziri.”

¹⁵ Rapiitaitanakeri Pedro riñaanataitziri, ikan-
taitziri: “Tema jirikapaini ikaatzi rishinetaantziri
Pawa, eero piitashiwaitari eeroka ‘Ipinkaitziri.’ ”

¹⁶ Mawa apiitaka jiroka. Irojatzi ragaitantanaa-
worri manthakintsimanki inkiteki.

¹⁷ Antawo okantzimoshiretanakari
Pedro, ikenkithashiryaaawaitanaka oita
oshiyakaawentachari okaatzi iñaakeri. Irojatzi
rareetantapaakari rotyaantanewo Cornelio,
rosampikowentapaakero ipanko Simón.

¹⁸ Ikanta rareetapaaka pankotsiki, ikaimaiya-
paakitziini rosampitantapaake, ikantzi: “¿Ari ri-
mayiri jika Simón, iitaitziri Pedro?”

¹⁹ Ikenkithashiryaa kominthaitawo Pedro
iñaakeri, riñaanashiretanakeri Tasorenkantsi,
ikantziri: “Pamine, areetapaaka mawa atziri
aminaminatzimiri.

²⁰ Pinkatziye, payiite. Eero pikisoshirewaitzi,
pintsipatyaari, tema naaka otyaatakeriri.”

²¹ Ari rayiitapaake Pedro, ikantapaakeri
areetapainchari: “Naaka pithotyaakotzi. ¿Itaka

pipokantari?”

²² Ikantaiyanakeni irirori: “Nipokantari rotyaantatyaaana Cornelio, reeware owayeripaini. Tampatzikashireri rinatzi, pinkathatasorentsi-waitaneri rinatzi, iri aakameethatapiintziriri pisheninkapaini Judá-ite. Tema chapinki ripokashitakeri imaninkarite Pawa, ikantakeri: ‘Pinkaimakaanteri Pedro, ripokantyaari pipankoki, ari pinkemeri oita inkamantemiri.’”

²³ Ikanta Pedro ikyaakaanakeri pankotsiki, ari rimagaiyapaakeni. Okanta okiteeshetamanai, jatake Pedro royaataianakerini pokashitakeriri, itsipatanakari eejatzi Jope-satzi, “iyekiite” rinatzi.

²⁴ Okanta otsipa kiteesheri areetaiyakaní Cesarea-ki. Oyaatsi Cornelio itsipayetakari isheninkapaini, eejatzi aapatziyariri ikaatzi ikaimayetakeri irirori.

²⁵ Areetaapaaka Pedro pankotsiki, rishitowashitanakeri Cornelio, rotzi-werowashitawakari, impinkathatawakerime.

²⁶ Iri kantacha Pedro ipiriintakeri, ikantziri: “Pinkatziye, atziri ninatzi eejatzi naaka, ari noshiyimi eeroka.”

²⁷ Ikanta ikenkithawaitakaawakeri Cornelio, ikyaakaanakeri ipankoki, iñaapaakitzi osheki atziri piyotainchari.

²⁸ Ikantanake Pedro: “Piyotaiyini eeroka, naakapaini Judá-ite te rishinetaitana nontsipatemi eerokapaini kaari nosheninkata, te onkantya nonkyawankotemi. Iro kantacha owakeraini riyotaakena naaka Pawa, te onkameethate nonkantayetemi: ‘Nowinkane

pinatzi.’

²⁹ Iroowa kaari nishenkaantanaka pikaimakaantakenaga. Iroñaaka nokowi niyote oita pikaimakaantantanari.”

³⁰ Rakanake Cornelio, ikantzi: “Chapinki, tzimake 4 kiteesheri, ari ikaatake ooryaa iroñaaka, ishaawiityaake. Nisaiki naaka nopankoki nitziwentawaita, namana otsireniityaanaira, ari ikoñaatzimotakena atziri, shipakiryaa okantapaaka iithaare. †

³¹ Ikantapaakena: ‘Cornelio, ikemakemi Pawa pamanari, ikenkithashiryaakero pineshironkatantapiintzira.

³² Potyaante nampitsiki Jope amerine Simón, iitaitziri eejatzi Pedro. Ari rimayiri itsipaki Simón, mashicheempeki nampitawori inkaarecheraaki.’

³³ Intsipaite notyaantake iñagaitemi, pimatakero eeroka pipokanake intsipaite. Naakaga ipiyotakaakari Pawa iroñaaka. Janjaatya pinkantenawo okaatzi ikantakemiri Awinkatharite.”

³⁴ Irojatzi ikantantanakari Pedro: “Ari niyotziri iroñaaka rimaperotatyā Pawa te ramaakinetziri atziri,

³⁵ raakameethatziri pinkathatanairiri, tampatzikashiretatsiri, okantawetaka jimepi inampiyetawo, kaari nosheninkata.

³⁶ Tema jiroka Ņaantsi kenkithatakotziriri Jesucristo, okaatzi jatakotantsiri nosheninkapainiki Israel-iite, iriira Pawa kantakaawori nokenkithatakotantaariri. Tema iriitake

† **10:30** Kantakotachari jika “ishaawiityaake”, iri ikantaitziri pairani “ooryaa 9”.

pinkathariwentaine maawoini, iriira
saikakaayetaine kameetha.

³⁷ Piyoperotaiyini eeroka okaatzi awisaintsiri noipatsiteki. Tema pikemakowentakero pairani ikenkithatakotakero Juan-ni okantakota omitsitsiyaataantsi. Irojatzi opoñaanaka Galilea-ki,

³⁸ iñagaitakeri Jesús Nazaret-satzi. Iri Pawa pakeriri ishintsinka eejatzi Itasorenka. Irojatzi ikenakenayetantanakari irirori ineshironkatan-tayetzi, rowawisaakoyetake osheki raagayetziri peyari. Iroowa rantantakawori jiroka tema Pawa tsipatakari.

³⁹ Naakayetake ñaaperotawakeriri rantayetakeri Jesús janta Judea-ki eejatzi Jerusalén-ki. Irojatzi rowamagaitantakariri, ikentakoitakeri.

⁴⁰ Iro awisawetaka mawa kiteesheri rowañagairi Pawa, ikantakaakawo irirori noñaayetairi naakapaini.

⁴¹ Te roñaagapanaantri maawoini atziri, apatziro naakapaini, ikaatzi riyoyaakeri pairani Pawa iñaayetairi. Ikanta rañagaira, notsipatawaari nowaiyani eejatzi nirawaitaiyini.

⁴² Iriira otyaantakenari nonkamantayetairi atziripaini, nonkantairi: ‘Iri Jesús rowake Pawa kantakowentairine maawoini añaayetatsiri, eejatzi kamayetaantsiri.’

⁴³ Irijatzi Jesús ikenkithatakotzitakari pairani Kamantantaneriite, ikantake: ‘Inkaate kemisan-tairine jirika, raakoyetairi iwairo, aritake im-peyakotainiri iyaariperonka.’ ”

⁴⁴ Ikenkithawaiminthatzi Pedro, risaikashire-tantapaakari Tasorenkantsi maawoini kemisan-takeriri ikenkithatzi.

45 Iyokitziitanake ikaatzi oyaatakeriri Pedro, iñaakerira risaikashiretantapaakari Tasorenkantsi kaari isheninkata, oshiyawaitakawo risakoperoitatyeenirime, ‡

46 ikemaiyakerini riñaawaitantanakawo otsipasato ñiaantsi, ithaamentanakari Pawa.

47 Ikantanake Pedro: “¿Kantachama athañaapithatyari romitsitsiyaatyja jirikapaini atziri, oshiyakairi aakapaini risaikashirentaira Tasorenkantsi?”

48 Rotyaantakeri romitsitsiyaataiteri jirikapaini raakotakeri iwairo Jesucristo. Ikanta jirikapaini ikantakeri Pedro: “Pisaikimowaitanakena.”

11

Ikamantapairiri Pedro kemisantzinkaripaini Jerusalén-ki

1 Ikanta ikemaiyakeni itsipa Otyaantaperorite eejatzi iyekiite nampitawori Judea-ki, ikantaitzi: “Ikemairo riñaane Pawa kaari ashinkata, ikemisantayetai irirori.”

2 Iro kantacha rareewetaaga Pedro Jerusalén-ki, riñaanaminthatawairi Judá-ite kemisantayetaatsiri.
*

3 Ikantawairi: “¿Litaka pareetantariri kaari ashinkata, pakiyooyetakeri eejatzi?” †

4 Ari ikamantanakeri Pedro oita opoñaantari. Ikantanakeri:

‡ **10:45** Jirikapaini “oyaatakeriri Pedro”, irijatzi iitaitzitari “Tomeshaaniri”. * **11:2** Kantakotachari jika “Judá-ite”, irijatzi iitaitzitari “Tomeshaaniri”. † **11:3** Kantakotachari jika “kaari ashinkata”, irijatzi iitaitziri “kaari tomeshaaniri”.

⁵ “Nisaiki naaka nampitsiki Jope, namana, ari noñaawyaatakari. Noñaake oshiyawetawori antawoite manthakintsimanki, ithataitakero opatzikaakiki, rowayiitaitakero okenapaake inkiteki irojatzi tsika nisaikake naaka.

⁶ Ari naminaperotanakero, noñaake osheki tsimeri, noñaake anashiyetachari kipatsiki, eejatzi shiwankiyetatsiri.

⁷ Irojatzi nokemantakari ñaanatakenari, ikantana: ‘Pedro, pinkatziye, powamairi jirikapaini, poyaari.’

⁸ Ari nakanake naaka: ‘Eero Pinkatharí, tema te namonkotapiintziri naaka ipinkaitziri.’

⁹ Rapiitaitanakena riñaanataitana, ikantaitana: ‘Tema jirikapaini ikaatzi rishinetaantairi Pawa, eero piitashiwaitari eeroka “Ipinkaitziri”.’

¹⁰ Mawa apiitaka jiroka. Irojatzi ragaitantanaa-wori inkiteki okaatzi noñaakeri.

¹¹ Ari rareetayapaakani mawa atziri thotyaakotanari, rotyaantaitakeri ipoñaakawo Cesarea-ki.

¹² Riñaanashiretakena Tasorenkantsi, ikantakena: ‘Poyaatanakeri jirikapaini, eero pikisoshirewaitanake.’ Irootake nantakeri. Jirika 6 iyekiite notsipatanakari. Iri notsipatakari nokyaapankotakeri atziri kaari ashenkata.

¹³ Ikamantawakena, ikantana: ‘Chapinki, noñaake maninkari ikatziyapaaka jakä nopankoki, ikantakena: “Potyaante jatatsine nampitsiki Jope raakiteri Simón, iitaitziri eejatzi Pedro.

¹⁴ Iriitake kamantemirone tsika pinkantya paw-isakoshiretantaiyaari, pitsipataarira maawoini

pisheninkapaini.”’

¹⁵ Ikanta nokenkithawaitakaapaakeri, ari omapokapaaka risaikashiretantapaakari Tasorenkantsi iriroripaini, ariwaitake risaikashiretantakairi ketziroini aakapaini.

¹⁶ Ari nokenkithashiryaanakero ikantakeri pairani Awinkatharite: ‘Imapero Juan romitsitsiyaatantawo ñaa, iro kantacha ari piñaayetakero eeroka risaikashiretantemi Tasorenkantsi oshiyawaityaawome romitsitsiyaatantaitatyeemirime.’

¹⁷ Tema iriitake Pawa neshironkatakeriri ejatzi iriroripaini itsipayetai aakapaini akemisantayetairi Pinkathari Jesucristo. ¿Litaka nonkoshekantyaariri Pawa?”

¹⁸ Ikanta ikemaiyawakeni iyekiite nampitawori Jerusalén-ki, tekaatsi inkantaiyanakeni. Ithaamentaiyanakarini Pawa, ikantaiyanakeni: “¡Imaperotatyawé! ¡Ineshironkatairi Pawa kaari ashenkata! ¡Kantacha iriroripaini ripakagairo iyaariperonka, ompoñaantaiyaari rañaashireyetai!”

Kemisantaatsiri Antioquía-ki

¹⁹ Rowamagaitakerira Esteban, ari retaitanakawo royaakyaaataitziri kemisantzinkari-paini. Iro opoñaantanakari rishiyayetanaka kemisantzinkaripaini janta Fenicia-ki, Chipre-ki ejatzi Antioquía-ki. Ari ikenkithatakaayetakeri Judá-ite jimpe okantakota Kameethari Ñaantsi, temaita ikenkithatakairi kaari isheninkata.

²⁰ Iro kantzimaitacha, ari rareetaiyakani Antioquía-ki, kemisantaatsiri poñaachari Chipre-ki ejatzi Cirene-ki. Ikenkithatakaapaakeri

kaari isheninkata, ikenkithatakeniri Kameethari Ñaantsi tsika ikantakota Jesús, Awinkatharite.

²¹ Okantakaaperotanakari ishintsinka Awinkatharite jirikapaini, ripakaakagairi itsipasatzi atziri ramewaitashitari. Osheki kemisantanairiri Awinkatharite.

²² Ikanta kemisantanantsiri Jerusalén-ki, ike-makotaiyakerini, rotyaantakeri Bernabé janta Antioquía-ki.

²³ Areetaka Bernabé, iñaapaakeri tsika ikanta Pawa ineshironkayetakeri jirikapaini, antawoite ikimoshiretapaake. Ikaminaayetapaakeri maawoini ompoñaantyaari roisokeroshireyetantyaariri Awinkatharite.

²⁴ Tema jirika Bernabé neshironkatantaneri rinatzi, rawentaashiretari Awinkatharite, risaikashiretantari Tasorenkantsi. Irootake isheniperotantanakari kemisantanairiri Awinkatharite.

²⁵ Ikanta Bernabé, jatake Tarso-ki iñeeri Saulo.

²⁶ Ikanta iñaapairi, ramairi Antioquía-ki. Ari risaikimowaitakeri riyotaanewo apaani osarentsi, riyotaayetake osheki atziri. Ari etanakawo janta Antioquía-ki iitaitziri kemisantzinkari “Cristo-weripaini”.

²⁷ Okanta apaani kiteesheri, rareetaiyakaní Antioquía-ki kamantantaneripaini ipoñaanakawo Jerusalén-ki.

²⁸ Ikanta apaani kamantantaneri jitachari Agabo, ikatziyanaka ipiyotaiyanira, ikantanake: “Ari iñagaitake antawoite tashetsi maawoiniki nampitsi.” Iri Tasorenkantsi ñaanashiretakeriri riyotantakawori. Iroowa monkaatainchari

pairani ipinkathariwetantakari Claudio.

²⁹ Irootake ikenkithashiryaantaiyakarini Antioquía-satzi ineshironkateri Judea-satzi rotyaan-teniri iyekiite okaatzi rimayetziri.

³⁰ Iro rantaiyakerini, rowaitakeri Bernabé itsipatakari Saulo iri aminakaanterone. Rotyaantakeniri itzinkamipaini janta Judea-ki.

12

Rowamagaitantakariri Jacobo, romonkyagaitakeri Pedro

¹ Ikanta pinkathari Herodes royaakyatakeri kemisantzinkari.

² Ikantakaantakeri rithatzinkaiteri Jacobo, irinentzi Juan.

³ Ikanta iñaakero Herodes kameetha inimotakeri Judá-ite, rotaiyakaantakeri Pedro. Ariapaite imonkaatakarji jiroka roimoshirenkantawori rowantapiintawori tashirentsiponka.

⁴ Ari rotaiyakaantaitakeri Pedro, romonkyakaantakeri. Rowaitake 16 owayeripaini aminerine. Ikenkithashiryaaka Herodes roñaaganterime atziripainiki onkaatakerika roimoshirenkaita kiteesheriki Anonkoryagaantsi.

⁵ Romonkyaaminthaitziri Pedro, amanaiyachani kemisantzinkaripaini ipiyowentaiyarini Pawa.

Romishitowaitairi Pedro

⁶ Okanta imonkaatzimatapaaka raantyaariri Herodes jirika Pedro roñaaganteri atziripainiki.

Maatsi Pedro tsireniriki rosatekakeri apite owayeri, roosotantakari apite kotsirotha. Saikaiyatsini itsipa owayeripaini ikyaapiintaitzira aminiriri.

⁷ Ari romapokaka ripokake imaninkarite Awinkatharite, kiteeshaaniki ikantakaapaakawo. Rotzinkamerekitapaakeri Pedro, rowakiryaaapaakeri, ikantziri: “¡Pinkatziye!” Oparyaashiwaitanaka kotsirotha roosotantaitakariri rakoki.

⁸ Rapiitakeri maninkari, ikantziri: “Pinkithaatya, pizapato-tya.” Ari ikantakero Pedro. Eekero ikantatzi maninkari: “Pinkithaatyaawo pizewiryaakowo, poyaatena.”

⁹ Shitowanake Pedro royaatanakeri maninkari. Te riyotzi kyaaryooperorika okaatzi rantziri maninkari. Oshiyimowaitakari iñaawayaatatyeyaaame.

¹⁰ Iro kantacha rawisanake apaani aminiriri, rawisanake itsipa. Iro rishitowimate, rareetapaakawo kotsiotakitatsiri ashitakowontsi, ashitaryaashiwaitanaka apaniroini. Shitowanake. Ikanta ranashitanaka, iro itaponeentanaka, ari rookanairi maninkari apaniroini.

¹¹ Ari ikenkithashiryaanakari Pedro, ikantanake: “Ari niyotzi iroñaaka imaperotaty arotyaantakeri Pinkathari imaninkarite, rookaawiritaantakena Herodes-ki, rookaawiritaantakena eejatzi tsikame inkantawaitename Judá-ite.”

¹² Ikanta riyotanakero Pedro jiroka, jatanake opankoki María, inaanate Juan, iitaitziri eejatzi Marcos, ari ipiyota ramana.

¹³ Kaimapaake ikyaapiintaitzira. Okanta

ewankawo jitachari Rode, jatanake aminer iitarika.

¹⁴ Ari iyowaantetawairi Pedro rinatzi, anta woite okimoshiretanake, te ashitaryaanakeniri inkyaantapaakyaari, piyanaka inthomoiki oka mantantz, okantapaake: “Pedro rinatzi kaimatsiri.”

¹⁵ Ari ikantaitawakero: “¡Te pishinkiwenta!” Eekero oshintsitatzi iroori, okantzi: “Imaperotaty.” Ikantaiyini irirori: “Aamaaka ramanka Pedro.”

¹⁶ Eekero ishintsitatzi Pedro ikaimi. Ikanta rashitaryagaitakeniri, iñagaitatziri Pedro rinatzi, riyokitziitaiyanakeni.

¹⁷ Rowaatzinkawakotanaka Pedro, imairetantlyaari. Iroatzi ikenkithatakotantanakawori jimpe ikantakero Awinkatharite romishitowantaariri. Eekero ikantanakitzi Pedro: “Pinkamanteri jiroka Jacobo ejejatzi itsipa iyekiite.” Ari rishitowanai, jatanake otsipaki nampitsi.

¹⁸ Okanta okiteeshetamanai, osheki okantzimoshiretaiyakerini aminiriri, tema te riyotaiyini jimpe ikenake Pedro.

¹⁹ Inintakaantakero Herodes rithotyaakoitairi, iro kantacha te iñagaitairi. Irootake rookoitan tanakariri aminiriri, rowamaakaantaitakeri. Okanta awisake jiroka, shitowai Herodes Judeaki, jatake inampitapaintyaawo Cesarea-ki.

Ikamantakari Herodes

²⁰ Ari ikantaty Herodes ikoshekawaitakari nampitawori Tiro-ki ejejatzi Sidón-ki. Ikanta ikenkithashiryagaiyakan ikoshekaminthatane

raakameethayetairi, tema ari riyomparitaiyapi-intani. Rotyaantaiyakeni jatashiyeterine Herodes raapatziayaari. Ikanta saikawankotziriri Herodes, rawentaaperotanewo, jitachari Blasto, raakameethayetawakeri pokashitakeriri. Ikantakowentakeri Herodes-ki tsikapaiterika inkenkithatakyaaariri.

²¹ Monkaatapaaka kiteesheri ikaimakaantakeri Herodes inkenkithawaitakairi. Ari ikithaatanakawo owaneenkari iithaare ikenkithawaitantapiintari, saikapaake risaikamentoki ipiyotaiyakanira, kenkithawaitanake.

²² Ari ikaimakotaiyirini atziripaini, ikantzi: “Jirinta kenkithawaitaintsiri, Pawaga rinatzi, kaari atziri!”

²³ Te onkantzimotaatsikaityaari Herodes roshiyakaantaitakariri Pawa ithaamentaitakari. Irootakera romapokantanakari romantsiyaakeri imaninkarite Awinkatharite, chowiwaitanake, kamake.

²⁴ Iro kantacha, eekero iyaatakotanakitzi riñaane Awinkatharite, eekero isheniperotanakitzi kemisantzinkaripaini.

²⁵ Ikanta Bernabé eejatzi Saulo rimonkaatakerorantakero rotyaantantaitakariri Jerusalén-ki, piyaiyaani Antioquía-ki, ari itsipataari Juan iitaitziri eejatzi Marcos.

13

*Retanakawo ikenkithatakaantzi Bernabé
eejatzi Saulo*

¹ Tzimatsi kamantantaneriite janta Antioquía-ki rapatotapiintaiyanira kemisantzinkaripaini, tzimatsi eejatzi yotaantaneriite. Jirika ikaataiyini: Bernabé, Simón iitaitziri eejatzi Kisaakiri, Lucio poñaachari Cirene-ki, Manaén iyempiyane pairani Herodes roimonkaiyakanira, ipoñaapaaka Saulo.*

² Ikanta ipiyowentaiyarini Awinkatharite, ritziwentaiyani, riñaanashiretakeri Tasorenkantsi, ikantakeri: “Povenari Bernabé pintsipataakenari Saulo nantawaitakaantyaariri.”

³ Ikanta rithonkakero ramanaiyani, ritziwentaiyani, rotzimikapatzitoitantakari rako jirikapaini, rotyaantaiyakerini.

Ikenkithataiyini Otyaantaperoriite Chipre-ki

⁴ Ikanta rotyaantanewo Tasorenkantsi, jataiyakeni Seleucia-ki, ari rotetaiyanakani ryaatero Chipre-ki.

⁵ Aatakotaiyapaakeni Salamina-ki. Retapaakawo ikamantantapaakero riñaane Pawa rapatotapiintaiyanira Judá-ite. Ari ryaatzitanakari irirori Juan ramitakoteri.

⁶ Ranonkanakero eentamentare, irojatzi rareetantakari Pafos-ki. Ari iñaake kamantantaneri sheripiyari Judá-ite, thairi rinatzi, iita Barjesús.

⁷ Jirika sheripiyari raapatziyanewo rinatzi pinkathari Sergio Paulo. Osheki riyorenka jirika pinkathari, ikaimakaantakeri Bernabé eejatzi Saulo, ikowi inkemero riñaane Pawa.

* **13:1** Jirika “Herodes” iriitake pinkathariwentantatsiri pairani Galilea-ki.

⁸ Iri kantacha jirika sheripiyari jitachari Eli-mas riñaaneki Grecia-thato, ikowake rotzikawakeri pinkathari eero ikemisantanta.

⁹ Ikanta Saulo, iitaitziri eejatzi Pablo, ipampoyaanakeri jirika, ikantakaaperotanakari Tasorenkantsi,

¹⁰ ikantanakeri: “¡Thairí! Kaariperori, itomi kamaari pinatzi. Pimanintakero kameethari. ¿Erroma pipakairo potzikayetziro tampatzikatzi-motziriri Nowinkatharite?

¹¹ Iroñaaka rowasanketaitemi, osamani pinkantya pimawityaakite.” Apathakero ikan-tanaka, te ikowichaatanai. Rithotyaakowaiweta akathawakotairine.

¹² Ikanta iñaakero pinkathari awisaintsiri, ikemisantanake. Riyokitziiwentaitanakero ikenkithatakoitziri Awinkatharite.

Areetaka Pablo eejatzi Bernabé Antioquía-ki saikatsiri Pisidia-ki

¹³ Ikanta rishitowanai Pablo janta Pafos-ki itsipatakari ikaataiyinira otetanaka riyaatero Perge-ki saikatsiri janta Panfilia-ki. Iri kantacha Juan, te royaatanairi, piyanaka irirori Jerusalén-ki.

¹⁴ Ikanta rareetaka Perge-ki awisanake otsipaki nampitsi Antioquía-ki saikatsiri janta Pisidia-ki. Ikanta ikyagaiyakeni rapatotapiintaga Judá-ite kitreesheriki rimakoryaantaitari, saikapaake.

¹⁵ Tema rithonkaitakero riñaanaitziro rosankenare Kamantantaneriite, Inintakaantaitanewo eejatzi, ikantake jewatakaantatsiri rapatotapiintaga: “Iyekiite, eenitatsi pinkanteri ompoñaantyaari inthaamentantyaari atziripaini.”

16 Irojatzi ikatziyantanakari Pablo, rowaatzinkawakotanaka imairetantaityaari, ikantanake: “¡Shiramparipaini! ¡Israel-iite! ¡Maawoini pinkathatairiri Pawa!

17 Iriitake Pawa yoyaakeriri pairani etakaantawori acharineeteni, Israel-iite. Iriitake oshekyaaikeriri. Irojatzi roñaagantantakawori ishintsinka rookaawiritaantairi Egipto-ki.

18 Irojatzi ripiyathawaitantakariri Pawa janta ochempiki okaatzi 40 osarentsi. Iri kantacha Pawa ikisashitakawo ripiyathayetakari.

19 Irojatzi rithonkantakariri Pawa sheninkatawakaachari janta Canaán-ki ikaatzi 7, irootake iipatsitetakaayetaariri acharineeteni.

20 Maawoini jiroka nokenkithatakotakemiri awisake 450 osarentsi okaatzi osamanitake. Irojatzi rowantakariri jewaripaini aminakoterine, irojatzi riweyaantantapaakawori Samuel-ni, Kamantantaneri.

21 Iro kantzimaitacha ikowawetaka apaani iwinkathariteperotaari. Iroowa rowantakariri Pawa jitachari Saúl, itomi Cis, icharinetari Benjamín. Iri pinkathariwentakeriri okaatzi 40 osarentsi.

22 Iri kantacha Pawa rowinkatharyaakeri Saúl-ni, ripoyaatantaari David-ni. Tema iri David-ni ikenkithatakotake pairani Pawa, ikantzi:

Noñaakeri David itomi Isaí, rinimotakena,

Iriitake materone nokowiri naaka.

23 Ikanta itzimake Jesús, icharinetakari David-ni. Iriitake ikashaakaakeri Pawa rotyaanteri rowawisaakoyetai aakapaini Israel-iite.

24 Tekeraata ripokeeta Jesús, ikenkithatakotz-itakari Juan-ni, ikantake: ‘Ontzimatye pipiyashireyetai, pomitsitsiyaawentaiyaari Pawa.’

25 Ikanta Juan-ni rithonkimatakerero rantawait-anewo, ikantanake: ‘¿Piñaakityaanama naakatake jirika? Te naaka. Awotsikitake nopinkathaper-otziri naaka, te onkantaatsikaitya roshiyakayena rimperatanewo no-zapato-ryaantyaariri.’

26 ¡Iyekiite! ¡Isheninkapaini Abraham! ¡Maa-woini eerokapaini ikaatzi pinkathatairiri Pawa! Aakatakerera rotyaantaitakai jiroka Ñaantsi aw-isakoyetantaiyaari.

27 Tema ikaatzi nampitawori Jerusalén-ki eejatzi reewarepaina, te riyotawakeri Jesús riyakowentaiyakerini. Iro opoñaantari kaari riyotantawo rimonkaatero okaatzira rosankenatakotakeriri Kamantantaneriite, okantaweta reshiwentapiintawetawo riñaanawetawo ipiyotaiyanira kiteesheriki rimakoryaantaitari.

28 Irojatzi ikowakotantakariri Pilato ritsitokaiterí Jesús, okantawetaka tekaatsi inkenakaashitya irorori.

29 Ikanta rithonkakero rantayetakerero okaatzi rimonkaatkaakari rosankenatakoitakeriri pairani, inowikyaakotakeri ikentakoitakerira, ikitatakeri.

30 Iri kantacha Pawa rowiriintairi.

31 Ari retanakawo Jesús roñaagapanaanteri ikaatzi tsipatakariri pairani ipoñaantakari Galilea-ki irojatzi Jerusalén-ki. Osheki okaatzi kiteesheri roñaagapanaanteri. Iriitajaantakera

kenkithatakoyetairiri iroñaaka tsikarikapaini risaikayetzi atziri.

³² Irijatziita nokenkithatakotzimiri iroñaaka eerokapaini, nokenkithatakotzimiro Kameethari Ñaantsi jimpe okantakota ikashaakaakeriri Pawa acharineeteni.

³³ Ari rimonkaatakerero Pawa okaatzi ikashaakaakeriri, tema rowiriintairi Jesús roñaagayetai aakapaini, tema icharine anaiyini. Irootake osankenatakotachari Salmo-ki, okantzi: Notomi nowimi eeroka.

Naaka pipaapatetanaa iroñaaka. †

³⁴ Ari ikenkithatakotzitakari Pawa rowiriintairi Jesús, eero oshitzwaitanta iwatha. Ikantake ikenkithawaitake:

Okaatzi nokashaakaakeniriri David-ni, iroowa nantemiri eeroka.

³⁵ Otsipaki Salmo okoñaatakoperotzira jiroka, okantzi:

Eero pishinetziri ishitziwaite iwatha pitasorentsite.

³⁶ Imaperotaty, kaari David-ni onkenkithatakote jaka, tema rañaakaakeri Pawa jirika David-ni, rimakoryaagai eejatzi, itsipataari icharineete jimpe ikitayetaa, ari ishitzitairi iwatha.

³⁷ Irooma iwatha jirika rowiriintairi Pawa, te ishitziwaite iwatha irirori.

³⁸ Iyekiite, ontzimatye piyoyetai eerokapaini, iri nokenkithatakotzi Jesús, tema iri matzirori ipeyakotakagaimiro piyaariperonka.

† **13:33** Kantakotachari jaka “Salmo”, irojatzi ikantitziri “Salmo 2”. Omampagaantsi inayetzi iitatziri Salmo. Osheki okaatzi, iro apitetanaintsiri rosankenaitakero pairani jiroka.

³⁹ Eekerorika poyaatatayeero Inintakaantaitakeri rosankenatakeri Moisés-ni, eero ipeyakotaitzimiro piyaariperonka. Irooma arika pinkemisantanairi Jesúś, ari impeyakotaimiro irirori.

⁴⁰ Paamaawentaiya eerokapaini, patsipetawokari rosankenatakotakeri Kamantantaneriite, ikantake:

⁴¹ Pinkemaiyeni manintzirori kyaaryooperori, Ari pinkitakitziitapainte, irojatzi pimpeyan-takyaari.

Tzimawetakaga oita nantzimotaimiri,
Eeromaita pikemisantziro, intzimawetakya ooñiaawontemirone.”

⁴² Ikanta rishitowimatanai Pablo rapatotapi-intaitaga, ikowakotaiyakerini kaari isheninkata, ikantziri: “Pipiyai otsipaki kiteesheri rimakoryaantaitari, papiitero pinkenkithatakayenawo jiroka ñaantsi.”

⁴³ Ikanta riyaataiyaini Judá-ite eejatzi kaari isheninkata ipiyotaiyani, eenitatsi osheki oyaatanakeriri Pablo eejatzi Bernabé. Ari ikaminaathayetakeri roisokerotantyaawori ineshironkayetairiri Pawa.

⁴⁴ Okanta imonkaatapaawo kiteesheri rimakoryaantapiintaitari, ipiyotaiyakaní osheki atziri inkemisantero riñaane Pawa.

⁴⁵ Ikanta iñaakerira Judá-ite ipiyotaiyapaakaní atziripaini, ikisashiretaiyanakaní, retanakawo ikoshekawaitakari Pablo, rithainkimawaitanakeri.

⁴⁶ Te ithawanake Pablo itsipatakari Bernabé, ikantakeri irirori: “Iro kameethawetachari netawakemi nonkamantayetemirome

eerokapaini riñaane Pawa, tema Judá-ite pinayetzi. Irooma pimanintaiyakeronira, eero piñagairo rañaashiretakagaitaimi. Iroowa nonkenkithatakaantyaariri iroñaaka kaari ashinkata.

⁴⁷ Iroowa rotyaantantanari Nowinkatharite, ikantakena:

Eeroka nowake poiteesheetyaakotairi kaari pisheninkata,

Pinkenkithatakotainiri awisakotaantsi.

Pithotyagairo maawoiniki kipatsi.”

⁴⁸ Ikanta ikemaiyawakeni kaari isheninkata, ikimoshiretaiyanakeni, ikantaiyanakeni: “Osheki okameethatzi riñaane Pinkathari.” Rithonka ikemisantaiyaini ikaatzi riyoyagaitakeri rañaashireyetai.

⁴⁹ Ithonka ikenkithatakoitanakero riñaane Awinkatharite nampitskipaini.

⁵⁰ Iri kantacha Judá-ite, ikenkithawaitakaake iriiperoripaini jewatakaantatsiri nampitsiki, tsinanepaini iyemakoitane, tsipatapiintariri Judá-ite ipiyotaiyanira, rakakaayetakeri royaakyaaateri Pablo eejatzi Bernabé, romishitowairi inampitsiteki.

⁵¹ Ikanta Pablo itsipatakari Bernabé rotakanairo iipatsiyitzite riyotantaityaari te ikemisantitziri Pawa janta. Irojatzi ikenaiyantanakarini otsipaki nampitsi Iconio-ki.

⁵² Iro kantacha kimoshire ikantaiyani riyotaanewopaini, risaikashireperotantanakari Tasorenkantsi.

14

Riyaatake Pablo itsipatakari Bernabé Iconio-ki

¹ Ikanta Pablo itsipatakari Bernabé, ikyagaiyakeni rapatotapiintaiyanira Judá-ite janta Iconio-ki. Ikenkithatakaapaakeri, ari ikemisantaiyanakeni osheki Judá-ite eejatzi kaari isheninkata.

² Iro kantzimaitacha, eeniyetatsi kisoshireri Judá-ite, ikaminaakeri kaari isheninkata inkoshekyaari kemisantakaantapaintsiri.

³ Iroowa risaikantapaakari osamani janta. Eekero ikenkithatakotanakitziri Awinkatharite te ithaawaiyini. Ritasonkawentantayetake, iroowa riyotantitari imaperotaty ikenkithatakotziro ineshironka Awinkatharite.

⁴ Iro kantacha ikoshekawakaanaka ikaatzi nampitawori janta. Eenitatsi aapatziyanakariri Judá-ite, tzimatsi itsipapaini aapatziyanakariri Otyaantaperoriite.

⁵ Ikanta Judá-ite itsipayetakari kaari isheninkata, ikenkithawaitakaakeri jewaripaini rowasankewaiteri, rishemyaantyaari eejatzi mapi.

⁶ Iri kantacha iriroripaini, riyotake oitarika rantaiteri, shiyaka ikenaiyanakeni Listra-ki eejatzi Derbe-ki, iro nampitsipaini saikatsiri janta Licaonia-ki. Irojatzi raayetantanakari eejatzi ot-sipaki nampitsi okaatzi tzimayetatsiri janta.

⁷ Arira ikenkithayetakero Kameethari Ŋaantsi janta.

Rishemyaaweetakari Pablo Listra-ki

⁸ Okanta janta Listra-ki tzimatsi atziri kisopookiri, te ranashiwaita, tema rashи rowiro owakera itzimapaaake. Ari risaikiri jirika atziri,

⁹ ikemisantziri Pablo. Ikanta Pablo rotzikanatanakari atziri, riyotake osheki rawentaashiretakari, kantacha retsiyatakotakagairi.

¹⁰ Riñaanatanakeri shintsiini, ikantanakeri: “¡Pinkatziye, potampatzikatero piitzi!” Apathakero rimitaanake katzianaka, anashitanaa.

¹¹ Ikanta iñagaitakero rantakeri Pablo, ikaimaiyanakeni atziripaini riñaanekei Licaonia-satzi, ikantaiyini: “¡Rayiitzimotakaiawa roshiyapaakari atziriwé!”

¹² Roshiyakagaitanakeri Bernabé iriime jitachari “Júpiter”, iriima Pablo roshiyakagaitanakeri iriime jitachari “Mercurio”, tema iriitake Pablo ñaawaitatsiri.

¹³ Janta ikyapiintaitzira nampitsiki, ari isaikiri iyaapapankote sheripiyariwentziriri Júpiter. Jirika sheripiyari, ramake iroñaaka ipirapaini, inchateyakipaini. Itsipayetakari atziripaini ikowawetaiyani impinkathateri Bernabé eejatzi Pablo. Ikowi rowamayenirime ipirapaini, ritayeniri.*

¹⁴ Iri kantacha Bernabé itsipatakarri Pablo, Otyaantaperori rini, riyotake irirori oita ikenkithashiryaari ranteniriri atziripaini. Weshiryaaperotanaka, risaperyaanakero iithaare. Rosatekantanakari atziripaini, ikaimanake,

¹⁵ ikantzi: “¿Oitaka pantantyaawori jiroka?

* **14:13** Kantakotachari jaka “ipirapaini”, iriira toro-paini.

Atziri ninayetatzi naaka, ari noshiyimi eerokapaini. Irootake nipokantakari nonkamantayetaimi pipakaayetairo pametashitapiintari. Ontzimatye pinkemisantairi Pawa Kañaanetatsiri, wetsikakerori inkite, kipatsi, inkaare, maawoini tzimantayetawori.

¹⁶ Irijatzi shinetaikeriri pairani picharinepaini rantapiintantakawori iñaamatashiyetari iriroripaini.

¹⁷ Iro kantzimaitacha te rimanapithawetari kaari riyotantaatsikaitari añaatsira irirori. Tema iri Pawa neshironkatapiintakairi aakapaini, rowariiro inkani, okithokiyetantari awankirepaina, iri payetairori maawoini owayetari, iro opoñaantari akimoshiretai."

¹⁸ Okantawetaka ikantayewetakari atziripaini jiroka, osheki opomeentsitaka ripakaakaantyaariri rowamayeniri ipirapaini ritayeniri.

¹⁹ Ari rareetaiyapaakaní Judá-ite poñagainchari Antioquía-ki eejatzi Iconio-ki. Ikaminaayetapaakeri atziripaini. Irootake rishemyaantawetakariri Pablo. Inoshikaitanakeri rookakeri nampitsihapiki, roshiyakaaminthaitzi ari rowamaakeri.

²⁰ Ikanta riyotaanepaini Pablo ipiyowentappaakari, ari ipiriintanaari eejatzi ripiyanaawo nampitsiki. Okanta okiteeshetamanake jatake Derbe-ki itsipatanaari Bernabé.

²¹ Ikanta ikamantantapaakero Kameethari Ñaantsi janta Derbe-ki, ikemisantakaake osheki atziri. Irojatzi ripiyantanaawori Listra-ki, Iconio-ki irojatzi Antioquía-ki.

²² Ari ikenkithatakaayetanairi riyotaanepaini, ikaminaayetanairi onkantya roisokerotantyaariri rawentaashiretanakari, ikantayetziri: “Ontzimatye añaero osheki anke-maatsiwaityaari ompoñaantyaari ankyaatayiaari jimpe ipinkathariwentantai Pawa.”

²³ Raminake apawopaini itzinkamipaini jewaterine kemisantzinkaripaini tsika rapatotapiintaiyani. Ramanakotanaari, ritziwentanaari, ikan-tapiintake: “Nowinkatharité, pinkempoyagairi jirikapaini awentaayetanaimiri.”

Piyaawo Antioquía-ki saikatsiri Siria-ki

²⁴ Ikanta ikenapairo Pablo janta Pisidia-ki, irojatzi Panfilia-ki.

²⁵ Ikenkithatakaantanake janta Perge-ki, rawisanake irojatzi janta Atalia-ki.

²⁶ Ari rotetanaa irojatzi Antioquía-ki, tsika janta rowaitakeri pairani ryaatantyaari inkamantantero ineshironka Pawa. Irootake rimatakeri rantayetakero.

²⁷ Ikanta rareetaa Antioquía-ki, ipiyoyetapairi kemisantzinkaripaini, ikamantapairi okaatzi rantakaayetakeriri Pawa, jimpe ikanta Awinkatharite rawentaashiretakaayetaari kaari isheninkata.

²⁸ Ari risaikapairi Pablo itsipatakari Bernabé itsipayetapaari riyotaanewo.

15

Rapatotaita Jerusalén-ki

¹ Ari rareetaka Antioquía-ki, apawopaini atziri ipoñaayetakawo Judea-ki, riyotaantayetapaake, ikantantapaake: “Iyekiite, eerorika pimonkaayetziro Inintakaantaitanewo rosankenatakeri Moisés-ni, pitomeshaanitya, eero pawisakoshireyetai.”

² Ikanta Pablo itsipatakari Bernabé osheki riñaanaminthatakeri jirikapaini areetapainchari. Irootake ikowantaitakari rotyaantaiteri Pablo, Bernabé eejatzi itsipapaini, ryaate Jerusalén-ki iñeeri Otyaantaperoriite eejatzi itzinkamipaini, impiyowentyaawo awisaintsiri.

³ Ari rotyaantaitakeri ikenanake Fenicia-ki irojatzi Samaria-ki, ikamantantayetanake jimpe ikantayetaa ikemisantayetai kaari isheninkata. Ikimoshiretaiyanakeni iyekiite ikemawakera.

⁴ Irojatzi rareetantakari Jerusalén-ki. Kameetha raawakeri kemisantzinkaripaini, Otyaantaperoriite eejatzi itzinkamipaini. Ikamantapaakeri iriroripaini rantakaayetakerirri Pawa.

⁵ Iri kantacha apawopaini Fariseo kemisantaatsiri, ikatziyanaka iriroripaini, ikantanake: “Ikaatzsi kemisantayetaatsiri kaari ashinkata, okowaperotatya rimonkaayetairo Inintakaantaitanewo rosankenatakeri Moisés-ni, ritomeshaanitya.”

⁶ Ari ipiyotaiyakani Otyaantaperoriite itsipayetakari itzinkamipaini raminakotantyaawori tsika okantakota jiroka.

⁷ Okanta osamanitake riñaanatawakaawentakawo, ikatziyanaka Pedro, ikantanake: “Iyekiite, pinkenkithashireero eerokapaini eenitatsi

rantzimoyetakairi Pawa pairani. Rotyaantakena naaka nokenkithatakaayetairi Kameethari Naantsi kaari ashenkata, ari okantaawo ikemisantantaari iriroripaini.

⁸ Tema Pawa riyotake jimpe ikanta ishireki, ari roñaagayetairo ikowiri irirori risaikashiretantaayaari Tasorenkantsi kaari ashenkata ikemetaakaira pairani aakapaini.

⁹ Tema raakameethatairi Pawa jirikapaini ikemetaakaira eejatzi aakapaini, roiteshireyetairi rawentaashiretaarira.

¹⁰ ¿Kameethatatsima piñaantawaityaari Pawa? ¿Litaka pinkematenatakaantyaariri ayotaanewo? Tema potsiwakakaakari kaari amataatsikaitzi aakapaini, kaari rimataatsikaitzi eejatzi acharineete.

¹¹ Iroowa ineshironka Awinkatharite Jesús owawisaakoshireyetairi aakapaini. Ari ikantayetaari eejatzi iriroripaini.”

¹² Ari imairetaiyanakeni maawoini, ikemisantanakeri Bernabé eejatzi Pablo ikenkithatakotziro okaatzi rantakaayetakeriri Pawa janta itsipasatziki atziripaini, ritasonkawentantayetake.

¹³ Ikanta rithonkakero ikamantantake, ikantanake Jacobo: “Iyekiite, pinkemisantawakena:

¹⁴ Ikamantakairo Simón jimpe ikanta Pawa retantanakawori riyoyayetairi itsipasatzipaini, opoñaantari ikemisantairi, raakoyetairi iwairo.

¹⁵ Ari imonkaatari iroñaaka rosankenatakotakeri pairani Kamantantaneriite, ikantake:

¹⁶ Arika onkaatapaake jiroka, ari nikiye. Nompiriintairo ipanko David tyagaintsiri.

Nompinkatharitakagairi incharinetyaari
 ari roshiyaiyaari jimpe ikanta irirori
 noppinkatharitakaakeri.

¹⁷ Iro ompoñaantyaari rithotyakoyetaina
 itsipasatzipaini, inkantayetaina:
 ‘Nowinkatharite’,

Iro ompoñaantyaari nashitaiyaari kaari
 pisheninkata, raakoyetaina nowairo.

¹⁸ Ari ikantake ikenkithawaitake Awinkatharite,
 oñaagantzirori ikenkithashiretzitakari
 owakera retantanakawori.

¹⁹ Irootake nonkantantyaari naaka, eero okanta
 oomerencheeri kaari ashenkata ikaatzi
 kemisantayetairiri Pawa.

²⁰ Apatziro otyaanteniri osankenarentsi
 eero rowantari wathatsi rashitakagaitariri
 iwawanetashiyeetari, eero imayempiwaiyetanta,
 eero rowakoyetantawo riraa piratsipaini.

²¹ Tema irootake jiroka rosankenare Moisés-
 ni ikenkithatakoitapiintziri tsikarikapaini
 rapatotapiintayeta Judá-ite kiteesheriki
 rimakoryaantaitari. Irootake retanakari pairani.
 Irootake ripakaantyaawori jirokapaini eero
 ikantzimoshiretakaantari ashenkapaini.”

²² Ikanta Otyaantaperoriite ejatzi itzinkamipaini, itsipayetakari kemisantzinkaripaini, riyoyaake rotyaanteri Antioquía-ki intsipatyaaari Pablo ejatzi Bernabé. Jirika ikaatzi riyoyaakeri: Judas iitaitziri Barsabás, ejatzi Silas. Iriitake jewatakaayetakeriri iyekiite janta.

²³ Iriitake aanakerone osankenarentsi. Jiroka okantzi osankenataka: “Iyekiite, naakatake

Otyaantaperoriite, itzinkampaini. Niwethataiyimini eerokapaini kaari nosheninkata nampiyetawori Antioquía-ki, Siria, eejatzi Cilicia-ki.

²⁴ Niyotaiyakeni tzimatsi poñaayetanainchari jaka, iri oomerenchaakemiri janta, ikowi pimonkaayetairo Inintakaantaitanewo, pitomeshaanitaiya. Kaarira jirika notyaantanewo naaka.

²⁵ Irootake nokenkithawaitantakari jaka, ari niyoyaake apawopaini akaataiyinira, jatatsine iñeemi intsipatanakyaari etakokitanewo Pablo eejatzi Bernabé.

²⁶ Iriiyetake atsipewentakariri Awinkatharite Jesucristo.

²⁷ Jirika notyaantakemiri: Judas eejatzi Silas. Iriira kenkithawaitakaapaakemine janta inkamantapaakemiro maawoini jiroka.

²⁸ Te onkameethate nonkematenatakaawaitemi eerokapaini, tema iro kameethatzimotakeriri Tasorenkantsi, eejatzi naakapaini. Apatziro pantayetairo okaatzi kowaperotachari. Jiroka okantzi:

²⁹ Eero powayetari wathatsi rashitakagaitariri iwawanetashiyeetari. Eero powakoyetawo riraa piratsi. Eero pimayempiwaitzi. Arika pimonkaayetanakero jiroka, kameethatake. Ari okaatzi.”

³⁰ Ikanta rotyaantaitakeri, jatake Antioquía-ki. Ari ipiyotapaakeri kemisantzinkaripaini, ipa-paakeri osankenarentsi.

³¹ Ikanta riñaanatawakero, ikimoshireperotaiyanakeni.

³² Tema kamantantaneri rinayetzi Judas eejatzi Silas, ithaamentakaapaakari iyekiite roisokerotyaari Pawa, ikenkithawaitakaapaakeri.

³³ Okanta osamanitake risaikimowaitakeri kameetha, rotyaantairi jimpe ipoñaakawo pairani.

³⁴ Iri kantacha Silas okameethatzimotakeri irirori risaikanake.

³⁵ Eejatzi Pablo itsipatakari Bernabé irojatzi risaikanake iriroripaini Antioquía-ki, itsipayetakari itsipapaini, eekero riyotaantanakitzi, ikamantantziro riñaane Awinkatharite.

*Rontsiparyaari Pablo jirika Bernabé
rapiitairowa ryaatzi ikenkithatzi*

³⁶ Okanta osamanitake, ikantairi Pablo jirika Bernabé: “Jame apiitero areetyaari inampipainiki iyekiite tsika akamantantakero riñaane Awinkatharite. Aminairi jimpe ikantayeta.”

³⁷ Ari ikowawetaka Bernabé raanakerime Juan, iitaitzitari Marcos.

³⁸ Iro kantacha te inimoteri Pablo raanairi, tema Marcos rookanawentakeri janta Panfilia-ki, te rithotyiilo intsipatyari jimpe ikenayetake ikenkithatakaantzi.

³⁹ Ari riñaanaminthatawakaiyakani. Aripaite rontsiparyaawakaiyanakani. Raanakeri Bernabé jirika Marcos, otetanaka ikenanake Chipre-ki.

⁴⁰ Iriima Pablo, raanakeri Silas. Ramankotawaari iyekiite, ikantaiyini: “Nowinkatharité, nawentaimi eeroka, pineshironkateri jirika.” Ari ryaataiyanakeni.

⁴¹ Ikanta ikenanake Siria-ki, irojatzi Cilicia-ki, rominthashiretakaayetakari ikaatzi kemisantayetaatsiri.

16

Timoteo itsipatari Pablo eejatzi Silas

¹ Ikanta rareetaka Pablo janta Derbe-ki itsipatari Silas irojatzi rareetantakari Listra-ki. Ari iñaake riyotaanewo Awinkatharite iita Timoteo, otomi osheninka Judá-ite rinatzi, kemisantatsiri, riñaaawaitziro Grecia-thato ipaapate.

² Jirikapaini kemisantzinkaripaini nampitawori Listra-ki eejatzi Iconio-ki kameetha ikenkithatakotakeri jirika Timoteo.

³ Kowanake Pablo intsipatyari Timoteo. Iro kantacha retawakari ritomeshaanitziri eero iksawaitanta Judá-ite nampitawori janta, tema riyotaiyini maawoini Grecia-thato rinatzi ipaapate Timoteo.

⁴ Ikanta ikenayetanake nampsipainiki, ikamantayetanakeri kemisantzinkaripaini rimonkaayetairo rosankenatakeri pairani Otyaantaperori itsipatakari itzinkamipaini janta Jerusalén-ki.

⁵ Iroowa ikyaaryooyetantanakari kemisantzinkaripaini rawentaa yetanaka, eeke riyaatanakitzi kiteesheriki isheniperotanake.

Romishimpyaakeri Pablo Macedonia-satzi

⁶ Ikanta Pablo roshinampitanakawo Frigia eejatzi Galacia, tema te rishinetziri Tasorenkantsi inkenkithatakaante Asia-ki.

⁷ Irojatzi rareetantakari Misia-ki. Ari ikenkithashiryaawetakari riyaatero Bitinia-ki, iro kantacha te rishinetziri Itasorenka Jesús.

⁸ Awisanake janta Misia-ki, oirinkaiyapaakani nampitsiki Troas.

⁹ Ari janta rimishiwaitake Pablo tsireniriki, rimishitake apaani Macedonia-satzi, ikantziri: “Parretena nonampiki, pineshironkayetaina naakapaini.”

¹⁰ Ikanta rimishiwaitakera Pablo, ari niwetsikaiyanakani niyaataiyeni Macedonia-ki, tema niyotanake iri Pawa kaimashireyetakenari janta nonkenkithatakotero Kameethari Ñaantsi.

Romonkyagaitanakeri Filipos-ki

¹¹ Ari notetaianakanaki Troas-ki, apatziro nowanakero niyaatziro Samotracia-ki. Okanta okiteeshetamanake naatakotapaake nampitsiki Neápolis-ki.

¹² Okanta nawisanake irojatzi Filipos-ki, inampiyetawowa poñaayetainchari Roma-ki, otzinkami nampitsi inatzi janta Macedonia-ki. Ari nisaikawaitapaakeri janta.

¹³ Okanta apaani kiteesheri rimakoryaan-tapiintari Judá-ite, niyaatake ñaacheraaki, nokantashiretzi ari ramanapiintaiyani. Ari noñaapaake tsinane opiyotaiyani, nisaikaiyapaakeni nokenkithatakairo Kameethari Ñaantsi.

¹⁴ Okanta apaani tsinane piyotainchari oita Lidia, opoñaawo iroori nampitsiki Tiatira. Ipoki iyompariwaita kithaarentsi anashirikimawots-siri. Tema opinkathatapiintziri Pawa jiroka

tsinane, okemaminthatakeri ikenkithatzi Pablo, rominthashiretakaanakawo Awinkatharite.

¹⁵ Omitsitsiyaataka, otsipatakar ikaatzi saikawankotzirori. Ari okantaiyanakenani: “Piyotanarika nokyaaryooowentairi Awinkatharite, pipokaiyeni pimaye nopankoki.” Ari nimataiyakeroni, tema irootake kantakenari.

¹⁶ Okanta apaani kiteesheri, niyaataiayini namaña, nitonkyotaka apaani mainawo imperataarewo. Riyoshiretakairo peyari oitarika awishimoterine atziri. Iroowa ripinatantitariri imperatawori osheki.

¹⁷ Jiroka mainawo oyaatanakeri Pablo, oyaataiyanakenani eejatzi naakapaini, okantzi okaimi: “Jirika shiramparipaini rimperatanewo rinatzi Pawa Jenokisatzi, iriira kamantemirone pawisakoshiretantaiyaari!”

¹⁸ Ari okantapiintaty kiteesheriki, irojatzi owatsimaashiretantakariri Pablo, ripithokashitanakawo, riñaanatanakeri peyari iyoshiretakairori, ikantziri: “Piyaatapithatairo mainawo, iri Jesucristo matemirone naakotakerira iwairo.” Apathakero riyaatapithatanairo peyari.

¹⁹ Ikanta iñaakero imperatawori, riyotanake eero raantaawo osheki koriki. Rotaiyakeri Pablo itsipataakeri Silas, raanakeri jewaripainiki, irojatzi janta ipiyowentantapiintaitaga.

²⁰ Ikantapaakeri yakowentantaneri: “Jirikapaini Judá-ite rinatzi. Rochapishiryaaakeri atziripaini jaka anampiki,

²¹ riyotaayetakeri kaari ashineyetzi rantaitero, tema asheninkapaini rinatzi Roma-satzi.”

22 Ari ripithokashitaitanakari Pablo eejatzi Silas, ikantake yakowentantaneri: “Paatonkoreeri, pipasateri.”

23 Ikanta ripasatakeri, romonkyaakaantakeri. Ikantanake: “Pinkempoyaaperoterira.”

24 Ikemake kempoyaantaneri ikantaitakeri, romonkyaaperotakeri inthomointa, rawitsinayitzitantakari inchakota.

25 Okanta niyanki tsireniri, ramanaiyani Pablo itsipatari Silas romampagaiyani eejatzi, kemaiyatsini itsipa omonkyagaarewo.

26 Omapokashitanaka omoyekanaka, eewokapaakero pankotsi romonkyagaitakerira. Ashitaryaashiwaitanaka rashitakotantitariri, itzintaryaakowitzashitanaka omonkyagaarewo roosotakoweetantakarira kotsirotha.

27 Ari ikakitanake kempoyiiriri, iñaatziro ashitaryaaka rashitakowetakarira, inowikyaanakero rosataamento rishinetya rosataya, roshiyakaatz shiyaka maawoini omonkyagaarewo.

28 Ikaidotanakeri Pablo, ikantziri: “¡Eero pishinewaitashita, irojatzi nisaikaiyini maawoini jaka!”

29 Ikanta jirika kempoyaantaneri ikaimakaantake ootamentotsi, rishiyaperotanakitya ikyappaake, okawaitanaka ithawanakera, rotziwerowashitapaakari Pablo eejatzi Silas.

30 Ari romishitowanakeri, rosampitakeri, ikantziri: “Pinkatharí, ¿litaka nanteri nawisakotantaiyaari?”

31 Ikantanakeri: “Pinkemisantairi Pinkathari Jesús, aritake pawisakotai eeroka eejatzi ikaatzi

saikawankotzimirī.”

³² Ikenkithatakanakeri tsika ikantakota Awinkatharite eejatzi ikaatzi saikawankotakeriri.

³³ Niyankira tsireniri jirika kempoyaantaneri ikiwainiri aawyaakerira pasataantsi. Irojatzi romitsitsiyaatantakariri itsipataakeri isheninkapaini.

³⁴ Raanakeri ipankoki, ipapaakeri rowanawo. Kimoshire ikantanaka jirika ikemisantairi Pawa itsipayetaari ikaatzi saikawankotziriri.

³⁵ Okanta okiteeshetamanai, jirikaga yakowentantaneri ikantakaantakeri kempoyaantaneri, ikantake: “Pomishitowairi jirikapaini.”

³⁶ Ikanta kempoyaantaneri, ikantakeri Pablo: “Inintakaantakena yakowentantaneri nomishitowayetaimi. Kantacha piyaayetai iroñaaka kameetha.”

³⁷ Ikantanake Pablo: “Rosankenatakotane Roma-satzi nini naaka, iro kantacha ripasawaitaitakena janta ipiyowentanta-piintaitaga, te raminawakero tzimatsirika nokenakaashitanewo. Romonkyaakaantakena. ¡Iroñaakama ikowi rimanakaina romishitowaina? ¡Te nokowi! Pinkanteri ripokanake irirori romishitowaina.”

³⁸ Ikanta jirika kempoyaantaneri, ikamantakeri yakowentantaneri. Ikemawake rosankenatakotane rinatzi Roma-satzi, antawoite ithaawaiyanakeni.

³⁹ Jatanake yakowentantaneri, ikantapaakeri Pablo eejatzi Silas: “Pimpeyakotainawo nowasan-ketakaantakemira.” Romishitowakaantairi, ikantawairi: “Piyaatai.”

⁴⁰ Ari riyataiyaini opankoki Lidia.

Ikenkithatakaayetanairi kemisantzinkaripaini, ithaamentashireyetakaanaari, jataiyaini.

17

Ikoshekantaitaka Tesalónica-ki

¹ Ikanta rareetantayetaka Pablo ejatzi Silas ikenayetanake Anfípolis-ki, Apolonia-ki irojatzi rareetantakari Tesalónica-ki, ari isaikiri janta rapatapiintaga Judá-ite.

² Iro rametapiintari Pablo arika rareetya otsipaki nampitsi, ikyaapiintzi rapatotapiintaga Judá-ite, ikenkithatzi. Iroowa rantapaakeri iroñaaka. Irojatzi rapiitantaawori otsipaki kiteesheri rimakoryaantaitari, rapiitairo ejatzi. Ari riñaanaminthatapiintakeri Judá-ite.

³ Rookoyetziniri Osankenarentsipero tsika ikenkithatakota Cristo inkamimotante, rañagai ejatzi. Ikantayetziri: “Jirika Jesúś nokenkithatakotakemiri, iriitake Cristo.”

⁴ Ari ikemisantanake apawopaini Judá-ite, itsipatanakari Pablo ejatzi Silas. Ikemisantaiyanakeni osheki Grecia-thato pinkathatasorentsitaneri, ari okantanakari ejatzi tsinanepaini irooperori.

⁵ Iri kantacha Judá-ite kaari kemisantat-sine, te inimoshiretanakeri. Ipiyotakeri kaariperoshireri. Rotyaantakeri inkoshekantya nampitsiki. ikoshekawankotakari ejatzi Jasón, rithotyaakotziri Pablo ejatzi Silas.

⁶ Te iñaashitari, raanakeri Jasón itsipataanakeri itsipa kemisantzinkaripaini, raanakeri risaikira jewatakaantzirori nampitsi, ikantaiyapaakeni:

“¡Tzimatsi shiramparipaini ochapishiryaantaintsiri nampitsiki, pokake iroñaaka jaka.

⁷ Jirika Jasón oisaiyawakeriri ipankoki! Rithainkayetakero jirika ikantakaantanewo pinkatharitatsiri Roma-ki, ikantaiyakeni: ‘Enitatsi itsipa pinkathari, iita Jesús.’ ”

⁸ Ikanta ikemaitawakero, te inimotanakeri atziripaini eejatzi jewaripaini.

⁹ Ikowakoitakeri Jasón ripinawentya itsipayetakira itsipapaini, ompoñaantyaari ripakagaitairi.

Jatake Pablo Berea-ki itsipatakari Silas

¹⁰ Ikanta kemisantzinkaripaini, rotyaantairi tsireniriki Pablo eejatzi Silas, riyatai Bereaki. Ikanta rareetaiyakani janta, jataiyakeni rapatotapiintaiyanira Judá-ite.

¹¹ Jirikapaini Judá-ite, neshironkatantaneri rinaiyini te roshiyari Tesalónica-satzi, kameetha ikemisantawakero ñaantsi. Ikamaitanakawo kiteesheriki riñaanatanairo Osankenarentsiperó iñaantyaawori kyaaryooperorika ikamantaitziriri.

¹² Osheki Judá-ite kemisantanaantsiri, ari ikantakari Grecia-thato iriiperotatsiri, eejatzi tsinane-paini.

¹³ Iri kantacha Judá-ite nampitawori Tesalónica-ki, ikemakotakeri ikenkithatakaantatzí Pablo janta Berea-ki, pokaiyanakeni, ikoshekawaitapaakari atziripaini.

¹⁴ Iri kantacha kemisantzinkaripaini raanakeri Pablo inkaarecheraaki. Iriima Silas itsipatakari Timoteo ari risaikanake irirori.

¹⁵ Ari rawisakaitanakeri Pablo irojatzi rareetantakari Atenas-ki. Ikanta ripiyaiyaani

Berea-ki, ikantapairi Silas itsipatakari Timoteo: “Ikaimakaantaimi Pablo, piyaate intsipaite.”

Risaiki Pablo Atenas-ki

¹⁶ Ikanta Pablo royaawentziri Silas itsipatakari Timoteo janta Atenas-ki, te inimoteri irirori iñaayetzirira Atenas-satzi ipinkathayetziro oshiyakaawontsi. *

¹⁷ Iroowa ikenkithatakariri Judá-ite, ee-jatzi itsipapaini pinkathatasorentsitaneri janta rapatotapiintaitaga. Osheki ikenkithatapiintake eejatzi kiteesheriki ipiyotapiintaiyanira atziripaini nampitsiki.

¹⁸ Riñaanaminthatakeri eejatzi yotaneriite nampitsiki. Eenitatsi kantayetatsiri: “¿Litamatsitaka ikenkithatakotziri kenkithawaitashitachari?” Ikantaiyini itsipa: “Ikenkithatakotaziiri itsipasatzi Pawa.” Iro ikantantari jirikapaini tema Pablo ikamantantazziro Kameethari Ñaantsi jimpe ikantakota Jesús, rañaantaari. †

¹⁹ Ikanta romiñaanakeri otzishiki jitachari “Areópago”, ari ipiyotapiintaiyani. Rosampitakeri: “Janjaatya pinkenkithatakotenawo owakeratatsiri piyotaantziri nonampiki.

* **17:16** Jiroka nampitsi Atenas otzinkami inatzi nampitsi, ari inampitawori osheki yotzinkaripaini Grecia-thato. † **17:18** Iitaitziri jaka “yotaneriite” iriiyetake kemisantayetzirori okaatzi riyotaantayetziri jitachari “Epicuro”, ikantzi: “Iro kowaperotacha ankimoshirewaite.” Eenitatsi itsipa iitaitziri jaka “yotaneriite” iita “Stoa-satzipaini”. Ikemisantaiyironi iriroripaini okaatzi riyotaantakeri pairani jitachari “Zenón”, ikantake: “Ontzimatye añaakoperotya.” Iroowa iiyetantari “Stoa-satzipaini”, ipiyotapiintaiyani iitaitziro riñaaneki iriroripaini “Stoa”, owaankiityagaantsi inatzi, pothopooki ikantayetziro.

20 Tema pikenkithatakaakenawo kaari nokemapiintaiyini. Nokowaiyini niyote oita kantakotachari.”

21 (Tema okaatzi itzimawentziri Atenas-satzipaini itsipatakari areetzinkaripaini, ikemisantayetziro owakerayetatsiri ñaantsi, rowaayimaitawo.)

22 Ikatziyanaka Pablo ipiyowentitakarira, ikantanake: “Atenas-satzipaini, noñaakemi tzimatsi osheki piawaneyetari, pipinkathat-apaintziri.

23 Nokenayetake pinampiki, noñaayetakero pitaapokimento. Eenitatsi apaani osankenataka, okantzi: ‘PAWA KAARI RIYOYEETZI.’ Irijatzira nokenkithatakotzimiri naaka.

24 Iri wetsikakerori kipatsi eejatzi maawoini tzimantayetawori, irijatzzi Pinkathariwentzirori inkite eejatzi kipatsi. Te risaikantawo tasorentispango riwetsikanewo atziripaini.

25 Te ikoityiilo irirori riwetsikaiteniri tsikarika oitya. Tema iriitake añaakaayetairi maawoini aakapaini, irijatzzi owifeenkatakayetairi, ipayetairo maawoini tsikarika oiyeta.

26 Iriitake wetsikakeriri etakawori atziri, ishenitakagairi, roiwawagairi inampitantaawori maawoini kipatsi. Ikenkithashiretzitaka tsikarika onkaate osamanite inampiyetyaawo tsikarikapaini.

27 Iro rantantayetakawori jiroka, rithotyaakoitantaiyaariri. Oshiyawaitakawo impampipookiwaitatyeeme rithotyaakoitziri. Ari iñaayeetairi. Tema te intaina risaiki Pawa, ari itsipayetai maawoini aakapaini.

²⁸ Iriira añaakaayetairi iroñaaka, ranashitakaayetai, iri tzimakaayetairi. Irojatzi ikantayetzitari pisheninkapaini, kenkithayantzi, ikantake: ‘Rashiyetai Pawa.’

²⁹ Tema rashitaira Pawa, ontzimatye ayote te okameethatzi oshiyakayeri oshiyakaawontsi riwetsikanewo atziripaini, riwetsikayetziri ooro, koriki, mapi.

³⁰ Tema pairani osheki ikisashitakawo Pawa okaatzi rantashiwaitakari imasontzinkakiini atziripaini. Iro kantacha iroñaaka ikantayetai maawoini tsikarikapaini inampiyeetawo, ikantzi: ‘Pipakagairo kaariperori pametashiyetari.’

³¹ Tema Pawa riyoyaake apaani atziri, iriitake rotyaantairi raminakoyetairo okaatzi antayetakeri. Tema riyotairo Pawa tsikapaiteka rantero. Tema roñaagantairi atziri rowiriintairi ikamawetakaga.”

³² Ikanta ikemawakera ikenkithatakotakeri ipiriintaaga kaminkari, ishirontaiyanakarini. Tzimatsi itsipa kantanaintsiri: “Apiitero paata nonkememi pinkenkithatakotero jiroka.”

³³ Riyaatapithatanairi Pablo.

³⁴ Iri kantacha eenitatsi oyaatanakeriri, kemisantayetai irirori. Jirika ikaatzi kemisan-tanaatsiri: Dionisio, iri tsipatapiintawetariri ipiyotapiintaga Areópago-ki. Opoñaapaaka tsinane jitachari Dámaris, tzimatsi otsipapaini.

18

Areetaka Pablo Corinto-ki

¹ Okanta okaatapaake jiroka, rishitowanake Pablo janta Atenas-ki, jatake Corinto-ki.

² Ari iñaake apaani Judá-ite jitachari Aquila, Ponto-satzi rinatzi jirika. Owakera rareetaka Aquila itsipatakawo iina jitachari Priscila ipoñaakawo Italia-ki, tema pinkathari Claudio ikantakaantake janta Roma-ki rishitowayete maawoini Judá-ite. Jatake Pablo rareetari Aquila.

³ Ari risaikapaake Pablo itsipatapaakari. Tema iro rantaware jirika, rishirikayetziro tontamawotatsiri, ipankoitawo. Irojatzi rantaware pairani Pablo irirori.

⁴ Ari ikantapiintatyा Pablo riyatatzi rapato-tapiintaitaga kiteesheriki rimakoryaantaitari, ikenkithatakaantayetake ompoñaantyaari roitsi-nampaantyaariri Judá-ite inkemisantakaayetairi, eejatzi Grecia-thatotatsiri.

⁵ Ikanta Silas eejatzi Timoteo areetaiyapaakani ipoñagaawo Macedonia-ki. Ari ikamaitanakawo Pablo ikenkithatakaantanake. Ikantayetakeri Judá-ite: “Jirika Jesúś, Cristo rinatzi.”

⁶ Iri kantacha te inimoteri Judá-ite, kisaneentanaka, ikaweyawaitanakeri. Ari rotakanairo iithaare Pablo riyatantyaari te ikemisantaiyini, ikantanakeri: “Eerokaga kantakaanterone pimpeyawaitantyaari, te naaka kantakaanterone. Iri nipithokashite iroñaaka kaari asheninkata.”

⁷ Shitowanake rapatotapiintaitaga. Jatake ipankoki apaani atziri jitachari Justo, pinkathatasorentsitaneri rinatzi. Risaikanampitziro irirori rapatotapiintaiyanira Judá-ite.

⁸ Ikanta Crispo, jewatatsiri rapatotapiintaga Judá-ite, ikemisantanakeri Awinkatharite, rimatanakero eejatzi ikaatzi saikapankotziriri. Iro rantanakeri eejatzi osheki Corinto-satzi,

ikemayetakero ñaantsi, kemisantayetanake, romitsitsiyaataitakeri.

⁹ Ikanta Pablo, romishimpyaakeri Awinkatharite tsireniriki, ikantakeri: “Eero pithaawi. Piyaatakairo pinkamantanero ñaantsi jaka, eero pimairetzi.

¹⁰ Tema ari notsipatzimi naaka, eero rowatsinaawaitaitzimi jaka, tema tzimatsi osheki nashiyetaari naaka jaka nampitsiki.”

¹¹ Iro risaikantanakari Pablo Corinto-ki, anaaneentakero apaani osarentsi risaikawaitake. Riyotaantayetziro riñaane Pawa. *

¹² Ikanta reewaritantari Galión janta Acayaki, retanakawo Judá-ite itzimawentanakeri Pablo. Irojatzi raantanakariri jewariki.

¹³ Ikantapaakeri: “Jirika atziri ikenakaashitakawo riyotaayetziri atziripaini impinkathatairi Pawa, ripiyathatakawo inintakaantaitziri.”

¹⁴ Iro riñaawaitanakeme Pablo, akanake Galión ikantanakeri Judá-ite: “Iroorika pikenkithatakotzi ritsitokante jirika atziri, aritake nonkemisan-takemi pikantanari.

¹⁵ Iro kantacha, aamaaka pikantakotawakaashitawo okaatzi piñaawaitashitari eero ka, paakowaitashitari, piitashiwaitari: ‘Inintakaantaitanewo.’ Piyotaiyeroni eerokapaini tsika pinkantero, te nimeraawentawaitziro naaka.”

¹⁶ Romishitowawetaari jirikapaini.

* **18:11** Kantakotachari jaka “anaaneentakero apaani osarentsi”, irojatzi ikantaitziri apaani osarentsi eejatzi 6 kashiri.

¹⁷ Ikanta Grecia-thato, rotaiyanakeri jitachari Sóstenes, iri jewatzitachari rapatotapiintaga Judá-ite. Ripasawaitanakeri. Iri kantzimaitacha Galión, te rimatzimaitawo irirori.

¹⁸ Osheki kiteesheri risaikawaitanai Pablo janta Corinto-ki. Iroatzi ryaatantaari itsipatanaawo Priscila eejatzi Aquila, ryaatairo Siria-ki. Okanta janta Cencrea-ki, tekera rotetanaiyaata, rameetanakero iishi, rimonkaatantyaawori ikashaakaantakeri.

¹⁹ Ikanta rareetaka Efeso-ki, jatake Pablo rapatotapiintaitaga, ari ikenkithatakaayetaapaakeri Judá-ite. Ari rookanairi Aquila eejatzi Priscila.

²⁰ Ikowakowetawaari Judá-ite osamani risaikanake, iri kantacha Pablo te ikowi.

²¹ Ikantanairi ryaatzimatanaira: “Ontzimatye nareetaiya Jerusalén-ki roimoshirenkaitaga. Iriirika Pawa kowatsine, aritake nipiye noñaayetaatemi.” Iroatzi rotetantanaari Pablo, jatai.

Piyaawo Pablo Antioquía-ki, ikenkithatanai ee-jatzi

²² Ikanta rareeta Cesarea-ki, awisapai Jerusalén-ki riwethatapaiyaari kemisantzinkaripaini. Iroatzi rawisantanaari Antioquía-ki.

²³ Okanta osamanitake, rapiitairo rareetantayeta apawopainiki nampitsi janta Galacia-ki eejatzi Frigia-ki, raawyaashiretakaayetairi riyotaanewo.

Ikenkithatzi Apolos Efeso-ki

²⁴ Okanta janta Efeso-ki, areetaka apaani Judá-ite jitachari Apolos, Alejandría-satzi

rinatzi. Kameetha ikenkithatzsi, riyotakotziro kameethaini Osankenarentsipero.

²⁵ Eenitatsi kenkithatakotakeniriri Juan-ni omitsitsiyaatantanerri, ikenkithatakoitakenirri eejatzi ikamantantakeri Juan-ni ikantakota Jesús. Ari iweyaa riyotakotziro irirori. Iro kantacha, kameetha ikanta rooñaawontawetawowa ikenkithatakotziri Jesús.

²⁶ Ari ikenkithatakaantapaake Apolos rapato-tapiintaitaga. Ikanta okemakeri Priscila eejatzi Aquila, raanakeri Apolos, riyotaakeri tsika ikan-takoperota Jesús.

²⁷ Ikowake Apolos rawishe Acaya-ki. Ari ipawakeri kemisantzinkaripaini Efeso-satzi apaani osankenarentsi raakameethatantawakyaariri Acaya-satzi. Ikanta rareetaka Acaya-ki, osheki ithaamentakaapaakari kemisantzinkaripaini ikaatzi ineshironkayetairi Pawa.

²⁸ Rimatziro Apolos roitsinampaayetakeri Judá-ite, roñaagayetziri Osankenarentsipero ikenkithatakotziri Cristo, iro opoñaantari riyotakoitantanakariri Jesús, iriitake Cristo.

19

Areetaawo Pablo Efeso-ki

¹ Ikanta Apolos risaiki Corinto-ki, anonkanake Pablo ochempiki, areetaka Efeso-ki. Iñaapaake kemisantawetaachari.

² Rosampitapaakeri: “¿Risaikashiretantakemi Tasorenkantsi owakera ikemisantakagaitakemi?” Ari ikantaiyanakeni jirikapaini: “Te. ¿Oitaka

kantakotachari jiroka? ¿litaka ikantaitziri Tasorenkantsi?”

³ Rakanake Pablo, ikantzi: “¿litaka pomitsitsiyaawentakari pikemisantawetaga?” Ikantaiyini jirikapaini: “Iro nomitsitsiyaawentari riyotaan-takeri Juan-ni.”

⁴ Ikanta Pablo riyotaanakeri, ikantziri: “Romitsitsiyaatantzi Juan-ni, roshiyakaawentatziiro ripakagaitairo kaariperori. Iro ikantzitakari Juan-ni: ‘Pinkemisantairi awotsikitaintsiri, iri poyaata-paakenane.’ Iriitake Jesucristo ikenkithatakotakeri jaka.”

⁵ Ikanta ikemaiyawakeni jirikapaini, romitsitsiyaawentanakari Awinkatharite Jesús, raakotainiri iwairo jirikapaini.

⁶ Ikanta Pablo rotzimikapatziitoyetantakari rako, ari risaikashiretantanakari eejatzi iriroripaini Tasorenkantsi. Riñaawaiyetanakero otsipasato ñaantsi. Ikamantanakero ñaantsi riyotakaayetanairiri Pawa.

⁷ Ikaataiyini 12.

⁸ Irojatzi rawisantakari Pablo rapatotapiintaiyanira Judá-ite, ari ikenkithatakanapaake ikaatzi mawa kashiri. Tekaatsi inthaawakaiya, ikowi riyotakaayetairi atziripaini jimpe ikanta Pawa ipinkathariwentantai.

⁹ Iro kantacha tzimatsi apawopaini kisoshirewaitatsiri, te ikowi inkemisantaiyeni, ikishimawaitakeri tsipatanaariri iitaitziri “Awotsiweri”. Ikanta Pablo, rintainaryaanakeri jirikapaini. Romiñaananakeri riyotaanewopaini iyaapapankoteki iitaitziro “Tiranno”. Ari riyotaapiintakeri maawoiniki kiteesheri.

¹⁰ Ari ikantapiintanakitziiro, tzimakotake apite osarentsi. Ikemakoyetairo riñaane Pawa nampiyetawori Asia-ki, Judá-ite, Grecia-thato, maawoini.

¹¹ Osheki ritasonkawentantayetake Pablo, ikan-takaakari Pawa.

¹² Etsiyatakotaantzita imanthaki. Arika ragaitero tsikarikapaini, riterotantaityaari mantsi-yari, aritake retsiyatakotai. Imatziri eejatzi etsiy-atakotakagairi raaganewo peyari.

¹³ Eenitatsi apaanipaini Judá-ite kenawaitatsiri janta retsiyatakotakayitari eejatzi irirori raaganewo peyari. Ikowake iroñaaka raakotairi iwairo Jesú, retsiyatakotaantyaariri. Ikantawetapaakari peyari, ikantziri: “¡Pintainaryapithateri, naakotziro iwairo Jesú, ikenkithatakotziri Pablo!”

¹⁴ Iroowa rantawetakari 7 itomipaini Judá-ite jitachari Esceva, jewawetariri imperatasorentitaneri janta.

¹⁵ Iro kantacha rakanake peyari, ikantziri: “Noñiiri Jesú, niyotziri Pablo. Eeroka, te niyotzimi.”

¹⁶ Ikanta raayiri peyari rotaiyanakeri jirikapaini, antawoite iñaashintsitanakari roitsinampaakeri maawoini, romishiyairi ipankoki raatonkoryaamerekitakeri, antawo rowatsinawaitakeri iwathaki.

¹⁷ Ikemaiyakeni nampitawori Efeso-ki, ikemake Judá-ite eejatzi Grecia-thato, maawoini. Osheki ithaawaiyanakeni. Iro opoñaantari ipinkathaitantanakariri Awinkatharite Jesú.

¹⁸ Ari ripokapaake osheki kemisantanaatsine,

ithawetakoyetapaakero iyaariperonka.

¹⁹ Ikanta sheripiyariwetachari, ramayeta-paakero tsika riñaanatakotapiintziro isheripi-yarinka, ritaapaakero. Ikanta raminakoitakero tsika okaatzi ipinata ritagaitakeri, areetaka ikaatzi: 50,000 ikithoki koriki.

²⁰ Eeke ikemakoperoitanakitziiri Awinkatharite.

²¹ Okanta ithonkapaaka jiroka, rominthatanakawo Pablo rareetantya Macedonia-ki eejatzi Acaya-ki. Irojatzi rawisantakyaari janta Jerusalén-ki. Ikantzitaka eejatzi: “Arika niyaatake Jerusalén-ki irojatzi nawisantakyaari Roma-ki.”

²² Rotyaantake Macedonia-ki apite amitakotapi-intakeriri, Timoteo eejatzi Erasto, eenitatsi risaikanake irirori Asia-ki.

Ikoshekantaita Efeso-ki

²³ Okanta janta Efeso-ki antawoite riñaanatawakaawentaitakari iitaitziri “Awotsiweri”.

²⁴ Iri poñaakaantakawori jitachari Demetrio, kotsiropakoimpeki. Eenitatsi oshiyakariri irirori ri-wetsikayetziro oryaani oshiyakaawontsi iyaappankote iwawanetashitaitari iitaitziro “Diana”. Iriira raantayetari osheki koriki.

²⁵ Ipiyotaiyakani maawoini kotsiropakoimpeki. Ikantake Demetrio: “¡Shiramparipaini! Iroowa añaantaiyarini aakapaini jiroka antaware.

²⁶ Pikemakotaiyakerini iitaitziri Pablo, roitsi-nampaakeri osheki atziri, ikantayetziri: ‘Riwetsikanewo atziripaini te roshiyari Pawa.’ Te apatziro ikantakero anampiki Efeso-ki, rimatzi-takawo maawoini jaka Asia-ki.

27 Te apatziro onkantzimoshiretai eerowa ramantayeteetairi awetsikanewo, iroowa kantzimoshireperotairi ompeya inkemakoitero maa-woini awawane Diana jakä Asia-ki, ari ripakagaitanakero ripokaitzi oyaapapankoteki.”

28 Ikanta ikemaiyawakeni, antawo ikisaiyanakani, ikaimaiyanakeni: “¡Irooperori inatzi Diana, awawanetari jakä Efeso-ki!”

29 Eeke rakisheenkatananakitzi jirikapaini. Iro-jatzi rotaiyaitantanakanariri Gayo eejatzi Aristarco, raanakeri ipiyotaiyapiintanira atziripaini. Jirika ragaitanakeri iriitake itsipatapiintari Pablo rareetantayeta, Macedonia-satzi rinaiyini.

30 Ikowawetaka Pablo inkyapaakeme irirori, temaita rishineteri riyotaanewo.

31 Ari ikantakari eejatzi ikaatzi jewaripaini raa-patziyanewo Pablo, ikantakaantakeri: “Eerowa pimatxitawo eeroka janta.”

32 Ikanta janta ipiyotaiyakanira, eeke richeraacheraataiyatziini, te oshiyawakaa okaatzi richeragaiyirini. Tema jirika atziripaini te riyoperotaiyini oita ipiyowentaiyarini, ikaimaminthawaitashitaiyani.

33 Iri kantacha apawopaini Judá-ite, iñaakeri Alejandro rosatekaka ipiyotaiyakanira, ishintsineentanakeri riñawaite. Ikanta Alejandro rowatzinkawakotanaka imairetantlyaarime, kenkithawetanaawo.

34 Iro kantacha riyotake atziripaini Judá-ite rinatzi jirika Alejandro, eekero rapiitanakitzi-iro ikaimaiyini, osamani ikantaka ikaimi, ikan-taiyini: “¡Irooperori inatzi Diana, awawanetari

jaka Efeso-ki!" *

³⁵ Irojatzi ikatziyantanakari osanke-nawairentzi, romairyaaikeri, ikantakeri: "Efeso-satzí, riyotaitzi aakapaini kempoyaawentzirori oyaapapankote awawane Diana, eejatzi oshiyakaawo poñainchari inkiteki.

³⁶ Ontzimatye pinkenkithashiryaawakya kameetha, eero pikoshekantashiwaita.

³⁷ Tema jirika pamayetakeri, te rowaariper-otziro yaapapanko, te ikishimaminthatziro awawane.

³⁸ Ikowirika riyakowentante Demetrio itsipayetakari ikaataiyinira, raanakeri ajewariteki raminakoteri, iri wetsikerone okaatzira kantzimoshiretariri.

³⁹ Okowarika ayotakotero maawoini aakapaini, kantacha apatoteri maawoini jewari, raminakotantyaawori.

⁴⁰ Okaatzi awisaintsiri iroñaaka, aritake rowasankewentaitakairo akoshekantaga. Eero otzimi oita ankanteri apiyakowentantyaari."

⁴¹ Ikanta rithonkakero ikenkithawaitakero jiroka, rotyaantairi atziripaini.

20

Riyaatzi Pablo Macedonia-ki eejatzi Grecia-ki

¹ Ikanta reshitanakero rakisheenkataiyini, ipiyotakeri Pablo riyotaanewo ikaminaayetanairi. Ari riwethatanaari, jatake Macedonia-ki.

* **19:34** Kantakotachari jaka "osamani ikantaka ikaimi", apite hora osamanitake.

² Ikanta ikenayetanairo nampitsiki risaikayetzira iyekiite, ikaminaayetanairi. Irojatzi rareetantakari Grecia-ki.

³ Ari risaikawaitapaake ikaatzi mawa kashiri. Iro rotetanaiyaame riyaatantyaari Siria-ki, ari ikemake rowamaatyeeeri Judá-ite rareetakyaarika janta. Iroowa ripiyantanaari Macedonia-ki.

⁴ Ari itsipatanaari Sópater, Berea-satzi rinatzi irirori, itomi Pirro. Ipoñaapaaka Aristarco, eejatzi Segundo, Tesalónica-satzi rinatzi. Eejatzi Gayo, Derbe-satzi rinatzi. Eejatzi Timoteo, Tíquico, Trófimo, Asia-satzi rinayetatzি jirika.

⁵ Ari reewataiyanakeni jirikapaini iyeki, royaawentapaakena Troas-ki notsipatakari Pablo.

⁶ Okanta awisanake kiteesheri rowapiintantaitawori tashirentsiponka, ari notetanaari Filipos-ki. Awisake 5 kiteesheri, noñaayetapairi janta Troas-ki, ari nisaikaiyapaakeni okaatzi 7 kiteesheri.

Rareetantaka Pablo Troas-ki

⁷ Okanta imonkaatapaa kiteesheri rapatotantapiintaitari, ari nopiyotaiyakaní nontzipetowero pan, ikenkithatataantake Pablo. Tema nawisatyé onkiteeshetamanairika, eekero riyaatakaanakitziiro ikenkithatzi

niyankiityaakotakena. *†

⁸ Ari nopyotaiyakani jenoki pankotsiki, osheki ootamentotsi roonthotaitake.

⁹ Ikanta apaani mainari jitachari Eutico risaikake omooki pankotsi. Tema osamanitake ikenkithatake Pablo, ayimatakeri iwochokine mainari, paryaake isaawiki, kamapaake. ‡

¹⁰ Ayiitanake Pablo, roiyotashitapaakari mainari, ithomaapaakeri. Ikantanake: “Eero pithaawaiyini, añagai.”

¹¹ Eejatzi ripiyanaawo Pablo jenoki, itzipetowapaakero pan, owaiyakani. Eekero ikenkithatanakitzi, irojatzi okiteeshetantanakari. Ari nawisaiyanakeni.

¹² Iriima mainari, ragaitanairi rañagaira. Iroowa thaamentashiretakaaperotanakariri.

Rawisanake Troas-ki irojatzi Mileto-ki

¹³ Ari neewatanake naakapaini, note-taiyanakani irojatzi Asón-ki, ari no-kenkithashiryaaka naanairi Pablo, tema ikowatzi irirori inkenanake awotsiki.

* **20:7** Kantakotachari jaka “rapatotantapiintaitari”, irojatzi ikantaitzitari “etapiintawori kiteesheri otsipaki tominko”. † **20:7** Kantakotachari jaka “intzipetowaitero pan”, iro rantayetanairi kemisantzinkaripaini arika inkenkithashiryaakoteri Jesucristo ikamimotantakera. Ari ikantziro rakiyootawakagaiyanira, itzipetowiro pan, rowaiyani, riraiyini eejatzi imere. Tema roshiyakotatyari Jesús jimpe ikantanairo riweyaantanaawo rowakaanaari ryotaanewopaini. Iroowa ikenkithatakotapiintaitakeri, ikantaitzi “intzipetowaitero pan.” ‡ **20:9** Kantakotachari jaka “paryaake isaawiki”, iroowa ikantakoitziri pankotsi riwetsikaitziri, opewiryaa okaatzi mawa. Ari ipoñaanaka iparyaake mainari irojatzi isaawikinta.

14 Ikanta noñaapairi Pablo janta Asón-ki, ari rote-tanaawo, jataiyakenani Mitilene-ki.

15 Irojatzi nawisantanakari janta, nokiteeshetakotapaake Quío-ki, okanta namaatakotanai apaani kiteesheri areetakena Samos-ki, naatakotapaintzi Trogilio-ki. Irojatzi nawisantanakari otsipaki kiteesheri, areetaiyakenani Mileto-ki.

16 Irojatzi nawisantanakawori Efeso te naata-paintzi, tema te ikowi Pablo raatapainte janta, eero rosamanitanta Asia-ki. Ikowatzi rareetaiya intsipaite Jerusalén-ki, roimoshirenkapairo kiteesheri “Owiitaantsi”. §

Inkenkithatakairi Pablo rantarite Efeso-satzi

17 Ikanta nareetaka Mileto-ki, ikaimakaantapaakeri Pablo itzinkamipaini kemisantzinkari Efeso-satzi.

18 Ikanta ripokaiyakeni, ikantawakeri: “Piyotzi eerokapaini jimpe nokanta nisaikimotaiyakemini owakera nareetantakari Asia-ki.

19 Ari nokantapiintatya nantawaitziniri Awinkatharite, tsinampashire nokanta, osheki niraawaitaka noñaakerowa inkoshekename Judá-ite.

20 Iro kantacha te nipakaanakero nokenkithatakaayetzimiro onkaate pinintagaiyaari, niyotaapiintakemi pipankopainiki, eejatzi ipiyotapiintaga atziripaini.

21 Nokenkithatakaayetziri nosheninkapaini Judá-ite eejatzi Grecia-thato, nokantayetziri:

§ **20:16** Kantakotachari jakaa “Owiitaantsi”, irojatzi ikantaitzitari “Pentecostés”.

‘Pipiyashitairi Pawa, pawentagaiyaari Awinkatharite Jesucristo.’

²² Iroñaaka niyaatatyé Jerusalén-ki, Tasorenkantsira thaamentashiretakaanari, te niyotzimaitya oitarika awishimotenane janta.

²³ Iro kantacha tsikarika niyaayetzi, riyoshire-takaana Tasorenkantsi, ikantana: ‘Osheki pinke-maatsiwaityaawo romonkyagaitemi.’

²⁴ Iro kantzimaitacha naaka, tekaatsi oitzimotena onkaate nonkemaatsiwaityaari, te netakoneta. Iro kowaperotacha nonkimoshirewentero noshiyakaanakero irootaintsime nanaakotante nareetya jimpe iweyaa nishiye. Tema irootaintsi nithotyeero ikantakenari Awinkatharite Jesúś nonkamantantairo Kameethari Ñaantsi okantakota ineshironkayetaira Pawa.

²⁵ Nokenkithatakaayetakemi eejatzi eerokapaini tsika okantakota ipinkathariwentantai Pawa. Eero papiitairo piñaayetaina.

²⁶ Irootake nokowantari nonkantemi, te naaka kantakaashityaawone intzimantaiyaari peyashitaachane,

²⁷ tema nokenkithatakotakemiro maawoini ikenkithashiriitakari Pawa ranteri, tekaatsi apaani nimanimotemi.

²⁸ Pinkempoyaayetaiya, ari pinkantakaayetaiyaari apatotapiintachari tsika rowayetakeri Tasorenkantsi. Poshiyaiyaari kempoyaantaneri pinkempoyaayetairi kemisantanairiri Awinkatharite, tema iriitake ikapathainkawentake ripinawentairi.

²⁹ Niyotzi naaka arika niyaatai, ripokapaake

itsipapaini, roshiyapaakyaari koweenkari owan-taneri, inkowapaake rithonkeri kemisantzinkari-paini.

³⁰ Ari intzimanake pikaataiyinira eerokapaini amatawitanakerine kemisantzinkaripaini, ripakaakaanakeri ikemisantzi, inkantakaakyaari riyotaanewo rashি irirori.

³¹ Pinkenkithashireero eerokapaini, mawa osarentsi nisaikimowaitapaintzimi, te nipakaapainterо nokaminaayetzimi maawoini, niraakowaitakemi.

³² Nawentaari naaka Pawa iyekiite, iriira aminawentemine, iriitake neshironkatemine, tema irootake ikantayetakairi. Ari inthaamentakaayetaimi, aritake iñaakaayetaimiro okaatzi ikowakaakeriri maawoini oiteshiretaarewo.

³³ Te niyotziro naaka noñaamatakotantyaari, koriki, ooro, eejatzi ikithaataitari.

³⁴ Piyotaiyini eerokapaini, naakatake antawaitantsiri nakoki naantari koityimoyetanari, ari nonkantzitakari eejatzi naayiniri koityimoyetariri ikaatzi tsipayetakenari.

³⁵ Ari nokenakairo niyotaantakemirori jimpe ankantero antawaiperotai, aneshironkayetairi koityaawaitatsiri. Iroowa pinkenkithashiretantaiyaawori ikenkithatakotapaintziri Awinkatharite Jesús, ikantake: ‘Osheki ikimoshirewentaitziri neshironkatantaneri, anaanakero okaatzi ikimoshirewetanakaga ipaitakeri.’ ”

³⁶ Ikanta ikaatanakero Pablo ikantakero jiroka, rotziwerowanaka ramanakaanaari maawoini, piyotainchari.

³⁷ Maawoini riragaiyanakani, rawithakitaiyakerinira Pablo, riwethatawaari riyaataira.

³⁸ Owashire ikantaiyanakani, tema ikantakerira eero iñagairi. Ari royaataiyanakerini irojatzi rotetantanaari Pablo.

21

Riyaatantaari Pablo Jerusalén-ki

¹ Ikanta nookanairi iyekiite, otetaiyanaanani, tampatzika nowanakero niyaatake Cos-ki, okanta okiteeshetamanai areetakena Roda-ki, nawisanake irojatzi Pátara-ki.

² Ari noñaapaakero antawo pitotsi jatatsine Fenicia-ki, ari notetaiyanakani.

³ Okanta namaatakotzi, naminakotanakero othampishi Chipre nampateki, nokenakotanake nakoperoki irojatzi Siria-ki. Eenitatsi owaagawontsi rookaitanakeri Tiro-ki, ari naatakotaiyapaakeni.

⁴ Noñaapaatziri kemisantzinkaripaini, ari nisaikimowaitanakeri okaatzi 7 kiteesheri. Ikantawakeri Pablo: “Eero piyaatzi Jerusalén-ki.” Iro ikantantari, riyoshiretakaatziiri Tasorenkantsi.

⁵ Okanta imonkaataka 7 kiteesheri, nawisan-tanaiyaari, ari royaataiyakenani iyekipaini, itsipayetakawo iina, eejatzi reentsite. Irojatzi othapiki nampitsi, ari notziwerokaiyapaakani impanekiiteki, namanaiyani.

⁶ Ari niwethatawakaanaa, otetanaana naakapaini, piyaiyanaani irirori ipankokipaini.

⁷ Irojatzi namaatakotantanaari areetakena Tolemaida-ki, ari niwethatapaari iyekipaini, apaani kiteesheri nisaikimowaitanakeri irirori.

⁸ Okanta okiteeshetamanai awisakotanakena, areetakena Cesarea-ki. Irojatzi nokenantanakari ipankoki Felipe kenkithatakananteri, ari nisaikapaake. Jirika Felipe iriitake apaani kaatatsi pairani ⁷ rowaitakeri ramitakoyeteri Otyaantaperori.

⁹ Eenitatsi Felipe rishinto mainawo okaatzi 4, kamantantanewo inaiyini.

¹⁰ Shekitake kiteesheri nisaikapaake janta, ari rareetakari kamantantaneri ipoñaakawo Judea-ki, iita Agabo.

¹¹ Ikanta iñaayetapaakena raapaakero romathakiro Pablo, roosotapaakawo rakoki eejatzi iitziki ikenkithawaitanake, ikantzi: “Ari inkantyaari ashitakawori jiroka omathakirontsi, roosoteri Judá-ite janta Jerusalén-ki, raanakeniri kaari ashenkata. Iroowa riyotakaanari Tasorenkantsi.”

¹² Ikanta nokemaiyawakeni, nokantakantawetanakari Pablo: “Eero piyatzi Jerusalén-ki.” Ari ikantawetakariri eejatzi Cesarea-satzi.

¹³ Iro kantacha ikantanake irirori: “¿Litaka piraantaiyarini, antawowa powashiretakaakena? Kowakena naaka. Arika roosoitakena irojatzi nonkamawentantakyaariri Awinkatharite Jesús janta Jerusalén-ki, imawaityaata.”

¹⁴ Tera noitsinampaatyeri, apatziro nokantanake: “Imatyaaata ikowiri Awinkatharite.”

¹⁵ Okanta okaatapaake jiroka, wet-sikaiyanaanani, jataiyakenani Jerusalén-ki.

16 Ari royaataiyanakenani Cesarea-satzi yotaarewopaini rinatzi. Iriira aanakenari ipankoki Chipre-satzi jitachari Mnasón, pairanitake riyotaarewotzi jirika, iriitake nimayimotaiyakerini.

Rotaiyaitakeri Pablo tasorentsipankoki

17 Ikanta nareetaiyapaakani Jerusalén-ki, kimoshire ikantaiyani iyekiite iñaawakenaga.

18 Okanta okiteeshetamanai, raanakena Pablo nareetyaari Jacobo, ari risaikitakari eejatzi maa-woini itzinkamipaini.

19 Riwethatapaakari Pablo, ikamantapaakeri maawoini oita rantakaayetakeriri Pawa janta inampipainiki itsipasatzi atziripaini.

20 Ikanta ikemaiyawakeni, ithaamentanakari Pawa. Irojatzi ikantaitantanakariri Pablo: “Iyekí, imapero ishenitake jaká asheninka Judá-ite kemisantanaitsiri, tzimimaitacha rotsiwakak-agaitari kemisantzinkaripaini rimonkaatero Inintakaantitanewo rosankenatakeri Moisés-ni.

21 Ikemakotakemi piyotaayetakeri asheninka-paini nampiyetawori otsipaki nampitsi, pinkantayeterime: ‘Te okowaawo pinkemisantero Inintakaantitanewo rosankenatakeri Moisés-ni, te okowaawo pitomeshaanitairi pitomipaini, te okowaawo eejatzi antayetairo ameyetari pairani.’

22 ¿Tsika ankantyaaka? Yoyetake iroñaaka asheninka, areetaimi jaká.

23 Jiroka kameethatatsiri panteri: Eenitatsi akaataiyinira jaká, ikaatzi 4 atziri monkaaterone ikowakaantziri.

24 Pintsipatanakyaari jirikapaini, pantero onkaate kitewathatakagaimine. Arika rameetaitakeniri iishi, eeroka pinakowenterine ritagaiteri. Iroowa ryoitantlyaari thaiyaantsi ikantakoitzimiri, tema pimonkaatzitawo eeroka Inintakaantaitanewo.

25 Irooma naakapaini, niyotzi ikenakaashitakawo ashenkinkapaini shintsiwaiwetachari rimonkaatakaanterome Inintakaantaitanewo. Tema ikaatzi kaari ashenkinkayeta kemisantayetaatsiri, notyaantakeniri pairani osankenarentsi okaatzi nokenkithashiretaiyakarini jaka, nokantakeri: ‘Eero powayetari wathatsi ritagaitziniriri iwawanetashiyeetari. Eero powakoyetawo riraa piratsi. Eero pimayempiwaitzi.’ Apatziro rantayetairo jiroka.’

26 Ikanta Pablo raanakeri 4 atziri. Okanta okiteeshetamanai itsipatakari ikitewathatakagaitairi, ikyaaake tasorentsipankoki inkamantante jimpe onkaate kiteesheri ithonkantyaari ikowakaantakeri, ikenkithatakotakero tsikapaite ramantyaari apawopaini rashitakayaariri Pawa.

27 Okanta imonkaatzimatapaaka 7 kiteesheri, eenitatsi Judá-ite poñaayetachari Asia-ki, iñaakeri Pablo janta tasorentsipankoki. Rapatotake atziripaini, ripokashiteri Pablo rotaiyeri,

28 ikaimaiyini, ikantzi: “¡Shiramparipaini! ¡Israel-iite! ¡Pamitakotena! Jirika atziri kenakenayetsiri tsikarikapaini riyotaayetziri atziripaini pithokashitariri ashenkinkapaini, pithokashitawori Inintakaantaitanewo rosankenatakeri Moisés-ni, pithokashitzitawori

tasorentsipanko. Iro maperotaincha, ikyakaakeri kaari asheninkata tasorentsipankoki, rithainkatasorentsiwaitakero.”

²⁹ Iro ikantantawori jiroka tema iñaakitziiri Pablo janta Jerusalén-ki itsipatakari Trófimo poñaachari Efeso-ki, roshiyakaatz ikyakaatz iiri tasorentsipankoki.

³⁰ Piyotaiyapaakani osheki atziri, shiyaiyapaakani, rotaiyapaakeri Pablo, inoshikanakeri romishitowakeri jekokeroini tasorentsipankoki, rashitanakero.

³¹ Iroowetaincha ritsitokerime, ari ikaman-taitakeri reeware owayeripaini poñaachari Roma-ki, ikantaitakeri: “Ikoshekawakagaitya janta.”

³² Ikanta reewarite raanake rowayerite, riyaatashitanakeri ipiyotaiyakanira atziri. Ikanta iñagaiyawakerini ripokake, ripakaanakeri ripasataitziri Pablo.

³³ Rotaiyaitapaakeri Pablo, ikantanakeri rowayerite: “Poosotantyaari apite kotsirotha.” Rosampitanakeri atziripaini: “¿litaka jirika, iitaka rantakeri?”

³⁴ Eenitatsi cheraanaantsiri, temaita oshiyawakaa okaatzi richeraawetayakarini. Te riyotero jewari oita awisatsiri. Rotaantakeri rowayerite raanakeri Pablo rimaapiintaiyinira.

³⁵ Ikanta roirinkakaawetari Pablo, eekero ish-intsitati atziripaini ikowi ripasawateri, iroowa inatantanakariri owayeripaini rookaakowenteri.

³⁶ Maawoini atziri royaatakowentanakeri, ikaimaiyini: “¡Powamayeriwé!”

Ikenkithatakota Pablo

³⁷ Iroowetaincha romonkyagaiteri rimaapi-intzira owayeri, rosampitanakeri Pablo jewari, ikantziri: “¿Kantachama nonkenkithawaitakaimi eepichokiini?” Ari ikantanake jewari: “¡Jimpe piyotziroka niñaane!”

³⁸ ¿Tema Egipto-satzi pinatzi eeroka poñaakaantakawori chapinkipaite koshekaantsi? Pikenapaakero ochempiki, pamake 4000 owayeri.”

³⁹ Ikantanake Pablo: “Judá-ite ninatzi naaka, nopoñaawo Tarso-ki saikatsiri Cilicia-ki. Otzinkami inatzi nonampi. Nokowi pishinetena nonkenkithawaitakairi nosheninka.”

⁴⁰ Rishinetakeri. Katziyanaka Pablo pawitsiki, rowaatzinkawakotanaka imaire-tantyaari isheninkapaini. Mairetaiyanakeni. Kenkithawaitanake Heber-thato riñaaneki irirori, ikantanakeri:

22

¹ “Iyekí, Ashitantanerí, pinkeme nonkenkithatakotya.”

² Ikanta ikemaiyawakerini riñaaneki irirori Heber-thato, imaireperotaiyanakeni. Eeke ikantanakitzi Pablo:

³ “Judá-ite ninatzi naaka. Notzimake Tarso-ki saikatsiri Cilicia-ki, nokimotatake jaká Jerusalén-ki, riyotaanewo Gamaliel ninatzi, niyotakoperotziro Inintakaantanewo acharine-paini. Nokowake naaka noshireperotyaari Pawa, pikantakaga eerokapaini iroñaaka.

⁴ Pairani nopatzimaminthatakeri iitaitziri ‘Awotsiweri’ nowamaayeteri. Osheki

nonoshikayetake atziri, ari nokantakero eejatzi tsinane, maawoini, nomonkyakaantayetakeri.

⁵ Iñaakena maawoini reeware Imperatasorentsi-taarewo eejatzi Itzinkamipaini nantayetakero jiroka. Iriitake pakenawori osankenarentsi ipakaantziri asheninka Judá-ite janta Damasco-ki. Irojatzi niyaatantakari janta nithotyaakoyetziri jirikapaini, namayeteri jakä Jerusalén-ki rowasankeeteri.”

*Ikenkithatakota Pablo ikemisantantaari
(Hch. 9.1-19; 26.12-18)*

⁶ “Okanta nanashita awotsiki, irootaintsi nareetya Damasco-ki, ikaatake tampatzika ooryaa, ari romapokakenari morekanaintsiri inkiteki, roorentapaakena nokatziyakaga,

⁷ tyaanakena kipatsiki. Nokematzi riñaanaitana, ikantzi: ‘¡Saulo! ¡Saulo! ¿Itaka poyaakyaaminthatantanari?’

⁸ Nosampitanakeri naaka: ¿Piitaka Pinkatharí? Ari rakaitanakena: ‘Naakatake Jesús Nazaret-satzi poyaakyaaminthatakeri.’

⁹ Ikaatzi tsipatakenari iñagaiyakerini oorentapainchari, antawoite ithaawaiyanakeni, temaita ikemathatawakeri iriroripaini riñaanaitakenaga naaka.

¹⁰ Ari nosampitanakeri, nokantziri: ‘Pinkatharí. ¿Itaka pikowiri nanteri naaka?’ Ikantanakena Pinkathari: ‘Pinkatziye, piyaate nampsiki Damasco-ki. Ari inkamantaitemi oita panteri.’

¹¹ Imawityaakitakaanakena oorentakenari, rakathatashitaana notsipayetakari irojatzi Damasco-ki.

12 Ari risaikiri janta atziri iita Ananías, pinkathatasorentsitane rinatzi, rimonkaayetziro Ínintakaantaitanewo rosankenatakeri Moisés-ni. Pinkatha rowiri maawoini Judá-ite nampiyetawori Damasco-ki.

13 Pokake Ananías iñeena. Ikanta rareetapaaka, ikantapaakena: ‘Iyeki Saulo, pokiryagai.’ Ap-athakero nokiryaanai, aminawaitanaana.

14 Eeke ikantanakityaana Ananías: ‘Eeroka riyo-yaake Iwawane acharinepaini. Riyoyaakemi piyotantaiyaawori ikowakaimiri irirori, piñagairi Cristo tampatzikatatsiri, pikemawaantetairi ee-jatzi.

15 Eerokatake kenkithatakotairine maawoiniki atziri. Pinkamantairi okaatzi piñaakeri, okaatzi pikemakeri.

16 Tekaatsi poyaawentanake. Pinkatziye iroñaaka, pomitsitsiyaatya, paakotairi iwairo Awinkatharite pinkowakotairi impeyakotaimiro piyaariperonka.’”

Ikenkithatakotziro Pablo ipatzimaitziri inkenkithatakagairira itsipasatziatziri

17 “Okanta nipyapaawo Jerusalén-ki, niyaatake tasorentsipankoki namaña, ari noñaawyaatakarai janta.

18 Noñaakeri Awinkatharite, ikantakena: ‘Intsipaito pishitowanake Jerusalén-ki, tema eero ikemisantatzimi pinkenkithatakotena jaka.’

19 Ari nokantanakeri naaka: ‘Pinkatharí, riyo-taiyini maawoini niyaatapiintzi tsika rapatotapiintaita, nomonkyakaantayetakeri ikaatzi kenisantayetzimiri, osheki nipasta-kaantawaitakeri.

20 Tema rowamagaitakeri pairani pimperatanewo Esteban, kenkithatakotzimireroka, ari nokaatzitakari naaka janta, naapatziyakotakari owamaakeriri, nokempoyaakeniri iithaare paini.’

21 Iro kantacha ikantanakena Pawa: ‘Piyaate, naakatake otyaantemine intaina risaikayetzira kaari pisheninkata.’ ”

Risaikimotakeri Pablo reewarite owayeripaini

22 Ikanta ikemawakero atziripaini jiroka, rapi-itaianakeroni ikaimaiyini ikantzi: “¡Jirika atziri te onkameethate rañe! ¡Pashireeyaa!”

23 Eeke ishintsitatzi ikaimaiyini, rotekakotaiyani iithaareki.*

24 Ikanta jewari, ikantakeri rowayerite: “Paanakeri inthomoikinta jirika, apasatawakeriita inkamantantairori oita ikenkithawaitakeri rowatsimaantakariri isheninkapaini.”

25 Ari roositanakeri ripasatantaityaariri, rosampitanakeri Pablo itsipa jewari, ikantziri: “Rosankenatakotanewo Roma-satzi ninatzi naaka. ¿Shinetaantsitsima ripasawaitaitena, te raminakoitawakenawo oitarika nokenakaashitakari?”

26 Ikanta ikemawake jirika, ripiyashitanakari reewarepero, ikantapairi: “Nowinkatharité, ¿Piyotakema oita antakeri? Iriitake jirika, rosankenatakotanewo awinkathariperote saikatsiri Roma-ki.”

* **22:23** Ikantaitzi ejatzti, rookawanetzitaka kipatsi tsika ipiy-otaiyakani, tema ikisaiyatyaani.

²⁷ Ikanta ikemawake, ripokashitapaakeri Pablo, rosampitapaakeri: “¿Pimaperotatyama posankenatakoperota eeroka?” Ari rakanake Pablo, ikantzi: “Jee.”

²⁸ Ikantzi jewari: “Osheki nipinakowentakari naaka nosankenatakotantyaari.” Ikantzi Pablo: “Te naaka, rosankenatakoitzitakena owakera notzimapaake.”

²⁹ Ikemaiyakeni ikantake, roosoryaakotanakeri. Ithaawakaanakawo jewari, roosotakaantakeri osankenatakotachari Romaki.

Ragaitanairi Pablo rapatotapiintaiyanira reeware Judá-ite

³⁰ Okanta okiteeshetamanai, ikowi riyote jewari oita ikoshekaminthatantariri Judá-ite Pablo. Ipiyotakaantakeri reeware Imperatasorentsitaarewo, ejatzí reewarepero Judá-ite. Romishitowakaantakeri Pablo, roisaikakeri ipiyotaiyanira.

23

¹ Rotzikanaminthatapaakari Pablo jewaperori piyotainchari, ikantanakeri: “Iyekiite, nokempoyaapiintaka naaka eero otzimanta nantzimoteriri Pawa.”

² Ikanta Ananías, Imperatasorentsiperori, ripasawaantetakaantakeri Pablo.

³ Ikantanakeri Pablo: “¡Thaiyawairentzí! Pawa pasatemine eeroka! Saikawetatsimi jaka pam-

inakoterome Inintakaantaitanewo, ¿Tema pipiyathatakawo eeroka pipasatakaantakenaga?" *

⁴ Ikanta piyotainchari, ikantanakeri Pablo: "¿Arima pinkanteri pinkaweyeri Rimperatasorentsiperotaarewote Pawa?"

⁵ Ikantzi Pablo: "Iyekiite, te niyweta naaka Imperatasorentsiperotaarewo rinatzi, tema okantzi Osankenarentsiper: 'Eero pikaweyiri jewatakaantatsiri.' "

⁶ Riyotakotakeri Pablo ikaatzi jewaperori piyotainchari, apaanipaini Sadoc-iite rini, iriima itsipapaini Fariseo rinatzi. Ikantzi Pablo: "Iyekiite, Fariseo ninatzi naaka, eejatzi maawoini nosheninkapaini. Iroowa riyakowentantaitanari iroñaaka tema niyotakotaatziiro rañagaira kamaintsiri."

⁷ Ikantakera Pablo, ari riñaanaminthatawakaanakari Fariseo-paini eejatzi Sadoc-iite.

⁸ Tema ikantapiintzi Sadoc-iite: "Eero rañaayetai kamayetaintsiri, tera otzimi shiretsi, tera itzimita maninkari." Iriima Fariseo-paini, riyoyetzi irirori imaperotatyá jirokapaini.

⁹ Ari richeraanake maawoini. Ikanta yotzinkaripaini Fariseo, ikatziyanaka, ikantanake: "Jirika atziri te otzimi iyenakaashitanewo. Aamaaya maninkari ñaanashiretakeriri, kaaririka shiretsi."

¹⁰ Eeke ishintsitatzi richeragaiyini. Ikenkithashiryaanaka reeware owayeripaini,

* **23:3** Kantakotachari jaka "thaiyawarentzí", iriijetakera Imperatasorentsitaarewo. Iriitake roshiyakaawentziri Pablo okita-maaweta rowantitariri kaminkari. Paminero Mt. 23.27.

ikantzi: “Naanairiita Pablo, rowaariperotaitzirikari.” Ikaimakaantake rowayerite romishitowairi, raanairi rimaapiintaiyinira.

¹¹ Okanta otsirenitanai, ejatzi roñaaganaari Awinkatharite, ikantairi: “Pablo, eero pithaawi, arira pinkenkithatakotakena Roma-ki poshiyakairo jakা Jerusalén-ki.”

Ikenkithashiretaita ritsitokaiteri Pablo

¹² Okanta okiteeshetamanai, ikenkithawaitake Judá-ite, ikantawakaiyani: “Jame atziwenthashityaari Pablo irojatzi atsitokantakyaariri. Eerorika nimonkaatziro, rowasanketainaata Pawa.”

¹³ Aamaaka ranaanakeri 40 atziri ikaataiyini kantaintsiri.

¹⁴ Irojatzi riyaatashitantanakariri reeware Imperatasorentsitaarewo, ejatzi Itzinkampaini, ikantaiyakerini: “Nitziwentaiyarini Pablo irojatzi nitsitokantakyaariri. Eerorika nimonkaatziro, rowasanketainaata Pawa.

¹⁵ Janjaatya paapatziyawakaiya eerokapaini pikaaatzi papatotapiinta, pinkowakotairi reeware owayeripaini, pinkantairi: ‘Pamainari Pablo onkiteeshetamanairika naminakoperotainiri iyenakaashitane.’ Aamaawenta nonkantaiyaani naaka nitsitokawakeriita tekera rareetapaakaata jakা.”

¹⁶ Kemake itzineri Pablo, jatanake rimaapiintaiyinira owayeri ikamantapaakeri.

¹⁷ Ikanta Pablo ikaimake apaani owayeri, ikan-takeri: “Paanakeniri pitzinkami jirika mainari, eenitatsi oita inkamanteriri.”

¹⁸ Ikanta owayerika raanakeniri itzinkami, ikantapaakeri: “¡Itzinkami! Ikowakotakena Pablo namakemiri jirika mainari, eenitatsi inkamantemiri.”

¹⁹ Ikanta jewarika, raanakeri mainari jantyaatsikaini, rosampitakeri: “¿Oitaka pinkamantenari?”

²⁰ Ikantanake mainari: “Ikenkithashire-taiyakani Judá-ite inkowakotemi onkiteesheta-manairika paanairi Pablo janta rapatotapi-intaiyanira jewaripero, raminakoperotero iyenakaashitanewo.

²¹ Eero pikemisantziri, tema manaiyakani 40 atziri. Ikantaiyakeni: ‘Jame atziwentashityaari Pablo irojatzi atsitokantakyaariri. Eero owashitari, eero arita amere. Eerorika nimonkaatziro, rowasanketainaata Pawa.’ Wetsikaiyakani iroñaaka, royaawentaiyani tsika pinkante eeroka.”

²² Ikanta jewari rotyaantairi mainari, ikantawairi: “Eero pikamantantziro jiroka.”

Rowawisagaitakeri Pablo pinkathariki Félix

²³ Ikanta jewari ikaimake apite reeware owayeripaini, ikantakeri: “Pimpiyote 200 powayerite, pintsipataakeri 70 owayeri kyaakayaarine kawayo, eejatzi itsipa 200 aatsine rowathaamento. Paanakeri tsireniriki Cesarea-ki.

²⁴ Piwetsike kawayo inkyakaanakyaari Pablo, pinkempoyeeri kameethaini. Paanakeri pinkathariki Félix.”

²⁵ Ari rosankenatakero rotyaanteniriri pinkathari, okantzi:

26 “Rosankenare Claudio Lisias rotyaantziniri pinkathari Félix: Osheki niwethatemi.

27 Jirika atziri notyaantakemiri, rotaiyakaantawetakari Judá-ite jaka, iroowetaincha ritsitokerime. Ikanta niyotake rosanke-natakotanewo itzinkamipero Roma-satzi, naanake nowayerite, nookakaawentakeri.

28 Nokowawetaka niyote oitarika ikenakaashitari jirika ikoshekantaitakariri, irootake naantanakariri rapatotapiintaiyanira itzinkami.

29 Noñaakero ikoshekawentashitari Inintakaantaitanewo rashiyetari irirori. Tekaatsi ompoñaantyaari ritsitokaiteri, te okameethatzi romonkyaaakaantaiteri eejatzi.

30 Tema nokemake ikowaiyatziini Judá-ite ritstokeri, irootake notyaantantakemiriri eeroka. Nokantzitakari eejatzi jirikapaini koshekawaitariri inkamantemiro eeroka oitarika ikoshekantariri.”

31 Rimatakerero owayeripaini. Raanakeri tsireniriki Pablo janta Antípatris-ki.

32 Okanta okiteeshetamanai, piyaiyaani owayeri anashitaiyanaincharini. Iriima ikaatzi kyaakaanainchari eekero royaatatzii Pablo.

33 Ikanta rareetakaakari Cesarea-ki, ipapaakeri osankenarentsi pinkathari, ikantapaakeri: “Pinkathari, jirika Pablo.”

34 Ikanta rithonkanakerero pinkathari riñaanatawakero osankenarentsi, rosampitanakeri Pablo, ikantziri: “¿Tsika pipoñaaka?” Rakanake Pablo: “Nopoñaawo Cilicia-ki.”

35 Ikantanake pinkathari: “Ari nonkemakemi paata arika rareetapaakyia ikaatzi koshekawait-

zimiri.” Irojatzi inintakaantantanakariri ragitanakeri ipankoki Herodes, ari inkempoyagaiteri.

24

Ikenkithatakota Pablo janta Félix-ki

¹ Okanta awisanake 5 kiteesheri, areetapaaka Cesarea-ki, Ananías Imperatasorentsiperori itsipayetakari Itzinkampaini eejatzi yakowentananneri iita Tértulo. Rawisashitapaakeri pinkathari inkoshekakaantyaariri Pablo.

² Ikanta ramaitapaakeri Pablo, kenkithawai-tanake Tértulo, ikantanakeri Félix: “Ariwé Pinkatharí, noñaakero kameetha nisaiki, osheki piyotanetzi pantakeniri kameethatatsiri nosheninka.

³ Okaatake jiroka nowinkathariperote Félix, osheki riwetharyaapiintaiyakemini maawoini nosheninka.

⁴ Eero osamanitanta, nokowatzi pinkemisantawakena eepichokiini nonkan-temiri.

⁵ Noñaakeri naaka, jirika atziri owaariperotantanerri rinatzi. Rithonka ikenayetake nampitsiki, te apatziro ikoshekakari nosheninka nokaatzira no-judá-itetzi, irijatzi jewatakanairiri jitashiwaitachari ‘Oshiretanaariri Nazaret-satzi’.

⁶ Ikowake eejatzi rowaariperoterome nota-sorentsipankote, iroowa notaiyakaantantakariri, nokowaiyawetakanri naminakotantyaarime Inintakaantitanari naaka.

⁷ Iro kantacha, ripokapaake jewari Lisias, raapithatakenari, richeraimowaitakena.

⁸ Ikantanakena: ‘Ontzimatye piyaataiyeni pinkathariki riwetsikemiro awisaintsiri.’ Janjaatya posampiperoteri eeroka ayotantyaawori imaperotatyaarika nokoshekaminthatantari.”

⁹ Irojatzi ikantaiyakerini eejatzi Judá-ite ikaatzi pokaintsiri.

¹⁰ Ari rowatzinkawakotanaka pinkathari ompoñaantyaari riñaawaite Pablo. Irojatzi ikantanakari Pablo: “Osheki nokimoshirewentakemi eerokatake kemenane nonkenkithatakotya, tema niyotzi eerokatake wetsikapiintakeniriri nosheninkapaini inkoshekawakaiyaani.

¹¹ Kantacha posampikowentero eeroka, owakera nareetaa naaka Jerusalén-ki okaatzi 12 kiteesheri, nokowaweta nompinkathatapairime Pawa.

¹² Te niñaanaminthatantawaite, te nokoshekane-tari atziripaini tasorentsipankoki, eejatzi nokantakari jantapaini nampitsiki, tekaatsi nonkoshekya ipiyotaitapiintaitaga.

¹³ Jirikapaini thawetakotakenari iroñaaka jaka, eero iñagaitziro imaperotatyaarika.

¹⁴ Ari okantaka, notsipataari naaka ikaatzi iitaitziri ‘Awotsiweri.’ Iroowa ikantakeri jirikapaini yakowentantaneri nokemisantashiwitané inatzi. Ari nokenakairo naaka noplakathatziri Pawa ikemisantziri pairani nocharinepaini. Nokemisantziro Inintakaantane, eejatzi rosankenarepaina Kamantaneri.

¹⁵ Ari noshiyyayetari irirori, royaawentziri Pawa rowañaayetairi kamayetaintsiri, te apatziro rañaayetai kameethashireri, eejatzi inkantzitaiya kaariperoshireripaini.

¹⁶ Iroowa nokowantapiintari eero otzimi oita nantzimoteriri Pawa, eejatzi atziripaini.

¹⁷ Awisake osheki osarentsi nokenake-nawaitake, nipiryawo nonampiki namai nompashitapaiyaariri nosheninka koityaawaitatsiri, nokowawetapaa eejatzi nashitakaapaiyaarime Pawa.

¹⁸ Irootake nantziri tasorentsipankoki. Ari nameetziro noishi ompoñaantyaari nonkitewathatai. Te osheki nonkaataiyeni, tekaatsi nonkoshekawaitya janta. Ari iñaapaakena Judá-ite poñainchari Asia-ki.

¹⁹ Iriitakeme pokatsine jaka inkennithatakotena oitarika iñaakotakenari.

²⁰ Tera ripokaiyatziini irirori. Jirika pokaintsiri jaka piyowentakenari, janjaaty inkantemi eenitatsirika iñaakotakenari rokiki nokenakaashitakari.

²¹ Aamaa iro ikantakotanari nokantakeriri ipiyowentantakenari ketziroini, nokantakeri: ‘Troowa riyakowentantaitanari nokemisantaatziro rañaayetai kamayetatsiri.’ ”

²² Tema pinkathari Félix riyotakotziri iitaitziri “Awotsiweri”, iro ripakaantanakariri, ikantanakeri: “Arika ripokake jewari Lisias, ari inkamantaperotapaakenawo jiroka.”

²³ Irojatzi ikantantakariri reeware owayeripaini: “Pinkempoyeeri Pablo, pishineteri rareetyaari raapatziyanewo impantyaariri koitzimotariri.”

²⁴ Okanta otsipa kiteesheri, piyaawo Félix, itsipatakawo iina Drusila, Judá-ite inatzi iroori. Ikanta ikaimakaantapairi Pablo

inkemawakeri inkenkithatakoteniri tsika okantakota rawentaashiretaaariri Jesucristo.

²⁵ Iri kantacha Pablo retanakawo ikenkithatakotanakeniri tampatzikashiretaantsi, ñaakoshiretaantsi, rowasanketantayetai paata. Ari ithaawanakeri Félix, ikantanakeri: “¡Ataama, piyaatai! Ari napiitairo nonkaimakaantaimi paata arika nisaikashiwaitya.”

²⁶ Tema royaawentawetatyá Félix ripinaterime Pablo, ripakaantaiyaariri. Iroowa rapiitantawetakariri ikaimakaantziri inkenkithawaitakairi.

²⁷ Awisake okaatzi apite osarentsi. Ari okaata-paake ipinkatharitzi Félix. Ikowake raapatziyapi-intyaari Judá-ite, irootake kaari ripakaakaantantariri Pablo. Ikanta ripoyaatapaari itsipa pinkathari jitachari Porcio Festo.

25

Ikowake Pablo iri aminakoterine César

¹ Pinkathariwentantake Festo. Iro awisanake mawa kiteesheri jatake Jerusalén-ki ipoñaanakawo Cesarea-ki.

² Ikanta reeware Imperatasorentsitaarewo itsipayetakari iriiperori Judá-ite, ithawetakotawakeri Pablo.

³ Ikowakotakeri rotyaantairi Pablo Jerusalén-ki. Ikenkithashiryagaiyakani ritsitokakaanteri niyankithakineki awotsi.

⁴ Ari ikantanake Festo: “Tema romonkyagaitakeri Pablo Cesarea-ki, irootaintsi niyaatai janta.

⁵ Royaatanakena itzinkami, tzimatsirika iyenakaashitane jirika atziri, ari piyakowenteri janta.”

6 Te osamanitzi risaikawaitapaintzi Festo janta Jerusalén-ki, piyaawo Cesarea-ki. Okanta risaikamanai risaikamentoki ipinkathariwentantzira, ikaimakaantakeri Pablo.
*

7 Ikanta ikyappaake Pablo, ari ripokaiyapaakeni Judá-ite poñaayetainchari Jerusalén-ki, ikantakowitzapaakeri osheki kaariperori, okantaweta te iñaayewetawo imaperotatyaarika ikantakoitziriri.

8 Kenkithatakotanaka Pablo, ikantake: “Tekaatsi kaariperori nante naaka, te nipiyyathatawo Inintakaantaitakeniriri nosheninkapaini, te nowaariperotero tasorentsipango, te nokaweyawaitziri César reewariperote Roma-satzi.”

9 Iriima pinkathari Festo ikowira raapatziyapiintyaari Judá-ite, rosampitanakeri Pablo: “¿Pikowima piyaate Jerusalén-ki, nonkemantyaariri yakowentemine janta?”

10 Ikantanake Pablo: “Iro kameethatatsi nisaike jaka paminakotena, tema eerokatake rowakeri César reewariperote Roma-satzi. Piyotaiyakeni tekaatsi kaariperori nantzimoteriri nosheninkapaini Judá-ite.

11 Ontzimatyeeme noyenakaashiperotane, kameethatakeme ritsitokaitena. Tema tekaatsi nonkenakaashitya, te okameethatzi potyaantena janta. Nokowaperotzi iri pinkathari César aminakoperotenane.”

12 Ikanta Festo ikenkithawaitakaakeri

* **25:6** Kantakotachari jaka “te osamanitzi”, irojatzi ikantakoitziri 8 aamaakarika 10 kiteesheri risaikawaitapaintzi.

ikaataiyini ipinkatharitzi. Ari ikantanakeri: “Iroorika pikowi raminakotemi César, ari nosankenatakotemi, piyaatantyaari janta.”

Ragaitanakeri Pablo pinkathariki Agripa

¹³ Ikanta pinkathari Agripa itsipatakawo iina Berenice pokaiyakeni Cesarea-ki, riwethatyaari Festo. †

¹⁴ Ikanta risaikawaitapaintzi janta, ikenkithawaitakaakeri Festo tsika ikantakota Pablo, ikantakeri: “Eenitatsi apaani atziri rookanairi pinkathari Félix romonkyagaitziri.

¹⁵ Niyaatake chapinkipaiteki Jerusalén-ki, osheki ikantakowitzawakeri reeware Imperato-sorentsitaarewo itsipayetakari Itzinkamipaini, ikowakotakena nitsitokakaanteri.

¹⁶ Nokantanakeri naaka: ‘Jiroka nametaiyarini No-roma-satzitzira: Ontzimatye impiyotaiyaani ikaatzi koshekawakaachari, ompoñaantyaari inkenkithatakantyaariri riyakowentanewo. Kyaaryooperorika otzimi iyenakaashitane, aritake ritsitokaitakeri.’

¹⁷ Irootake nantakeri ripokaiyakenira irirori, te nishenkaanaka, jatakena nisaikamentoki, nokaimakaantakeri atzirika.

¹⁸ Iro kantzimaitacha okaatzi ikantapaakeri yakowentziriri, te noñiiro onkantaperotya okaatzi nokenkithashiryaakowetakariri.

¹⁹ Apatziro ikenkithatakotashitakawo ikemisantashiwayietari, ikenkithatakotakeri eejatzi iitaitziri Jesús rowamagaitakeri, iriitake ikantziri Pablo eeniro rañi.

† 25:13 Jirika Agripa, iitaitziri eejatzi Herodes.

20 Temaita niyotzi jimpe nonkantero jiroka, nosampitakeri Pablo ikowirika ryaate Jerusalén-ki raminakoitantlyaariri janta.

21 Ikowaperotake Pablo iriitake aminakoperoterine César Augusto awinkathariperote Roma-ki. Irootake nokantantakari ryaatatziira romonkyagaiteri irojatzi notyaantantakyaariri.”

22 Ikanta Agripa, ikantanakeri Festo: “Nokowi nonkemerri naaka jirika atziri.” Ikantanake Festo: “Aritake pinkemakeri onkiteeshetamanai.”

23 Okanta okiteeshetamanai, ikyaa ke Agripa itsipatakawo Berenice, owaneenka ikantayetaka. Itsipayetakari reeware owayeripaini, eejatzi iriperoripaini atziri saikayetatsiri janta. Ikantake Festo ramajiteniri Pablo.

24 Ari ikenkithawaitanakeri Festo, ikantzi: “Pinkathari Agripa, pinkatharipaini ikaatzi piyotainchari jaka, jirika atziri. Osheki riyakowentakeri Judá-ite janta Jerusalén-ki eejatzi jaka Cesarea-ki. Richeraapiintaiyini ikowi ritsitokaiteri.

25 Noñiimaitakawo naaka tekaatsi inkenakaashitya jirika ritsitokantaityaariri. Iri kantzimaitacha, iri kowanaintsiri raminakoperoteri Augusto, iri kameethatatsi notyaanteri janta.

26 Temaita noñe naaka oita nosankenateniriri pinkathariperori ikantakota jirika, iroowa namantzimiriri eerokapaini piñeeri, eerokaga pinkathari Agripa namakeniri, posampitawakeri, ari ontzimeri nosankenateri.

27 Te onkameethatzimotena notyaante apaani romonkyagaitziri, eerorika otzimi tsika osankatakota iyenakaashitane.”

26

Ikenkithatakota Pablo Agripa-ki

¹ Ikantanakeri Agripa jirika Pablo: “Kantacha pinkenkithawaitapai eeroka.” Ari rowaatzinkawakotanaka Pablo, kenkithawaitanake, ikantzi:

² “Pinkatharí Agripa, osheki nokimoshiretake nonkenkithawaitakaakemira eeroka, nokowi nonkenkithatakotero okaatzi ikantakowaitakenari Judá-ite.

³ Piyotakoperotziro eeroka okaatzi rameyetari asheninkapaini Judá-ite. Irootake nokowantari pinkemisantawakena nonkantemiri.”

Rañaamento Pablo tekera ikemisantanaakeeta

⁴ “Riyotaiyini nosheninkapaini Judá-ite tsika nokanta eeniro nomainaritapaake, nisaikimotantakariri Jerusalén-ki.

⁵ Naakatake Fariseo monkaawairentzi, te nipiyathanetawo Inintakaantaitziri. Ikowirika, kantacha inkenkithatakotena.

⁶ Iroowa nisaikantari iroñaaka jaka, tema nokenkithatakotaatziiro okaatzi pairani ikowakaakeriri Pawa acharinepainen, oyaakoneentaiyirini aakapaini.

⁷ Pinkatharí Agripa, irojatzi noyaakotzitakari naaka, irootake ikantakotakenari asheninkapaini. Irojatzi royaakoneentakeri maawoini asheninka icharineyetaari 12 itomipainen Israel-ni. Irootake iñaashintsiwitashitantakari rantawaitainiri Pawa iñaantayetaiwayaworime.

⁸ ¿Litaka kaari pikemisantanta eerokapaini rowañagairi Pawa kamawetainchari?”

*Royaakyaaaminthawetakari
kemisantzinkaripaini*

Pablo

9 “Nimatziwetakawo naaka pairani noñaashintsiwaitashita, nokenkithashiryaaweta nanteme osheki oitarika nonkoshekantantyaariri aakotanairiri iwairo Jesú Nazaret-satzi.

10 Iro nantakeri Jerusalén-ki. Rishinetakenawo reeware Imperatasorentsitaarewo, osheki nomonkyaaakaantake ikiteshiretakagaitairi. Okanta noñaakowentayetzirira ritsitokaitziri, inimotana.

11 Tzimatsi osheki nowasankewetakari ripakaantyaaworime ikemisantzi. Nimatzitari tsika rapatotapiintaita. Osheki nokisaneentakeri jirikapaini, noyaakyaaaminthawaitakeri, eejatzi nokantzitakari saikayetatsiri otsipaki nampitsi.”

Rapiitziro Pablo ikenkithatakota ikemisantantaari

(Hch. 9.1-19; 22.6-16)

12 “Iro niyaatantakari nampitsiki Damasco, rotyaatakena reeware Imperatasorentsitaarewo.

13 Iro kantacha niyankithakineki awotsi, ikaatake tampatzika ooryaa noñaake shipakiryaanaantsiri inkiteki, ranaanakeri ooryaa, roorentakotapaakena nokatziyakaga, eejatzi ikaatzi tsipatakenari.

14 Nityeeyanakeni maawoini kipatsiki. Nokematzi riñaanaitanakena niñaaneki Heberthato, ikantana: ‘¡Saulo! ¡Saulo! ¿Litaka poyaakyaaaminthatantanari? Eerokatake owasankewaitacha apaniroini, oshiyawaitakawo pipaikayitzitatyeeyaawome thoyempithowari.’

15 Ari nakanakeri naaka: ‘¿Piitaka eeroka Pinkatharí?’ Rakanakena Nowinkatharite: ‘Naakatake Jesús, poyaakyaaaminthatakeri.

16 ¡Pinkatziye! Iroowa noñaagantzimiri pantawaitaina naaka. Pinkenkithatakotairo okaatzi piñaakeri, onkaate piñagairi eejatzi paata nantakagaimiri.

17 Aritake piñagairo nookaakowentaimi pisheninkaki, eejatzi janta kaari pisheninkata tsika notyaantemi iroñaaka.

18 Oshiyawaitaiyaawo pokiryaakagaatyeerime. Aritapaake ikenashiwaitaka otsirenikitzira ranashiyetaiya kiteesheriki. Aritapaake ipinkathariwentakeri Satanás, iri Pawa pinkathariwentairine. Iro ompoñaantyaari nompeyakotantaiyaanariri iyaariperonka, nonkiteshiretakaayetairi awentaashiretainane naaka. Iroowa ikowakagaitakeriri.’ ”

Te ripiyathawitanaka Pablo roñaagaitakarira

19 “Pinkatharí Agripa, te nipyathatanaka roñaagaitakenawowa inkite,

20 netanakawo nokenkithatakanakeri Damasco-satzi, Jerusalén-satzi, maawoini nampiyetawori Judea-ki, nokenkithatakayitanakari ikaatzi kaari ashenkata, nokantayetziri: ‘Pipiyashitairi Pawa, pantayetairo oñaaganterone pipakagairo piyariperonka.’

21 Iroowa kantacha ineshironkatakena Pawa eekero niyaatakaatziiro nokenkithatakotziri iroñaaka. Nokenkithatakainiri maawoini,

22 Iro kantacha ineshironkatakena Pawa eekero niyaatakaatziiro nokenkithatakotziri iroñaaka. Nokenkithatakainiri maawoini,

iriiperipaini eejatzi kaari iriiperotatsine. Okaatzi nokenkithatapiintakeri, te noipiyyiro okaatzi rosankenayetakeri Moisés-ni, eejatzi Kamantantaneripaini. Tema rosankenatakoitakero awisayetsine, ikantaitake pairani:

²³ Ontzimatye inkame Cristo, iriitake etaiyaawone rañagai. Iro ompoñaantyaari inkenkithatakoiteniri awisakotaantsi ashenginkapaini, inkenkithatakoiteniri eejatzi kaari ashenginkata.”

Ikowi Pablo inkemisantakairi Agripa

²⁴ Ikantayetakero Pablo jiroka, ikaimanake Festo: “¡Pablo, pishinkiwentaty! Okantakaimi pikamaitakawowa piñaanawaitzi.”

²⁵ Rakanakeri Pablo: “Pinkatharí Festo, te noshinkiwenta, okaatzi nokantayetakeri imaperotatayta.

²⁶ Riyotakotziro pinkathari Agripa jiroka, iroowa nokamantantakemirori jirokapaini. Niyotzi naaka riyotakotziro maawoini, te imanakoyeta jiroka.

²⁷ Pinkatharí Agripa, ¿tema pikemisantziro rosankenayetakeri Kamantantanerii? Niyotzi naaka pikemisantziro.”

²⁸ Rakanake Agripa: “Eepichokiini piyotaawetakena, ¿Piñaawetaka ari pinkemisantakaakena, noshiyakotantaiyaariri ‘Cristo-weri?’ ”

²⁹ Ikantzi Pablo: “Okantawetaka eepichokiini nokantakemiri, aamaakarika, osheki nokantakemiri, onkamintha iri Pawa kantakayaawone, te apatziro eeroka pinkatharí, eejatzi maawoini

pikaatzi pikemaiyakenani iroñaaka, poshiyakotainawo nokantakaga naaka, onkantawetya eero roosotantaitzimiro kotsirotha.”

³⁰ Irojatzi ikatziyantanakanari pinkathari Agripa itsipatakawo Berenice, rimatzitanakawo eejatzi itsipa pinkathari Festo, eejatzi maawoini ikaatzi saikaintsiri,

³¹ jataiyanakeni jantyaatsikaini ikenkithawait-akotziro jiroka. Ikantawakagaiyani: “Itakakya romonkyagaitantakariri jirika atziri, tekaatsi inkenakaashityaari ritsitokantaityaariri.”

³² Ikanta Agripa ikantanakeri Festo: “Aritakeme apankagairime naaweta jirika atziri, eerome ikowakotakemime posankenatakoteri Pinkathariki César iñaantyaawori oitarika awisatsiri.”

27

Rotyaantaitakeri Pablo Roma-ki

¹ Ari ikowaiyakeni rotyaanteri Pablo janta Italia-ki, intsipatanakyaari itsipapaini romonkyagaitziri, ari niyaatzitanakyaari eejatzi naaka. Raminaitakeniri jitachari Julio jewatziriri owayeripaini pinkathariki Augusto, iriitake aanakerine.

² Notetakotanakari Adramitio-satzi niyaatero Asia-ki. Notsipatanakari Aristarco Tesalónica-satzi saikatsiri Macedonia-ki.

³ Okanta okiteeshetamanai areetakena Sidón-ki, ari rariperotapaakari Julio jirika Pablo, intakaakeri rareetapaintyaari raapatziyanepaini impantawakyaariri koityiimotariri.

⁴ Irojatzi nawisantanakari Sidón-ki, ari itonkyotakena tampyaa, te onkantanaiya namaatakote, iro nokenakotantanakari othampishiki iitaitziro Chipre.

⁵ Naathakiryaanakero inkaare irojatzi Cilicia-ki eejatzi Panfilia-ki. Areetakena Mira-ki, nampitsi saikatsiri Licia-ki.

⁶ Ari noñaapaake otsipa notetantanaiyaari poñaachari Alejandría-ki iyaatero Italia-ki, ari rotetakenari jewari.

⁷ Osheki kiteesheri namaatakotake neetsikeroini. Osheki nopomeentsiwaitaka nareetantakari Gnido-ki. Eekero itonkyotakotyana tampyaa, nimontyaakotanaka Salmón-ki, noshinampitapithatanakawo othampishi Creta.

⁸ Osheki opomeentsitaka namaatakotzi, irojatzi nareetantakari nampitsiki iitaitziro “Awochaaki”, eekaatapaira nampitsi Lasea.

⁹ Awisake osheki kiteesheri namaatakotake, kyaawontsitai, koweenkatanake namaatakote. Irootake ikantantanakari Pablo: *

¹⁰ “Pinkemisantawakena, akoweenkatakotatzira amaatakotzi, aritake ampeyakero amaatakomentotsi, powaagawopaini, aritake ankamagaantake eejatzi.”

¹¹ Iri kantacha reeware owayeripaini te ikemisantziri Pablo, iri ikemisantake ashitarori amaatakomentotsi eejatzi antakotzirori.

¹² Te opantawo tsika raatakowetaka rowawisaantyaaworime kyaawontsi, ikowaiyakeni

* **27:9** Kantakotachari jaka “kyawontsitai”, irojatzi ikantakoitziri “ikaatapiintakero ritziwentaiyani”.

riyaaneenteme Fenice-ki saikatsiri eejatzi Cretaki, eero oñaashirenkantari tampyaa kenayetatsiri kirinka eejatzi katonko. Ari ikowaiyakeni rowawisairome kyaawontsi.

Itampyaatakotzi inkaareki

¹³ Ikenkithashiryagaiyakaní ari onkantakya ramaatakote tema owakera etapaakawo otampyaatzi eepichokiini. Ari nokenakotaiyanakeni othapyaaki Creta.

¹⁴ Iro osamanitake eepichokiini antawotapaake tampyaa, iitapiintaiyironi irirori “Euroclidón”, ookantapaakawo amaatakomentotsi,

¹⁵ otainkakotanakena. Te riyatzi jimpe inkantanairo ramaatakomento, rishinetanakero otainkakotena tampyaa.

¹⁶ Osheki nopomeentsitakawo pitotsi thatainchari amaatakomentotsiki. Nokenakotanake othampishiki jitachari Claudia te otampyaaperotzi janta.

¹⁷ Ari note yetakero pitotsi amaatakomentotsiki. Tema ithaawantatyawo rawikakotya impanekiki entaatzira inkaare iitaitziro “Sirte”, roosoitanakero omerekiki amaatakomentotsi eero ikotaanta. Rishinetanakero otainkakotena tampyaa.

¹⁸ Okanta okiteeshetamanai, eekero oshintsitatzi otampyaatzi, ari retanakawo rowiinkakaantanake rowaagawo.

¹⁹ Okanta otsipa kiteesheri, rowiinkakero tzmatsiri amaatakomentotsiki.

²⁰ Osheki kiteesheri awisaintsiri te noñaayetairi ooryaa eejatzi impokiro. Antawoite

notampyaatakotake te niyotaiyeni arika newisakoyetai.

²¹ Awisake osheki kiteesheri te nowaawo, ikantanake Pablo: “Pinkemisantawakena, kameethawetaka arika pinkemisantakename irojatzi asaikeme Creta-ki. Eerome añaayetziro okaatzi owaariperotakairi.

²² Iro kantzimaitacha, eero okantzimoneentzimi, tema eero pikamagaantawaitzi apaani, onkantawetya ompeya jiroka amaatakomentotsi.

²³ Inkaaganki tsireniriki, noñaake maninkari, rotyaantanewo Pawa Ashitanari, nantawaitziniri,

²⁴ ikantakena: ‘Pablo, eero pithaawi, ontzimatye pareetya iñeemi César itzinkamiperori Roma-ki. Ineshironkatemi Pawa eeroka powawisaakotantyaariri pitsipatakari jika amaatakomentotsiki.’

²⁵ Ari ikantakenari. Iroowa pinthaamen-tashirentyaaari, tema nawentaashiretakari naaka Pawa, niyotake ari imatakya okaatzi ikamantakenari maninkari.

²⁶ Iro kantacha ontzimatye otzitakotya othampishiki.”

²⁷ Okanta apaani tsireniri, tzimake 14 kiteesheri, areetakena inkaareki Adriático-ki otainkakotakena tampyaa. Niyankipaite tsireniri, ari ikaimaiyanakeni antakotzirori amaatakomentotsi ikenkithashiryagaiyani iro nareetaiya kipatsiki.

²⁸ Rimonkaataiyakeroni jimpe iweyaa osaanaatzi, iñaatziiro te osaanaaperotzi, rapiitakero ejatzsi, iñaatziro eepichokiini

osaanaatanai. †

²⁹ Ithaawaiyini notzitakotya, rowiinkanake 4 owaatzinkerone amaatakomentotsi opataki, ari ramanaiyanakan onkiteeshetantyaari intspaita.

³⁰ Iri kantacha ikaatzi antakotzirori ikenkithashiryagaiyakani rishiye, rotetantanakyaawome pitotsi thatayetainchari, ramawenatanakawo rowiinkaiyeroni owaatzinkerone othowaki amaatakomentotsi.

³¹ Iri kantacha Pablo ikamantakeri jewari, ee-jatzi rowayerite, ikantakeri: “Arika rishiyake jirikapaini, eerowa pawisakoyetai eeroka.”

³² Ari ritotakotanakero owayeripaini pitotsi, rowamaataker.

³³ Irootaintsi onkiteeshetzimate, ikantantake Pablo: “Tzimake 14 kiteesheri oyaawenta oita awisatsine, te powaiya eerokapaini.

³⁴ Ontzimatye poya pañaantyaari, tema tekaatsi kamagaantatsine apaani.” ‡

³⁵ Riñaawaitakera Pablo, rayimotakeri pan, ri-wetharyaakari Pawa. Itzipetowakero, owanaka.

³⁶ Irojatzi ithaamentantanakawori maawoini, owaiyanakan eejatzi.

³⁷ Jiroka nokaataiyini notetaiyani 276 atziri.

³⁸ Ikanta ikaatakerowa rowaiyani, rowiinkakoyetanakero owanawontsi othomakanentantyaari tenari.

† **27:28** Kantakotachari jaka “te osaanaaperotzi”, irojatzi iitaitziri pairani 20 apishempate ashempa, ikantaitziri iroñaaka 36 metro. Kantakotachari eejatzi “eepichokiini osaanaatanai”, irojatzi iitaitziri pairani 15 apishempate ashempa, ikantaitziri iroñaaka 27 metro. ‡ **27:34** Kantakotachari jaka “tekaatsi kamagaantatsine apaani”, iro oshiyawori ikantaitziri eejatzi “eero opeyagaantawaita apaani kishitsi”.

Tsitsiyakotake

³⁹ Okanta okiteeshetamanai, jirikapaini antakotzirori, ikompitzimotapaakari kipatsi, iñaapaake eejatzi impaneki. Ari ikowanake raatakote janta.

⁴⁰ Ritotakotanakero oosotantari owaatzinkirori amaatakomentotsi, rookanakero, itzinayetanairo antawoite manthakintsi, riwetsikanairo iyomaro rikomatantyaari onkene raatakote impanekiiteki. §

⁴¹ Iro kantacha awikakotaiyapaakani othowaki eentaatzira inkaare, te onkantanaiya nishewatakote. Tankanake opataki ookantapaakawowa otamakaare inkaare.

⁴² Ari ikowawetanaka owayeripaini ritsitokanakerime omonkyagaarewo, eero rimaatantanaka rishiye.

⁴³ Iri kantacha reeware owayeripaini, ikowake irirori rowawisaakoteri Pablo, te rishinetziri rowamagaiteri, apatziro ikantanake: “Ikaatzi yotzirori rimaare, rimaateeta riyaate kipatsikinta.

⁴⁴ Iriima itsipapaini rontarekayetya inchakaakiki inkene rimaate.” Iroowa opoñaantari nawisakotantaari maawoini.

28

Risaikake Pablo othampishiki jitachari Malta

¹ Okanta nawisakoyetai maawoini, ari niyotaiyakeni jiroka othampishi oita Malta.

§ **27:40** Kantakotachari jika “itzinaakotanairo antawoite manthakintsi”, iroowa ookantari tampyaa inkene rishiyakoyete ote-tantawori amaatakomentotsi.

² Ari raakameethatawakena maawoini nampiyetawori janta. Tema oparyaatzi inkani, katsinkaite okantaka, oishitapaaka, ikaimaiyakenani.

³ Jatanake eejatzi Pablo raye irirori tsitsi, iro ripiyawetapaaka rowapaakerome ritsima, shiyappaaka maanke, ratsikakeri rakoki.

⁴ Ikanta iñaayetakeri nampitawori janta rowikantapaakari, ikantawakaiyanakanai: “Jirika atziri tsitokantaneri rinatzi. Okantawetaka rawisakowetaawo ripiinkeme, temaita rishinetaitziri rañe.” *

⁵ Iri kantacha Pablo rotukanakeri maanke paampariki. Tekaatsi awishimoterine.

⁶ Ikanta royaawentawetari raawaakayerime irojatzi inkamantyaari. Okanta osamanitake iñaitatziri tekaatsi awishimoterine, ikan-tayetanai: “Pawa rinatzi jirika atziri.”

⁷ Eenitatsi janta jewari nampitawori othampishiki jitachari Publio. Eenitatsi okaakiini rowane. Raakameethatakena maawoini raanakena janta. Mawa kiteesheri nisaikimowitzakeri.

⁸ Ari nokemakotakeri ipaapate Publio isaawakiwaitzi, ishiwaita. Ikyashitanakeri Pablo. Ikanta ramanakotakari, riterotantakari rako, apathakero ikantanaka, retsiyatatakotanai.

⁹ Rantakerowa jiroka, pokayetanake maawoini mantsiyari ikaatzi nampitawori janta othampishiki, retsiyatatakotaayetakeri.

¹⁰ Ari ipashitanakena osheki oitarika. Okanta

* **28:4** Irootake ikantakeri, tema roshiyakaatzi atziripaini iri Pawa otyaantakeniriri maanke, rowasanketeri.

notetanaa niyaatantaiyaari, ipayetawaana naayetanairi.

Areetaawo Pablo Roma-ki

¹¹ Okanta nisaikanake mawa kashiri janta othampishiki, ari notetanaari otsipaki amaatakomentotsi, owawisaakerori kyaawontsi janta. Opoñaawo jiroka amaatakomentotsi Alejandríaki. Riwetsikaitakeniro iwawanetashitaitari othowaki roshiyakaawo “Tsipari”. †

¹² Ari nareetayakani Siracusa-ki, mawa kiteesheri nisaikanake janta.

¹³ Irojatzi nawisantanakari janta irojatzi nareetantakari Regio-ki. Okanta okiteeshetamanai, okamintha itasonkakotakena tampyaa kenatsiri katonko, irojatzi nareetantakari Puteoli-ki otsipa kiteesheri.

¹⁴ Ari noñaapaake iyekipaini, ikantawakena nisaikawitanake. Iro nisaikimowaitantanakaririr okaatzi 7 kiteesheri. Ari nompoñaanaiyaari irojatzi nareetantyaari Roma-ki.

¹⁵ Ikanta ikemakotaiyakenani iyekipaini nampitawori Roma-ki, ritonkyotawakena awotsiki iitaitziro “Apio” tsika riyomparitaitapiinta. Okanta janta iitaitziri “Mawapanko”, ari royaawentakena itsipa. Ikanta Pablo iñaayetapaakeri iyekipaini, riwetharyaanakari Pawa, thaamentashire ikantanaka.

¹⁶ Areetaapakena Roma-ki. Ikanta reeware owayeripaini rowawisaapaakeniritsipa reeware maawoini omonkyagaarewo. Iriima Pablo

† **28:11** Ikantaitziri jaka “Tsipari”, iroowa iwairo apite itemipaini iwawanetashitaitari jitachari Júpiter, Cástor eejatzi Pólux.

rishinetakeri risaikawaitapaake tsikarika
ikowiro, apaani owayeri kempoyiiriri.

Ikenkithatakaantzi Pablo janta Roma-ki

17 Okanta awisake mawa kiteesheri nareetapaaka, rapatotapaakeri Pablo iriiperoripaini Judá-ite nampitawori Roma-ki. Ikantakeri: “Iyekiite, pairanitake raakaantawaitakena asheninkapaini janta Jerusalén-ki, rowawisaakena reewareki Roma-satzi. Iroowa rantakeri, okantawetaka tekaatsi nantzimowetyaari, te nokoshekawetawo okaatzi rameyetari pairani acharinepaina.

18 Osheki rosampiwetakenari reewarepaina Roma-satzi janta, te iñaashitawo nonken-nakaashityaari ompoñaantyaari ripasatakaantantenari. Ikowawetaka rapankaakaantainame.

19 Temaita ikowaiyini asheninkapaini Judá-ite. Irootake nokowakotantakariri pinkathari janta rotyaantena jaka, iriitakera wetsikakotene pinkathari César. Iro kantacha te iro nipokantari jaka niyakowenteri asheninkapaini Jerusalén-satzi.

20 Iroowa napatantzimiri eerokapaini nonkamantemiro. Nonkenkithatakotairi oyaakoneentanewo iiyeetaira Israel-iite, iroowa piñaantakenari jaka roosotantaitanawo kotsirotha.”

21 Ari ikantaiyanakeni irirori: “Te noñi naaka rosankenatakotemi poñaachane Judeaki. Tekaatsi nonkemakotemiri rareeyewetaga asheninkapaini jaka.

22 Apatziro nokemakowentakeri ikenkithatakoitziri kemisantashiwaitachari. Nokowi nonkememi jimantzi eeroka.”

23 Ikenkithashiryagaiyanakan rapatotya otsipaki kiteesheri. Ari ipiyowentaiyakarini osheki atziri rimaapiintzira Pablo. Ikenkithatakotakeniri tsika ikanta Pawa ipinkathariwentantai, roñaagakeri rosankenatakotaga Jesús, retanakawo rosankenareki Moisés-ni irojatzi rosankenayetakeri Kamantantaneriite. Tema retanakawo okiteeshetamanaira irojatzi ishaawiiteeni.

24 Eenitatsi kemisantawakeriri, iriima itsipapaini, te.

25 Te raapatziyawakaiyani, apawopaini riyaayetanai. Riweyaantawaari Pablo ikantawairi: “Jiroka ikantaitakeriri pairani picharinepaini, ikenkithawaitakaakeri Tasorenkantsi Kamantantaneri Isaías-ni, ikantakeri:

26 Piyaate, pinkanteri jirika atziripaini: Pinkemaiyawetyaani, eeromaita pikemathatziro. Paminaiyawetyaani, eeromaita piñiiro.

27 Tema kisoshire ikantaiyakani jirikapaini.

Witakempitari rinaiyakeni.

Mawityaakiri rinaiyakeni eejatzi.

Irootake kaari iñaantaiyawoni.

Kaari ikemantaiyani,

Kaari ikenkithashiretantaiyani,

Te inkemisantaiyeni, eero nowawisaakotairi.

28 Piyotaiyeroni eeroka jiroka, aritake rowawisaakoyetairi Pawa kaari asheninkata. Aritake inkemisantayetai irirori.”

29 Ikantakerowa Pablo jiroka ñaantsi,
jataiyanakeni isheninkapaini Judá-ite, osheki
riñaanaminthatawakaanaka.

30 Ari risaikapairi Pablo okaatzi apite osarentsi.
Ari raakameethatapiintakeri ikaatzi areeyetariri.

31 Ari ikenkithatakotapiintakero ipinkathari-
wentantai Pawa, riyotaantapiintakotairi
eejatzi Awinkatharite Jesucristo. Tekaatsi
oñaashirenkawaiterine.

**Kameethari Ņaantsi: ikenkitha-takoitziri
awinkatharite Jesucristo; Owakerari
aapatzia-wakagaantsi**

**New Testament in Ashéninka, Ucayali-yurúa
(PE:cpb:Ashéninka, Ucayali-yurúa)**

copyright © 2000 Wycliffe Bible Translators, Inc.

Language: Ashéninka, Ucayali-yurúa

Translation by: Wycliffe Bible Translators, Inc.

Ashéninka, Ucayali-yurúa [cpb], Peru

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ashéninka, Ucayali-yurúa

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files
dated 29 Jan 2022

03413587-4161-5845-9f63-68583816dfcd